

Le triomphe
d'Anuers,
faict en la susception
du Prince Philips,
Prince d'Espaign.



M Y lecteur, sy tu prendz volupte
Ouyr ou veoir chose tresmirificue
A che triumphe, sy present n'as este,
De toy che libure soit subit achete,
Car en celluy tu voiras a l'anticue
Archz triumphaulx, theatres magnificques,
Portes, coulomnes, eschaffaulx, bastimentz,
Ou cachiez sont moult d'Artz tresexcellentz.

P Lus tu voiras (quandt a litterature)
Graues deuises, sentences moult subtilles,
Dictons arduz, inscriptions obscures,
Quy (quandt au sens) se monstraront tresdures,
Che neantmoins a tous humains vtilles,
De l'acheter, ne t'estime inutille
Car le dicton du prouerbe est courant
Science n'a hayneux, que l'ignorant.



29|2084

La tresadmirable, tresmagnificque, & tri-
umphante entree, du treshault & trespuis-
sant Prince Philipes, Prince d'Espaig-
nes, filz de Lempereur Charles. V^e., en-
semble la vraye description des Specta-
cles, theatres, archz triumphaulx. &c.
lesquelz ont este faitz & bastis a sa
tresdesiree reception en la tresre-
nommee florissante ville
d'Anuers. Anno

1549.

Premierement composee & descripte en
langue Latine, par Cornille Grapheus
Greffier de ladict^e ville d'Anuers, &
depuis traduicte en Franchois.

Par Grace & Priuilege

de la Cæs. Maieste, & le tout par appro-
bation de la Chancellerie de
Brabant, & soubsigne
P. de Lens.

A ij

Aulcuns pointz sur toutes choses tresnecessaires a considerer sur che passaige.



REMIEREMENT, que a l'heure de l'entrée du Prince, commencea moult fort a plouuoir sans cesser, de sorte que a son entree (au moien d'ycelle grosse & continuele pluye) ne a pas bien este possible veoir au vif moult de choses, ny ne ont este assez amplement demonstrees selon l'intention que lon auoit entreprins.

SECONDEMEN T, que sa venue a este plus briefue que lon n'esperoit estre, au moien de laquelle celerite, a eu moult de chose de grandt consequence non du tout accomplie, lesquelles toutefois sont icy de nous applicquees cōme sy toutes auoient esteacheuees.

TIERCEMENT, que toutes les figures icy applicquee, sont (au moien de la grandt cure & exercice de Pierre de Allos painctre de la Maiesté Imperiale) droict apposée sur leur propre symmetrie & mesure.

QUARTEMEN T, que toutes mesures, desquelles est souuent mentionné en che volume, sont toutes applicquees & reduictes a la mesure du piedt de la ville d'Anuers, lequel piedt est de .xj. poulces, desquelz piedz les cinq font vng pas. Et est le piedt d'Anuers euuiron la grosseur d'ung cheueul ou poil moindre que le piedt Anticque des Rommains quy se parte ou diuise en .xij. doigtz.

QVINTEMENT, que tous piedz mensural icy applicquez, l'ung est aulcuneffois plusgrand que laultre: & a este necessaire: car en cas quilz fus- sent tous estez d'egalle grandeur, plusieurs figures icy posees & interßerees, eussent estees trop plus grandes que la grandeur des foeuilles de che volume requiert.

A T R E S H A V L T , E T T R E S P V I S .

sant Prinche futur, Charles, infant d'Espaigne
Filz de Phelipes Prinche d'Espaigne,
Filz de Lempereur Charles.v^e.

CORNILLE SCRIB. GRAPHEVS
longue & durable prosperite.

TON grandt Pere paternel (O trespuissant pour le futur ou aduenir tresredoupte Prince) Charles cinqquiesme de ce nom, Empereur tousiours Auguste, ayant enduré & souffert depuis plusieurs années encha de moult grandz labeurs & trauuaux, tant par la charge de moult grandes & crueuses guerres de par luy menée a victorieuse fin , que par les emotions du sainct Empire , apres auoir remis (par sa Magnitude) ycelluy sainct Empire , & icelluy reduict en son primerain & ancien repos. Aussy aprez estre en icelluy quelq peu de tempz repose, affin d'obuier a toutes emotions ou dangiers futurs, a voulu, & de faict a mandé, venir vers soy son filz Philipes, Prince Despaigne (& Pere ou geniteur de ta treshaulte Magnitude). Lequel (pour lhors estant en Espaigne, en postposant ou delaissant tous affaires) vfa de la plusgrande obeissance que possible luy fust, & de faict en delaissant Espaigne , est incontinent passe la mer , les Italles, la haulte & basse Allemaigne , pour venir vers son tresdesire Pere, lequel il ne auoit de long tempz veu, mais bien souuent desire veoir. Et avecques quelz honneurs, gratulations, leesses, humanitez, & triumphes, il a este triumphament & humainemēt receipt, par tout ou il a passez, est assez (tant par la renommee, que par plusieurs escripz faisantz de che mention) amplement deduict & declairez.

Premierement doncques apres estre arriuez en iceulx noz pays d'embas, est venu a Bruxelle en Brabant, lieu d'anciennete commode & propice pour la Court des Ducz de Brabandt, auql lieu il a este, (tant par son Pere, q̄ par ses tantes, soeurs de son Pere, asscauoir, Heleonore Royne de Franche, & Marie Royne de Hongrie) dung grandt desir treshumainemēt & tresioieusemēt receipt. Et avecque quel plaisir, triumphe, & leesse de toute la court Imperiale, de Messieurs de la ville, ensemble de toute la commune, il a este receipt, & bien veigné, seroit chose moult prolix e a racompter.

Apres doncqs estre triumphammēt receipt de Lempereur son pere, de toute la court, ensemble de tous ceulx de la ville: Il a semble bon a son dict Pere, le conduire, & mener, par toutes les plus principales citez & villes, de ceste siennes possessions hereditaires, affin que destre en icelles receipt, & accepte,

pour vray & futur successeur : Esquelles villes , il a este par tout triumphamment & humainement receipt.

Et consequemment , apres le auoir conduit & menes , par toutes les plus grosses & renommees villes de Flandres , Brabandt , Arthois , & Haynau , (& par iceulx habitans receipt & congneu pour vray successeur paternel , en lui rendans tous deu sermens , foy , & feaulte) a entreprins le voulloir mener en sa tresbelle & tressidelle ville d' Anuers , cite Metropolitaine ou capitalle , du Marquisat du saint Empire , pour en icelle prendre possession & Seignouerie dudit Marquisat . Et illecques estre arriuez , avecque quel desir , triumphes , festiuitez , honneurs , pompes , quel iugement des gratulations de toute la cite (asscauoir des Superieurs , Nobles , Marchandz , Nations , de toutes manieres destragiers , affluant de tous costez de la terre en ycelle cite , tant a piedt que a cheual , lesquelz ont este sans comparaison , & oultre mesure , en tresriches & pompeux arroy) a este receipt le tien Pere nostre Prinche , (lesquelz iamais n'auoient veu , mais bien souuent desire veoir , ensemble ton grand Pere Lempereur , & les deux Roynes tes tantes) voulons icy endroict (combien que ce nous sera chose fascheuse & assez difficile a narrer) selon nostre pouvoir , au moins mal que nous polrons , descripre toutes choses au vif , en fachon quil ne semblera pas lire , ains parfaictement regarder de loeul , soy esmerueillant ou donnant admiration , & che par plus clere & vifue forme , que sy toy mesmes partout auois esté en personnes , pour icelles tant dignes & sumptueuses choses regarder .

Mais iasoit che que de par nous songneusement , curieusement , laborieusement , & a la verite , toutes choses , (telles que nous les auons veue) soient descriptes , & reduicte au vif en lumiere , quy est celluy quy a che vouldra foy adiouster ? Quy est celluy qui ne pensera estre chose controuuee , voire la plusspart fabuleuse ou mensongiere ? quandt il viendra a lire (au dessus de la despense inmesurable , oultre la inenarrable quantite de la matiere , hors la multitudes des artistes & ouuriers , oultre la multitude des theatres , collonnes , spectacles , personnaiges , eschaffaulx , archz triumphaulx , & aultres telz appareilz) la non veue , ou ouye ingenieuse comprehension , ensemble la celerite du tempz , & vistesse de loeuure .

Certainement (la Dieu grace) nous aduons vescu l'aage de .lxix. Ans , ou environ . Nous auons circuy , ou transpasse plusieurs contrees en Europa , nous auons veu a Romme , de rechief nous auons veu tant es Italies que en plusieurs aultres diuerses contrees , de moult grandz & magnificques triumphes , nous auons connoissance a moult d'hommes vertueux & dignes de foy , quy se disent auoir veu en plusieurs villes & citez moult de choses magnificques & de merueilleuse admiration . Mais ne nous , ne eulx , ne auons veu , ny ne croions homme auoir veu chose tant triumphante ou magnificque , quy se puisse equiper a icelluy nostre triomphe , tant en coustz ou despence , sumptuosite , grandeur ,

deur, tant en labeur, que multitude de matiere, & le tout reduict,acheuez, ou menez a perfection en sy peu de tempz.

Qu'il soit ainsy, nest ce pas chose digne de grande admiration? voire quasy incroyable? que durant le tempz de trengte deux iours tant de non accoustumees grandeur de theatres, Archz triumphaulx, Portes triumphalles, eschafaulx, & aultres telz grandz pondereux (voire par maniere de dire) bastimentz iusques au cieulx, tant de nobles sciencies, tant de belles peintures, tant grandt nombre d'ymages artificieusement entaillees, tant de colomnes, histoires, inscriptions, enrichie d'or & d'argét, &aultre telle matiere, ont estez amenez tous a accomplissement & perfection, combien que au parauant toutesfois ne auoit apparence quelconque de matiere ou estoffe. Delaissant sur che passaige, que durant le chemin de lentry de la ville, cest a dire, la porte Cæsarienne ou Imperialle, iusques au Monastere de Sainct Michiel (ou illecques a este le Logis de sa Princeaulte, contenans ycelluy chemin deux mille deux cens pas ou plus, vng chascun pas prins & compté de cinq piedz Danuers ou Rom mains) ont estee en moins de terme de huit iours faictes, construyctes & esleuees (et le tout comme apartient) plus de quatres milles colomnes quarrees, que lon nomme pilastres, aux deux costez de la rue, en forme ou semblanche de vne belle & longue gallerie.

Quoy? sy tu auois veu, la incroiable multitude des ouuriers? trauaillans? painctres, architecteurs, ymaginiers, menuysiers, sijeurs, charpentiers, febures ou feronniers, & aultres ytieulx besongnant de la hache, du marteau, de la sie, du wymbrequin, lineal, compas, esquerre, leuier, au chizeau, espences, pincheau a la peinture, &c. iour & nuit trauaillans, a grosses sueurs, excitans ou admonestans lung laultre au trauail, menant bruct, courant cha & la comme formis, eulx esiouyssant a icelluy oeuvre, & souuent se entretenstant pour le pris ou coustaige d'icelluy.

O vray Dieu, quil y auoit moult de choses par tout a regarder, combien de chose pouoit on veoir, lesquelles estoient lourde, infassonnee matiere, propice pour vng tel oeuvre? O combien, quel nombre d'arbres de stranges terre, bois, cheurons, lambrilz, marrains, perches, &c. voions nous pour lhors puis cha, puis la mener, porter, charrier, trayner, sijer, rompre, fendre, planer, couper, pollir, constituans ou mettans toutes choses en son lieu.

Quandz barrilz de huille de lenuyse pense tu auoir este consumez & emploiet a vng tel oeuvre? car tout la pluspart de icelluy oeuvre, a este painct a lhuille. Qui polroit ou scauroit racompter la grandt quantite de lor battu, estaing, que lon nomme fœulle de batteur, que a este mis en oeuvre pour iceulx & innumeraux bastimentz? tant portes, theatres, archz triumphaux, eschauf faux, coulonnes, pilastres, armes, peintures, grans colloses ou ymaiges, artificieusement entaillees.

Quy est celluy, quy aussy ne tiendroit pour chose de grandt admiration, la grand quantite des grosses tronques de bois, les grans charges de terre, argille, & aultre matiere semblables, a tant grand nombre de grosses statues, ou collosses, que l'on a mis en œuvre.

Que diray ie de la quantite des drapz de linges, asscauoir, toilles, canevas, voilles, et aultres choses, quil a fallu pour (iceulx sy grandz bastimētz, archz, eschauffaulx) depaindre.

Quoy? que voulons nous plus? prendons quelq exemple icy, ou la, a quelque pieche ou bastimēt: A Larch triumphal des Geneuois, a este consumme (comme lon diet) seulemet en cloux .ijc. xxxiiij. florins Carolus, Auquel arch estoient besongnantz plus de .ijc. lxxx. personnes. Et passans oultre en euitant prolixite, les Allemans ont trouue au compte de leur Arch triumphal. xxxvj. mille piedz de asselin ou lambriz, sans le nombres des cheurons ou merrains quil a fallu auoir pour bastir vng tel triumphant Arch triumphal.

Or doncques puis que ie auois entreprins d'escriper, tant noble, tant admirable & triumphant appareil le tout curieusement & songneusement a la verite, & que double se presentoit au deuant de mes yeulx, a quy ie polroie descriptre ou dedier ycelluy tant magnifique triumphe (car che ne me sembloit estre chose licite ou bien seante, le dedier a homme quy y aye este present) Tu es celluy quy ma semble (O treshault, trespuissant, & redoubte Prinche pour le futur) seulement apartenir estre ycelluy triumphe singulierement descript & dediez, comme celluy quy ne ha este present a ytieulx triumphe, toy quy es de ycelle gloire Paternelle vray heretier & successeur.

Et che affin, que (touttes les fois que tu viendras a che lire) tu te puise persuader & estimer, auoir estez quandt & quandt ton pere, avecq Lemperreur ton ayeul, ensemble les deux Roynes tes tantes present a touttes ces choses ioyeusement triumphant, comme aussy le tien Pere a triumphe.

Receoipz doncques icelluy Triumphe fait a lhonneur de ton Pere,
& de par nous descript a ta haulte Magnificence, affin que tu
(comme present) le puise veoir a loeul plus clerement
& plus viftement, que ceulx quy y ont este
presentz. Nous ne doutbons nullement,
que tu ne le prengne (tel quil
est) en gre, & le tout
par ta Princialle
benignite.

A Anuers, en lan de nostre Seigneur,
Mille cinq cens &
cincquante.

La tresbelle, tresadmirable, & triump-

PHANTE ENTRÉE, DV TRES HAVLT, ET

trespuissant Prince Philipps, Prinche d'Espaignes, filz de

Lempereur Charles cincquiesme de ce nom;

en la triumphante ville d'Anuers,

Anno M. D. XLIX.



AN mille cinq cens quarante nœuf le dixiesme iour de Septembre, nostre treshault & tresredoupte Empereur, accompagniet de ses deux soeurs, asscauoir de Heleonore Royne de Franche, & Marie Royne de Honguerie, ensemble de son filz Philipps Prinches d'Espaignes, a moult grand et triumphant estat Imperial, yssant ou partant de Malines, a l'intention de venir vers la cite d'Anuers, est venu arriuer a vne petite ville nommee Liere, bastie, & situee au territoire de Anuers, sur la riuiere que lon nomme vulgairement la Nethe, tirrant d'icelle ville sans faire quelque seiour, vers sa noble & treffidelle cite d'Anuers. Mais peu apres midi le Prinche son filz (apres auoir circuy et fait quelque chemin a l'enuiron) est venu arriuer iusques a la Seignourie que lon dict en vulguaire Berchem, gisant enuiron a deux mille pas de ladicté cite d'Anuers.

Ores vous debuez scauoir, que entre la cite d'Anuers & ledict Berchem (tenant la Maladrie, cest a dire la maison lepreuse, & enuiron cent & cincquante pas des fossez exterieurs de la ville) a vne barriere, quy est la borne ou palle de la cite, & de ladicté barriere, tirant vers Berchem enuiron de cent pas sur le chemin de Malines a main gauche pres de la iustice, a vng grand champ estendant sa largeur vers ledict chemin de Malines, laquelle largeur est enuiron de cent & cincquante pas.

Sur laquelle champaigne Monsieur le Marquis d'Anuers, Monsieur l'Ampt man, ensemble tous les Seigneurs de la ville (a la venue de la magnificence du Prinche) auoient ordonne vne moult belle & triumphante armee de souldars en forme de bataille ou esquadrō, asscauoir enuiron de quatres milles souldars, tous hommes de guerre a leslite, prins toutteffois seulement de noz propres citoyens ou bourgeois, sans quelques estrangiers, quy toutteffois en ceste ville sont de grand numerosite.

L'ordre d'ycelle bataille ou esquadrō estoit remforchée de trois sortes de armures de guerre, asscauoir de picqueniers ou long bois, de haches ou hallebarde & wifflars, ensemble de hacquebutiers, le tout en la maniere comme sensuyt.

La forme de lordre de la bataille
ou esquadron.

I Celle bataille estoit de forme quarree, toutteffois plus longue que large, & tirroit la largeur (quy estoit le front de l'ordre) vers le grandt chemin, quy est le chemin par ou le Prinche debuoit passer.

De front estoient septante & vng souldars, asscauoir Picqueniers ou hal-
lebardiers, & sur les aesles aux deux costez sept hacquebutiers.

De longueur auoit cincquante deux rengees, que lon nomme en Latin, con
tubernia, & a chascune rengee ou contubernie (y comprins les hacquebutiers
aux costez des aesles) auoit septante et vng souldars, cincq de suyte faisant
chascuns rengees cincq fois septante & vng, portant en somme de 355.

La separation de la bataille.

P Remierement, auoit trois rengz de picqueniers de cincquante & sept
de front, et de cincq de suyte, ensemble sur les aesles a chascun coste sept
rengees de hacquebutiers, aussy cincq de suyte.

Secondement, suyuoit vng autre rengz de cincquante et vng hallebardiers
cincq de suytes ayans sur les aesles trois rengz de picqueniers, & cincq de suy-
tes, montant iusques au nombre de cincquante & sept.

Apres suyuoit trois rengz de picqueniers ou long bois de cincquante et sept
de front & cincq de suyte.

Apres suyuoint deux rengz de hallebardiers, asscauoir de cincquante &
vng defront, et cincq de suyte, ayant aux deux costez sur les aesles trois rengz
de picqueniers, et sept de hacquebutiers, aussy de cincq de suyte: Entre lesquel-
les deux rengees de hallebardiers marcheoient trois Portenseigne, ensemble
deux tabbours, deux phiffres, trois rengz de picqueniers de cincq de suyte a-
yant sur les aesles a chascung coste sept rengz de hacquebutiers, aussy de cinq
de suyte. Apres suyuoit .xij. rengz de picqueniers, asscauoir .lj. de front, &
.v. de suyte, ayant a chascun coste sur les aesles sept rengees de hacquebutiers.

De rechies suyuoit deux rengees de hallebardiers de .lj. de front, & de .v.
de suyte, entres lesquelles deux rengees auoit trois Portenseignes q̄ lon nomme
derniers ou exterieurs, aussy auoit chascung Portenseigne deux tabborins &
deux phiffres, avecq trois rengees de picqueniers de cincq de suytes, sept rengees
de hacqbutiers, sur les aesles de chascung coste, marchans aussy cinq de suytes.

Apres suyuoit derechies, trois rengz de picques ou long bois, .lvij. de front,
.v. de suyte, ensemble .vij. rengees de hacquebutiers, aussy marchans .v. de suyte.

Apres suyuoit vne rengee de hallebardiers, de .lj. de frōt, & .v. de suytes, avecq
trois rengees de picquiers, ou long bois de cincq de suyte, & sur les aesles a chas-
cun coste, sept rengees de hacquebutiers, aussy cinq de suyte.

Aprez suyuoint trois rengees de picqueniers ou long bois (& estoient les
derniers rengees) .lvij. de front & cincq de suytes, & sur les aesles a chascun
coste sept rengees de Hacquebutiers, aussy cincq de suyte.

Les dessusdictes sept rengees de Hacquebutiers, marchandz cincq de suyte
sont

sont nommées les aësles de l'esquadron ou bataille, mise & instituez pour la deffense & tuition des dessusdictz Picqueniers, Hallebardiers, Portenseignes, Tabbourins, & Phiffres.

Deuant ycelluy ordre marcheoient de front (quelque peu distans l'ung de lautre) quatres tabbourins, & quatres phiffres, deuant lesquelz tabbours & phiffres, marcheoient. xvij. hallebardiers comme guides de ladict'e bataille.

Aussy de chascun coste de la bataille auoit .vij. Nobles Gentilz hommes, mōtez sur beaulx destriers, lesquelz estoient chief ou cappitaine de la bataille.

La forme & liuree d'y celle gendarmerie.

En general yceulx souldars auoient tous pourpoinctz blancz, asscauoir les aulcuns de veloux, les aultres de drapz de soies, cōe de satin ou dammas.

Chausses descarlates rouges decoupees iusques au genoulx et embouffees de soie, asscauoir la cuysse dextre de soie iaulne, & la gauche de soie rouge.


Tous auoient pardessus leurs chief chapeaulx rouges, bien fin, & de bonne haulteur, et pardessus iceulx chapeaulx trois sortes de plumars, asscauoir blanc, rouge, & iaulne. Aussy portoient, tant picqueniers, que hallebardiers, au dessus d'yceulx pourpoinctz blancqz, asscauoir sur corps, brachz, & iambes, chascun vng harnois blancq, & bien polly, quy estoit chose moult triumpante a veoir. Aussy, les aulcuns d'yceulx, portoient (en lieu de chapeaulx) fallades, ou baccinetz, & par dessus plumes comme dessus est dict.

Les hacquebutiers portoient par dessus leur pourpoinct blancq, & chausses rouges, de beaux colletz, ou cuyrasses, de marroquin d'Espaigne, le tout bien & artificieusement decoupez, portas les aulcuns d'yceulx chapeaux de fine soie rouge, les aultres salades ou cabassetz, et trois sortes de plumes, comme dessus.

Les Portenseignes, Phiffres et Tabbourins, auoient de moult riches colletz, aulcuns de draps d'or, aulcuns de drap d'argent, aultres de veloux blancq, & les aultres, de fin marroquin d'Espaigne blanc, le tout bien bordez, & pourphilez, de fil ou pâssement d'or, aiants à leur rappieres, & poignals fourreaux de veloux artificieusement ouure & enrichy d'argent.

Apres estre icelluy esquadron ou bataille ordonne, ensemble les aësles, comme dessus est dict, Monsieur le Marquis est alle deuanchier ou allencôtre du Prince (en laissant son Lieutenant ou Escoutette, pres de ladict'e bataille) lequel nestoit guieres loing de la. Et apres toutes reuerences deue faictes, de par Monsieur le Marquis a mene nostredict Prince, au lieu ou estoit la bataille, laquelle bataille affin de estre bien veue de sa Magnitude, a (au moien de la conduict'e de Monsieur le Marquis) circuy toute icelle gendarmerie, soy admirant ou donnant merueille, comment tant de beaux perles de guerre (sans aulcuns estrangiers) se pouoient trouuer ou finer en vne telle ville. Et aprez avoir circuy lesdict esquadron, sen est alle (en delaissant illecq toute icelle gendarmerie) iusques a la barriere cy dessus mentionnée.

Vng Arch triumphal hors de la ville A LA BARRIERE PREDICTE.



Haulteur
xxvij.
piedz.
Largeur
xxx.
piedz.



Laquelle barriere estoit basty de par la ville vng moult bel & sumptueulx Arch triumphal, aiant deux faces, cest a dire, aussy riche a veoir d'ung coste q de lautre: et aiant deux entrees ou passages. Icelluy eust este sumptueux & triumphant, syl la commodite du tempz eust permis d'estre accompli ou paracheue, car lon n'en trouue guieres de tel forme, mais a cause de la celerite du tempz ne poeult estre accompli. Chascune entree estoit large de .xij. piedz, & de haulteur .xvj. piedz. Les pilliers quarrez ou pillastryes, contenoient de largeur .ij. piedz. L'arch tottalemēt cōtenoit en largeur .xxx. piedz, en haulteur .xxvij. piedz.

De la premiere face au dessus de chascune entree dessoubz la Cornice ou mollure, estoient deux manieres de armes despainctes, l'une estoient les armes du Marquisat du sainct Empire, & lautre les armes de la ville d'Anuers, entres lesquelles armes estoit vne abacus ou tabbleau, auquel estoit commençiet a escrire en Latin, mais au moiend de la celerite du tempz, pas encoireacheue, telles parolles : SIT TIBI MAGNE O PHIL. &c. Qui vauldt a dire en la langue Franchoise:

Che te soit prospere (o treshauldt & trespuissant Prinches)
que che iourdhuy en che lieu (auœcque grande benevolence
du pœuple) tu soie vray possesseur hereditaire du Marquisat

du

du sainct Empire, Iadis institué par l'Empereur Iustinian, & par ses antecesseurs iusques a l'heure presente (par droict tiltre) entretenu. Au moien duquel presaige (& preposé fondement) debuons esperer q̄ ensuyuras le tien Pere en succession Imperialle.

DErriere cedict Arch auoit a chascun coste (mais toutteffois, pour les raisons cy dessus mentionnees imparfaictes) quatres colonnes quarrees ensemblez leur architrabs, cappiteaulx, aornees de verdure q̄ lon dict gioie pendantz aux summittez des capiteaulx entre chasque colonne. Sur chascune de ces colonnes estoit apprestez de mettre (mais a cause de la celerite delaissee) aulcuns des plus anciens et plus congneux Marquis du sainct Empire iusques a Charlemaigne, lesquelz estoient .vij. en nombre. *Aſſauoir:*

Anſelbert, premier Marquis, filz de Sigibert, iadis Duc de Franconie.

Aernoul, second Marquis, & filz du predict Anſelbert.

Saint Aernoul .iii. Marquis, filz du dessusdict Aernoul.

Archiles, quatriesme Marquis, filz dudit Saint Aernoul.

Pepin, Marquis cincquiesme, filz du dessusdict Anchise.

Charles Martel, Marquis sixiesme, filz dudit Pepin.

Pepin le petit, septiesme Marquis, Roy de Franconie, filz dudit Charles Martel.

Charles le Grandt, huitiesme Marquis, Empereur de Romme, Roy de Franche, filz du dessusdict Pepin le petit.

Apres lesdictes .vij. colonnes aupres de la Maladrie ou maison lepreuse, estoit bastié (mais pour les raisons precedentes imparfaictes) vne petite chappelle, faicte en maniere d'ung temple rondt non guieres grandt, mais pour sa forme anticq̄ moult bel a veoir. Et sy ce n'estoitacheué, ne t'en donne fascherie, car ledict Arch triumphal, les .vij. colommes, & celluy temple, &c. nestoit ouuraige que de deux iournées.

La possession & reception du Prince.

Fstant doncques nostre tresdesiré Prince paruenu iusques a la barrière cy dessus mentionnée, Messeigneurs de la ville, tant de la Iustice qu'autres, ensemble grosse multitude des Spirituelz, ou gens d'Eſglises, avecque tresgrande & deue reuerence, le ont illecq treshumainement receipt, & che d'ung vray & ardent zele, congneu pour leur Prince & futur Seigneur hereditaire, luy liurant en ses mains les clefz de la cite.

Et passant le dessus mentionné Arch triumphal, entre les colonnes, est venu iusques audict temple, ou illecque (& che avecque vng grandt esiouysemēt de pœuple) a prins possessions du Marquisat du Sainct Empire, de la iurisdicition de la tresnoble ville d'Anuers, & de toutes ses apartenances.

Laquelle chose faicte, & sa Magnitude estre audie & temple quelque peu reposée, voicy venir de la ville (ensemble tous les Seigneurs, tant de la Justice, que aultres) tous Officiers, Nobles, Gentilz hommes, Bourgeois, et Marchandz a moult grandt multitude, tous a cheual, en pompeuse vesture, et en moult belle ordre sortans de la ville, venantz tous au deuant de nostre tresdesiré Prince. Lesquelz apres toutes singulieres & deues reueréces (vng chascun de sa part passant deuant sa haulte Magnitude) sont de rechiesf retournez vers la ville, chascun en son ordre, comme sensuyt.

L'entrée des Citoiens en la ville.

Premierement ont cheuauché en belle ordre les Citoiens de la commune, asscauoir les plus honestes & notables Bourgeois, Gentilz hommes, Marchandz, Mestiers, Confraries avecq leurs iurez & anciens, tous en grans pompes iusques au nombre de .iiij^e.

Deuant lesquelz cheuauchoient (comme guides) aulcuns chiefz de la Bourgoisie avecq' aulcuns iurez a che ordonnez. Les chiefz de la Bourgade institué par la loy, sont au nombres de quattres, & aultres que lon nomme VVicmesters, semblablement instituez de par la ville .xxiiij. quy sont (a cause que la ville se part en .xij. bendes ou VVicques) de chascune bende deux.

Ilz estoient tous accoustrez en couleur de viollet, cest asscauoir de Casiques a manches longues iusques aux genoux, vng chascun selon son degre, les aulcuns de veloux commun, les aultres de satin de soie, & les aulcuns de veloux cramoisy, & aultres de moult beau dammast.

Tous auoient bonnetz de veloux noir, les aulcuns bordez de passemant d'or, les aultres d'argent, comme aussy beaucoup des vestemens estoient.

Aprez iceulx .cccc. cheuaux marchoient incontinent les Marchandz d'estranges Nations: asscauoir, ceulx de Louque, ceulx de Millan, Anglois, Espaniolz, Osterlins, et Allemans: car ceulx de Portugal, de Florence, et de Gennes (combien que oultre mesure ilz feussent pompeusement accoustrez, touffois pour certaine preeminence de marchier lung deuant laultre) ne voulurent marchier: parquoy ceulx de Luca ont premier commenciet a marchier vers la ville.

L'entrée des Marchandz de Luca.

Iceulx estoient iusques au nombre de seize, sans les lacquais quy estoient iusques au nombre de quarante, triumphamment et magnificquemēt montez sur belles hacquenees. L'accoustrement supperieur estoit court, manches estroites, et tout entierement de veloux cramoisy, couleur de viollet, portans chapperons de satin cramoisy aussy de couleur mouree ou violette, le saie aussy de veloux cramoisy de mesme couleur tous (asscauoir la robbe de dessus et le saie) bordé de bordure d'or que lon diet passemēt. Les manches de la robbe de dessus estoient decouppées, & les tailles ou coupures affichees de boutons d'or.

Ilz auoient chascun sur son chief bonnetz de veloux violet de couleur cramoisine, esmailliez de plusieurs perles & boutons d'or.

Le hault de chaussez aussi de veloux cramoisy, de mesme couleur, decoupees a longues coupures, bouffees & plaines de satin cramoisy de mesme couleur bien flottant, & estoient les taillures bordees de passelment d'or, & le bas des chaussez estoit de moult belle & riche escarlate rouge.

Les souliers decoupez, chaintures, & fourreaux des rappieres toutes de veloux cramoisy & couleur de violet. Les croisees & aultres fers apartenantz auxdites rappieres, &c. estoient toutes battue en or.

Les seelles, sengles, & la couverture des cheualx pendant quasy iusques a terre, et aultres choses a che requises, estoient tous de veloux violet cramoisy, a bordures d'or, & franges entremeslees de soie violet par tout triumphement aornees. Les esperos, estriefs, mors, et aultres telz choses cheualinnes, reluysoit tout en or. Tous leurs lacquetz iusques au nombre de .xl. come dessus, estoient en ce point.

Tous auoient bonnetz de veloux violet cramoisy, bordez de passelmentz d'or, avecq blanches & rouges plumes par dessus. Le pourpoint de satin de soie blanche, par tout decoupe, remply & flotant de soie blanche.

Colletz de veloux cramoisy violet, et par tout bordez de passelmentz d'or.

Le hault de chausse estoit de veloux cramoisy rouge, decoupe, & richement picquiet de soie rouge, & remplie de soie blanche.

Le bas de chausse, cest a dire, au dessoubz du genoulx, estoit de fine escarlate rouge. Ceintures & forreaux de rappieres, estoient de veloux cramoisy violet: croisees, pommeaulx et manches despees, & aultres telz semblables estoient dorrez moult richement.

Aprez lesquelz a cheualche la Nation de Millan.

L'entree de la Nation de Millan.

ICeulx estoient en nombre .xvij. sans leurs lacquetz, qui estoient iusques au nombre de .xxxvij. vng chascun d'eulx montez sur beaux & riches Genetz d'Espaignes, en moult bell & triumphant ordre, asscauoir, deux a deux. Et estoient de telle vesture comme sensuyt, asscauoir:

Tous auoient bonnetz de veloux cramoisy violet, avecq grande multitude d'esguillons d'or, plumars violet d'austreche par dessus, ensemble de tresriches medailles d'or.

La robe de dessus estoit de veloux cramoisy violet a manches estroictes decoupee & fouree, asscauoir de satin de soie violet, par tout bordee de trois bordz ou passelments d'or, & icelles tailles enrichie de moult riches bouttons d'or.

Le saie a manches, passant les fentes des manches de la robe de dessus, estoit aussi de satin cramoisy violet, par tout enrichy & borde de trois passelments d'or.

Le bas de chausse estoit de finne & riche escarlate viollet, & le hault des chaussez de veloux cramoisy violet, decoupee & richement ouuree de fil d'or.

Les manches, croisees etc. des rappieres, richement dorrees, estoient artificiellement ouurees de moult bel ouuraige a maniere de damast, les ceintures & fourreaux d'espees de fin veloux cramoisy violet.

Tous les accoustrementz de cheualx, sicomme briddes, seelles, poictail, &aultre telz semblables estoient tous de veloux cramoisy violet par tout enrichy de frenge d'or. Les brouddequins estoient de marroquins d'Espaigne, esperons, estriefz, mailles, frains &c. richement dorrez.

Iceulx dix & sept auoient chascun pres de soy deux vistes & legiers lacquetz courantz, bien equipez, montant ensemble .xxxiiij. tout lesquelz xxxiiij. laquetz estoient equipez comme sensuit.

Affcauoir bonnetz de veloux incarnal, & par dessus, plumars de deux couleurs, a dire blancq & incarnal.

Pourpoinctz de satyn cramoisy violet, decoupez & remply de soie blanche flottant, chose digne d'estre moult regardee.

Chausses decoupees, lesquelles estoient de drap de couleur incarnalle et fourree ou remplie de soie blanche.

Souliers, fourreaux, ou gainnes des rappieres, poignals, & ceintures, de veloux incarnal. Et les manches, croisees des rapieres, & poignals, ensemble les mailles des ceyntures moult richement dorrees.

Apres lesquelz marchoient les Marchandz de la nation Angloise.

L'entree de la Nation Angloise.

ICelle Compaignie ou Nation estoit moult triomphante, & en bel ordre equipée de riche monture deux a deux, aiant pour vesture, saie de veloux violet, bordez de fil d'argent, selon la semblanche des vndes de la Mer, ayant chascun vne moult riche chaine d'or, deux fois autour du col.

Leurs chapeaux estoient de veloux cramoisy viollet, bordez a l'enuiron de cordons d'or, & par dessus enrichiz de moult riches medailles d'or, & de plumars blancqz.

Leurs pourpoinctz de viollet satin cramoisy, et les hault de chausses cest a dire au dessus du genoul, estoit de veloux violet & decoupee, remplie plaine de soie cramoisine, & bordees a cordons d'argent selon les saies.

Tous les aornementz des cheualx estoient de veloux violet, bordez richement de verd passelment argentez, aiant vng chascun cheual sur sa teste plumar de deux couleurs, affcauoir, vng vert & vng blanc.

Rapieres, & poignals richement dorrez, aiant gainnes ou forreaux de veloux violet.

Vng chascun deux auoit deux paiges, vestu et equipez en satin de soie blanc menu decouppé, & pardedans fourrez de satin de soie verte, richement argente, ayans bonnetz de veloux & par dessus vng plumars vert, portans dagues richement et magnificquemēt dorrees, ensemble ceyntures blanches, et fouliers.

Ladiete Nation Angloise a icy en la ville en moult grandt reuerenche son superieur, lequel est tenu pour gouuerneur, nommé Monsieur Iehan Sturgion, lequel tant pour sa vielleſſe que pour la prudence de ſa personne, eſt repute & tenu pour homme de grandt vertu, lequel comme chief et ſouuerain de ladiete Nation marchoit deriere, monté ſur vng moult beau & triumphant cheual d'Engleterre, portant vne robbe moult longue de violet cramoify, fourree de foie crammoifine de meſme couleur, a manche couppee, et richement garnie de boutous ou mailles d'or, ayāt deuxfois entour ſon col vne tresfriche chaîne d'or, bonnet de veloux noir, & richement garnis desguillons d'or, ſon faie au desſoubz de ſa robbe longue auſſy de veloux noir, & ſon pourpoinct de veloux crammoify, ſon cheual richement & triumphamment equipez de violet cramoify, partout garnis de cordons d'argent & verte frange de foie. A chasque coſte de ſa perſonne marchoient trois lacquetz bien equippez, & au derriere auoit trois paiges montez ſur beaux cheuaux accouſtrez de la teste iusques au piedt en veloux blancq, decoupez & fourrez de foie verte, & richement pourfillet de fil d'argent, ayant vng chascun de eulx au deſſus de ſon bonnet blancq vng plumars vert.

Tous les cheuaux de ceste Nation estoit en nombre .xxxvij. & lacquetz iusques aux nombres de .lxvj. montant en nombre de cent testes. Apres laquelle Nation marchoit la Nation d'Eſpaigne.

L'entree de la Nation d'Eſpaigne.

ICeulx estoient iusques au nombre de cincquante, montez triumphamment ſur beaux genetz d'Eſpaigne. Lesquelz auoient tous en lieu de robes ſupperieure, cappes d'Eſpaigne de violet cramoify fourree & garnie de foie blanche, & au deſſus bordees a cordons d'argent de trois doigtz de large.

Au deſſoubz de la cappe, par deſſus le pourpoinct, colletz de violet cramoify, decoupez, et fourres de foie blanche, et au dehors ſur le veloux richement bordez a cordons d'argent de la largesse de trois doigtz, & les tailladdes par ou parroiffoit la foie blanche, estoient affichees et laſchees de moult riches boutons et esguillons d'or. Plusieurs d'entre eulx auoient deſſus le collet ſur la poitrine de moult riche perles & aultre pierrierie. Deſſoubz lesdictes cuyrrasses portoient pourpoinctz de foie blanche & drap d'argent, decoupez, et le tout garnis & eſtoffez de bordure d'or & d'argent. Auſſy ilz portoient chaſſes blanches de veloux decoupees, embouffees & garnies de toile d'argent ou foie blanche. Tous auoient les chiefz couuers de bonetz de veloux noir, richement garnis & eſtoffez de grandt nombre de mailles ou boutons d'or, & par deſſus plumars blanc.

Leurs Gennetz estoient triumphament equipez, les aulcuns de violet cramoify, aulcuns d'autre moult belle couleur, & les aulcuns de drap d'or, & le tout eſtoffez de moult riches boutons d'or, ensemble bordez de bordure d'or & d'ar-

gent, vng chascun a sa phantasie, car en che ne tenoient ordre aucune.
Aussy chascun deux auoit deux lacquetz, montant par ensemble iusques au
nombre de cent, tous equipiez comme sensuyt.

Le pourpoinct estoit de soie blanche, decoupez comme dessus, fourrez &
bouffez par dedens de soie incarnalle. Dessus yceulx pourpoinctz, portoient
cuyrasses de blancq marroquin d'Espaignes, triumphāment decoupees. Leurs
bonnetz, souilliers, gainnes, ou foureaux d'espees, estoient de veloux blancq, &
au dessus du bonnet, portoient vng plumars d'ostruce de couleur incarnalle.

Apres laquelle Nation, marchoient les Oostrelins, equipiez comme sensuyt.

L'ordre des Oostrelins.

I Ceulx estoient cincquante hommes a lesleute, tous bien montez sur beaux
& fors cheuaulx, ayant vng chascun de eulx vng lacquay, cheuaucheant
en ordre deux a deux. Le vesteinent de dessus, estoit de viollet cramoisy
a manches fronssees, longues iusques au genoux, ensemble vng chapperon de
viollet cramoisy de mesme, pendant dessus les espaullles & par tout bordez de
bordure d'argent. Leurs chapeaux estoient de veloux violet, & par dessus
chappeletz d'argent, a la maniere d'allemaigne, sur lequel auoit deux couleurs
de plumars, asscauoir l'ung rouge & lautre blancq.

La ferraille des rapières, estoit moult sumptueusement dorrez.

Les gainnes des espees, & féeles a cheuaulx, estoient couuertes de violet cra
moisy. Et toute la reste des aornementz apartenant a cheuaulx, tant derrie
re comme deuant, estoit richement garnis, tant en bordure que franges, entre-
meslee de blancq & rouge. Les broddequins de marroquins noir.

Les lacquetz estoient tous equipez, les aulcuns en soie iaulne & blanche, &
les aultres en rouge & blanche.

Apres lesquelz marchoit la Nation Germanique.

L'entree ou ordre des Allemans.

I Ceulx estoient tous montez sur grandtz & puissantz cheuaulx d'Alle-
maignes. Auoient pour vesteinent superieur ou robe de dessus, Casaque a
manches estroictes, fendues, ou ouuertes deuant, longues iusques aux genoulx,
auecq' vng rabbas, ou collet abbatu, enuiron de largeur de trois doigtz. Icel-
les Casaque estoient de violet cramoisy, bordees de riche bordure, asscauoir de
passement d'argent enuiron de poulce large.

Leurs pourpoinctz estoient de violet cramoisy, decoupez & fourrez de mes-
me soie cramoisine, & richement picquez de soie violette.

Sur leur chief portoient chapeaulx de veloux cramoisy couleur de viol-
let, richement garnis et estooffez de cordons d'argent, ayant de mesme vne brid
de iusques au dessoubz du menton, Au dessus desdictz chapeaux portoient de
beaulx plumars pendans, ensemble de moult riche medaille d'or.

Le hault des chausses estoit de violet cramoisy decoupez, & fourrez de soie blanche, brouddequins de marroquins d'Espaigne violet. Rappieres, cest à dire pommeaux, & croisees, richement aornees de moult belle d'orrure.

Les briddes a cheuaulx, comme esperons, estriefz, &c. tous d'argent, fourre aulx ou gainnes d'espees, ceintures, seelles, sengles, &c. tous de violet cramoisy. Vng chascun d'eulx auoit vng lacquay, equipé ou accoustré, asscauoir pourpoinct de soie crammoisie viollet, et bordé de mesme, et par dessus vng collet blancq, de marroquin d'Espaigne par tout decoupez a la maniere de gens de guerre. Au deuant d'iceulx marcheoient a cheual (comme Vassaulx ou subiectz a l'Empire) xij. trompettes de par la M. IM. vng chascun montez sur beaux & riches cheuaulx tous equipez en dammas violet. Banieres aux trompettes pendantz, estoient de mesme dammas bordees a l'enuirō de frenges d'argēt.

Ilz estoient en tout iusques au nombre (comprins iceulx. xij. trompettes & deux tabbourins) de .lvj hommes a cheual, vng chascun ayant son lacquay montant iusques au nombre de .C. xxvj. testes.

Sensuyt l'ordre de Messieurs de la ville, ensemble des Officiers.

Mais auant que de proceder plus oultre (affin que riens ne soit de par nous delaissiet sans estre descript) nous voulons icy declarer par maniere de incident, en quel triumphe ou pomposité, les Geneuois, Florentins, & Portugalois, estoient richement equipez, a l'intention de marcher, avecque les aultres Nations. Mais au moien q entre ceulx de Portugal, Anglois, sembla blemēt entre les Florentins et Geneuois, (soubz correction toutteffois de ceulx que nous debuons icy nommer les premiers) estoit leuez quelque different, assca uoir, lequel debuoit avoir la preeminence de marchier deuāt. Et affin d'obuier aux inconueniens, ou dangiers, quy s'en fussent ensuyuy (quy eust este cause de donner trouble ou empeschement en icelluy triumphe) par commandement de la Maieste Imperiale leur fust expressément deffendu de ne marchier.

Lesquelz eussent marchiet en la maniere comme sensuyt. &c.

La preparation des Portugalois.

I Ceulx estoient preparez ou equipez, iusques au nombre de .xx. hommes, de robuste fachon, bien montez sur beaux cheuaulx, ayant chascun Gentil homme par soy, deux lacquaiz, monte par ensemble au nombre de .xl.

Montez estoit triumphamment vng chascun d'eulx sur beaux Gennetz d'Espaignes, ensellez & senglez &c. tous de violet cramoisy, bordez autour de passementz d'or : brides, esperons, estriefz, ensemble la ferrerie des espees, toutes richement d'orrees. Fourreaux, ou gainnes d'espees, & souliers, tous de violet cramoisy. La robbe de dessus, estoit de viollet cramoisy, fourrée de soie cramoisie, dehors & dedens, richement bordée de passement d'or.

Vng chascun d'eulx auoit entour son col, vne tresfriche & moult belle chaîne d'or. Le pourpoinct estoit de soie cramoisie, decouppé, & fourré, de drap d'or, sy que cestoit chose moult riche a regarder, bordez de bordure d'or, richement garniz ou estoffez de bouttons & esguillons d'or, entremeslez de grandt multitude de rubis.

Le bonet estoit de violet cramoisy, estoffé & garny de moult grandt nombre de diamans, & aultres pierres precieuses, quy estoit chose de moult grand pris, estimation, & excellente a regarder.

Le hault des chausses estoit rouge, de veloux cramoisy, subtillement decouppé, fouré & embouffé de drap d'or & satin de soie noir entremeslez, bordez au tour de bordure d'or.

Le bas des chausses asscauoir au dessoubz du genoul, estoit de moult belle es-carlatte rouge. Prestz estoient a marchier deux a deux.

Quandt aux lacquaiz ilz estoient tous equipiez, asscauoir de cuyrasses, bonnetz, gainnes, ou fourreaux d'espees de soie blanche.

Le bas de chausses estoit de drap verdt.

Le hault des chausses au dessus du genoil ensemble les souliers de soie verte.

¶ Lesquelz (non obstant quilz ne aient marchiet a l'entrée du Prinche) toutteffois se sont presentez & demonstrez en sa presence le lendemain, quy estoit chose moult riche & triumphante a veoir.

La préparation des Geneuois.

DE la Nation Geneuoise auoit iusques au nombre de .xv. hommes, & .xxx. lacquaiz ou courriers, moult richement equipiez en la maniere que sensuyt.

Le Consul, ou principal de la Nation, ensemble deux Conseilliers, estoient montez vng chascun sur hacquenees, & la reste sur beaux genetz d'Eſpaigne.

Le Consul cheuauchoit entres iceulx predictz Conseilliers, & estoit la couverture de sa hacquenee de violet cramoisy pendant assez pres de terre, beaucop plus longue que les couvertures des Conseilliers, lesquelles couvertures estoient richement & pompeusement estoffees a lentour de cordons d'or retors.

Le vêtement de dessus, estoit vng manteau a manches, fait a la mode Franchoise, avecq vng collet abatus, lequel estoit entierement de violet cramoisy, fourré par dedens de moult riche drap d'or, a manches fendues ou ouuertes, af fin de passer le brach, attaché de boutons d'or.

Le Consul, ensemble les deux Conseilliers (demonstrant plus grandt grauite) tenoient les manches aux brachz. Mais les aultres ensemblement auoient la manche du brach droict, attaché a l'espaulle.

Le faie estoit de pareil violet cramoisy, sans manches, ouuert sur la poictrière, ferme au col dung esguillon d'or.

Le pourpoinct estoit entierement de drap d'or.

Le hault des chausses estoit aussy de drap d'or fin, a longues coupures iusques aux genoulx, fouré & bouffé de mesme drap d'or.

Et le bas des chausses estoit de moult bel escarlate rouge.

Le bonnet estoit de veloux noir. Broddequins de marroquin d'Espagne blancq decoupez, auprez du genoul richement brouddees de drap d'or fin.

Toutte la ferrerie des espees richement dorree. Gainnes ou fourreaux des espees de veloux noir. Ceintures de violet cramoisy. Esperons & estriefz, noirs, a fermail dorrez. Tous che quy appartient au cheual, estoit de violet cramoisy, Mais les seelles (combien que se fussent de mesme veloux) estoient richement estoffez de cordons d'or.

Leurs Lacquais ou courriers estoient equipez en ceste sorte.

Le bonnet estoit de veloux blancq, & au dessus vne plume rouge.

Le pourpoinct estoit mi-partis de veloux, asscauoir blancq & rouge, & enerué de enerueure d'or, ouuert deuant, decouppé & fourré de drap d'or.

Le hault des chausses estoit mi-partis de veloux blancq & rouge decouppé a longues tailles, a bordure d'or au dessus, & fourré de drap d'or.

Les basses chausses estoient rouge & blancq mi-parties. Les gainnes d'espees de veloux noir : croisees ou pommeaux d'espees, dorrez. Ceintures, de soie rouge, & souliers de veloux blancq.

Vng chascun d'eulx portantz le chapeau de son maistre, qui estoit de veloux noir.

D'iceulx trente Lacquais ou courriers marcheoient les six au deuant du Consul & deux Conseilliers, & les .xxiiij. restans marcheoient a coste des aultres cheuaulx.

Il estoit ordonné, que deuant iceulx six Lacquais ou Courriers, deuoient marchier a cheual, quatres petitz paiges, equipez a l'anticque de veloux rouge & blancq, montez sur beaux cheuaulx de pris, sans seelles & esperons.

Le blancq & rouge signifie entre eulx, les armes de leur Patron S.Ieorge.

Les apprestemens des Florentins.

Les apprestz de ceulx de Florence estoit tel: Premierement estoit ordon nez, que quatres Lacquais ou courriers marcheroient deuant equipez, en sorte que cy apres sensuyt:

Ilz auoient bonnetz de veloux cramoisy, & au dessus plumars blancz.

Le pourpoinct, faict a maniere de collet, de rouge soie cramoisy, decouppé & fourré de mesmes couleurs.

Le hault des chausses de rouge satin cramoisy, decouppé & fourré de soie rouge, Le bas des chausses estoit de moult belle escarlate rouge.

Souliers, & fourreaux des espees quilz portoient, estoit de veloux cramoisy rouge. Ceintures de veloux iaulnes, a esmaillons d'orrez. &c.

La ferrerie, asscauoir, croisees, pommeaux, &c. des espees, estoit tresbien & tressrichement dorree.

Apres iceulx estoit ordonnez de suuir & marcher en ordre (l'ung apres l'autre, vng chascun cheuauchant seul) six paiges de l'age de .x. ou de .xvj. ans, montez sur moult beaulx cheuaux de pris, & sans selle, mais auoit vng chascun en lieu de selle vne couverture blanche de satin de soie, poursemez de fleur de Lilz de soie rouge, & artificieusement ouuree, signifiant (selon leur interpretation) les armes de Florence.

Icelle couverture estoit toute enuironnee de frenges, & drommons de soie, entremeslee de fil d'argent.

Et au deuant la poictrine des cheuaux, pour fermure de ladicte couverture pendoient de grosses houppes de soies longues enuiron de demie audne.

Vng chascun cheual auoit la teste couverte, de soie blanche, ensemble vne fleur de Lilz de cramoisy rouge, ensemble vng grand plumars en semblance de fleur de Lilz au dessus.

La bride de vng chascun cheual, estoit de soie torsse ou lachée.

Iceulx paiges estoient equippez a l'anticque, le corsaige de dessus estoit de drap d'argent, le tout enrichy de passementz d'or, large de deux doigtz lung de laultre. Les manches estoient faictes en forme descailles, de soie rouge cramoisie, bordée a l'environ de passement d'or.

Le corsaige dessoubz asscauoir les pliz estoit aussy formé descaille, vng petit de plus grande sorte que les aultres, selon la proportion de la corpulence.

Le pourpoinct estoit de soie cramoisie.

Le hault de chausse au dessus du genoul estoit de veloux cramoisy & decouppé, fourré de satin cramoisy, & bordez de bordure d'or.

Le bas des chausses estoit de moult belle escarlate rouge.

Les broddequins du pieds iusques enuiron le mittans du genoulx estoient moult triumphamment enrichis de drapz d'argent, lesquelz broddequins (car ilz estoient ouuers sur la greue de la iambe) estoient liez de lieure d'argent, et auprez du genoulx, estoit richement & pompeusement erigé vne moult belle & artificieuse teste de Lion.

Vng chascun d'eulx auoit sur son chief vng drap d'argent, torsen morische, & triumphamment faict a l'anticque, portantz par dessus vng timbre de drap d'or, enuironné de franges d'or, & par dessus vng plumar rouge, en forme de vne moult belle & riche fleur de lilz.

Apres lesquelz six paiges, & quatres Lacquais dessus mentionnez, estoient en ordre & prest a marchier avecq les aultres Nations. xv. hommes, vng chascun d'eulx montez sur beaux Genetz d'Espaignes, suuyant lesquelz debuoit marchier le Consul, (quasi comme ferrans l'ordre) de la prenominee Nation, asscauoir Messire Nicolas Rondinelli, a dextrez de deux Conseilliers de ladicte Nation.

Vng chascun d'euylx portoit, pour robe superieure, vng tresfriche, & sumptueux vescement a manche, de riche violet cramoisy, le tout entierement fourrez de moult beau & reluisant drap d'argent, bordez a l'enuiron de passement d'or.

Non obstant que l'accoustrement du Consul, ensemble des deux Conseilliers, estoient differetz des aultres, car ilz estoient entierement fourrez de drap d'argent frize a trois renges, aussy bordez a l'enuiron de passementz d'or.

Les manches d'yceulx vescemens estoient du hault en bas decoupees & bordee de passementz d'or, attachees icelles coppures ensemble a beaux & riches esguillons ou boutons d'or, & le tout subtillement ouurez a la maniere ou fashion de poinctes de diamans. Le saie estoit de satin cramoisy, couleur de viollet, avecques grandes taillades sur la poeulrine, lesquelles taillades ou coupures estoient rattachees de boutons ou mailles d'or, come dessus est dict.

Le pourpoint estoit de soie cramoisie rouge, aussy decouppé, fourré, & embouffé de taffetas cramoisy rouge.

Portant vng chascun deux a son col vne moult riche chaine d'or.

Le bōnet estoit de veloux noir, garny & estoffe tresrichement de mailles d'or.

Le hault des chausses estoit de veloux cramoisy violet, decouppé a longues tailles, & remplie de soie cramoisie.

Le bas des chausses de moult belle escarlate rouge.

Ilz portoient broddequins de marroquin d'Espaigne, aussy decoupez, de sorte que par icelles taillades ou coupures l'on pouuoit parfaictement discerner les chausses d'escarlates rouges.

Eſperons, eſtriefz, rappieres, & mailles, moult bien & richement d'orréz.

Fourreaux ou gainnes d'eſpees, estoient de veloux cramoisy violet.

La feelle, estoit couuerte de veloux noir, bordee a l'enuiron de passement d'argent, ensemble toute la reste de mesme veloux, avecques grandes quantitez de bouppes, & franges de soies entremeslees de fil d'argent.

Encoire estoit ordonnez q̄ quatres Lacquais ou courriers deuoient marchier deuant chascune paire desdictes hommes, Exceptez que deuant le Consul & deux Conseilliers, en auoit. viij. & autant derriere, le tout accoustrez et equipez comme dessus.

En quelle sorte predicte estoient icelles quatres Nations cy dessus nommez, prestz a marchier & de aller avecque les aultres Nations au deuant du Prinche, n'eust este, que par commandement ou prohibition Imperiale che leur fust deffendu.

L'ordre de Messieurs de la ville, ensemble des Officiers.



Estat des Officiers de la ville est duple, ou de deux sortes, asscauoir l'estat superieur & l'estat inferieur.

L'estat superieur est de Messieurs de la ville, asscauoir Monsieur le Marquis, l'Ampman, l'Escoutette, deux Bourguemaistres et .xvj. Escheuins.

L'estat inferieur est celluy qui est institué par Bourguemaistres & Escheuins, auquel est requis comme sensuyt, asscauoir XII. Conseilliers, deux Doiens Iurez de la halle aux drapz, ensemble les Escheuins d'iceulx que l'on nomme en vulgaire Oudermans, Escheuins sur les orphenins, que lon nomme Maistre des orphenins, Escheuins de la Paix, nommez Paysmakers ou Mediateurs.

Soubz le seruiche des Bourguemaistres, & Escheuins, sont telz Officiers comme sensuyt: asscauoir

Tresoriers de la ville.

Pensionaires de la ville.

Recepueurs de la ville.

Greffiers de la ville.

Les Secretaires. Sans autre grande multitude, lesquelz seroient trop long a racompter, comme

Esgardz de la ville.

Examineateurs.

Sergeantz a la courte verge.

Messagiers.

La multitude des Aduocatz & Procureurs, lesquelz sont du nombre de l'estat superieur ou inferieur iusques au nombre de environ .CC.

Tous lesquelz vng chascun montez sur beaux cheualx ont commenciet a suiure les Allemans, & marcher en forme comme sensuyt

Premierement ont commenciet a marcier la multitude des Aduocatz, Procureurs, Grossioeurs, ou Clercz des Greffiers, ou Secretaires.

Secondemēt marchoient les Paixmakers ou Mediateurs dessusdictz, les Maiſtres des orphenins, les Doiens, ou Escheuins de la drapperie, chascun ayant son Greffier.

Tiercement les Messagiers de la ville, Courtes verges, Examineateurs, Secretaires, Greffiers, Recepueurs, & Pensionnaires.

Tous lesquelz portoient pour robe superieure couleur de damas viollet de raisonnable longueur, a manches estroictes: le saie, & bonnet estoit de veloux noir: & estoient les cheualx de iceulx couuert de vngne couverture noire pendant assez pres de la terre.

Apres lesquelz marchoient les Tresoriers, les vieux Escheuins, (car les Conseilliers marchoient deuant avecq les Citoiens) .xvj. Escheuins, les deux Bourgue-

guemaistres, l'Escoutette, l'Ampman, & Monsieur le Marquis.

La robbe supperieure estoit differente des aultres dessus mentionnées, car ce stoit veloux crammoisy violet, et selon leur estat vng petit plus longue que les aultres : le saie, & bonnet de veloux noir, & la couverture aux cheuaux comme dessus.

Monsieur le Marquis marchoit droict deuant le Prinche, tenant en sa main (selon la coustume Ancienne de ceste ville) vne longue verge d'espines, figurant la verge de iustice.

De tous ceulx cy dessus nommez estans a cheual, estoient iusques au nombre de .VIII^c. LXXIX. hommes.

Des souldars en l'esquadron ou bataille estoient enuiron .IIIIM.

Les courriers ou lacquais .IIIC. XVI.

Somme tottalle .VM. CC. XCV.

L'entrée du Prinche.



Pres estre marchiet tout ce peuple vng chascun en son ordre comme dict est, la haulte Magnitude du Prinche accompagné de innumerable multitude, de grans & puissans Princes, Seigneurs, Ducz, Contes & Barons, telz cōme bien appartenloit a sa haulte Magnificence, a commenciet a suyuir & marchier auant. Lequel estat passé, l'on a incontinent veu suyuir vne tripple Maieste, asscauoir nostre treshier & tresredoubte Empereur, la Royne de Franche, & la Royne de Honguerie, comme deux perles incōparables de toute Europa. En quel estat, en quelle multitude de Noblesse, & gros personnaiges, que iceulx trois sont entrez, pœult lon mieulx considerer, que lon ne scauroit icy en brief racompter.

L'ordre que tenoit l'armée ou squadron au marchier vers la ville.

Voicy, apres estre l'Emperialle Maieste, & les deux Roynes passees, & suyuant le Prinche & tout l'estat predict: La bende ou armée des souldars (comme chasteau ou forteresse de pomposite, a commenciet a desplacher & sortir de son lieu pour marchier vers la ville.

Premierement se sont partis aux deux costes les aesles de ladicté bataille, asscauoir les Hacquebutiers, & consequemment eulx estendant, comme on a la maniere d'une chainne, ont commenciet a marchier cinq de suyte.

Au deuant marcheoient (comme ducteurs ou guides) trois Hallebardiers, marchant, au deuant eulx trois Tabours, & trois Phiffres.

Apres marcheoient trois rengz de picqueniers ou long bois, & aiant deuant eulx cincq hallebardiers (comme guides ou capitaines) avecq. iiiij. tabbours & iiiij. phiffres, aprez iceulx marchoit vng reng de hallebardiers, & puis .xxv.

C iiij rengz

rengz de picqueniers. Apres iceulx marcheoient .ix. rengz de hallebardiers, Au millieu desquelz marcheoient .iiij. Portenseignes, & deuant eulx quatres tabbours & quatres phiffres. Apres marcheoient .lv. rengz de picqueniers, & puis .xiiij. rengz de hallebardiers. Au millieu desquelz volletoient .vj. Enseignes ou Banieres, & deuant .vj. Tabbours, & .vj. phiffres. Apres marcheoient derechief .lv. rengz de picqueniers. Apres .ix. rengees de hallebardiers, au millieu desquelz marcheoient les trois dernieres enseignes, ensemble .vj. tabbours, & .vj. phiffres. Aprez iceulx marcheoient .xxvj. rengz de picquiers ou long bois. Puis vng reng de hallebardiers, & consequemment (comme closture de la bataille) trois rengz de picqueniers.

Tous lesquelz souldars marcheoient en forme, comme gens de guerre ont de coustume marchier, pour chascun reng cincq de suyte, qui porte pour chascun reng, cincq fois cincq.

Le Prinche abordant a la ville.



E pendant que iceulx souldars marcheoient en ordre, & que la cheualerie, ou la plus part estoit dedens la ville, asscauoir, Citoiens, Marchandz, ensemble les Seigneurs, & Estatz dela ville, voicy q̄ la Magnitude du Prince est aborde de la ville, laquelle de luy auoit estēe souuent desiree veoir. Auquel abordement le bruiet a este incontinent espandu parmy toute la cité, & che avecque grand ioie des habitans.

A V millieu de la ville (comme est assez notoire a tout le mōde) a vng tres-beau, tresfriche, tresumptueulx, & triumphāt Temple ou Eglise, dedié a l'honneur de Dieu le createur, & au nom de sa tresglorieuse Mere Marie, de noz predecesseurs construict & erige ou basti, nommé l'Esglise de nostre Dame, contenant en longueur .C. pas, quy vallent .CCCCC. piedz, & en largeur peu plus ou moins de .LV. pas. En icelluy temple du coste d'Occident, a vng moult hault clochier tout de pierre blance, quasy venant iusques aux nues, leql (pour les sumptueuses oultre voiant architectures) est moult bel a regarder, & est ledict clochier de haulteur .iiij. xvij. degreez, & au dessus d'iceulx degres iusqu'au pignon a encoire de haulteur cincquante piedz, Desquelz degrez les deux sont trois piedz, sy q̄ tott allemēt il contient en haulteur .v. Ixxvij. piedz.

Dedens icelluy clochier pendt vne cloche, que (entre mille aultres, ny de grandeur, espeſſeur, ou de douce resonnāce) a grandt paine sy on trouueroit la par reille, & a estēe appelée ladictē cloche Charles, du nom de Charles cincquiesme, nostre tresredoubte Empereur, a l'ours qu'elle fust baptisee.

Sentant ladictē cloche l'approchement de la Haulteur & Magnificence du Prince, a incontinent rendu toute la ville plaine de grandt & douce melodie denonceant par son armonie l'arriuement du tresdesirez Prinche. Au moien duquel sonnement, ont estez en vng instant ou moment esmeuz tous les cœurs des habitans, cōmenceantz a courrir, fuir par la ville, & che par vng merueil-

leux zele desirant veoir la Magnitude du tresdesire Prinche, ont commencier a emplir les rues , huichz , fenestres , & toictz par vne inenarable affluence tant de tous estrangiers come des habitans de la ville, affluans de tous costez.

Sur les murs de la ville a chascun coste de la porte par ou il debuoit entrer, auoit en moult belle ordre pour festiuement (a son arriuer) saluer le Prinche, enuiron mille pieches d'artilleries, peu plus ou moins, sans la grandt multitude des Hacquebutes. Mais a l'arriuer de sa Magnificence, commencea tellement a pluoir sans cesser nullement, que lon ne pœult ou bien peu deschergier l'artillerie . Et la veue de la triumphante entrée moult fort empeschee, au grand dueil & regretz de la tresdesirante multitude du peuple. Aultrement ce eusse este pour sa Magnificence, vng ioieulx & triumphant Spectacle a regarder tant de pieches d'artilleries desserer ou descherger a vng coup, & voiant tant de coupz de tonnaires , fulgurations. Le ciel par tout en tout ardamment illuminer, couvert de fumee, ensemble le esbranlement de la terre.

Puis doncques que (aucque telle & triomphante multitude) nous le auons amené iusques aux murs de la ville, reste de le mener dedens. Mais auant que d'entreprendre, il est tresnecessaire, que premierement nous descripuons, le chemin de la porte , par ou il est entré iusques au lieu ou sa magnificence a prins Logis, affin que plus clerement l'on puisse comprendre la suyte des spectacles parauant considerez.

La porte de l'entrée du Prinche.




A porte par ou sa haulte magnitude est entrée, est la Porte nouvelle que lon appelle CÆSARIENNE, cest a dire, la Porte de l'Empereur, bastié du coste de midy de la ville, & est la Porte tirant a Malines. Laquelle porte a premier este fondée (asscauoir de murs batterie, bolleuers & fossez) de par l'Imperialle Maiesté, en l'an mille cincq cens .xliij. & toute de pierre quasi paracheuee en l'an mille cincq cens xlv. auquel an, le .xxv. iour de Nouembre a este l'Imperialle Maiesté (Charles cincquiesme de ce nom) le premier de tous qu'y a premier passez a cheual. Laquelle de sa Maiesté a este premieremēt nommée, la porte de l'Empereur.

Icelle porte a de haulteur iusques au mollures ou cornice, cincquante piedz ou enuiron , & en largeur de .lxxx. piedz. En premier les columnnes, architrabs, molures & cornices, ensemble triglyphes & metopes, sont toutes faictes a la Dorique, come lon pœult assez veoir en figure ensuyuante.

En hault au dessus de icelle porte l'en eusse veu , (sy la cellarite du tempz ne nous eust surprins) vng grandt Abacus ou tabbleau (aucque ses Architrabz & Cornices denuiron .lxx. piedz de large, & de haulteur .xij. piedz) auquel eust este escript en Latin, lettres de vng piedt de grandt, & le tout a l'anticq, telles parrolles Latines. PHILIPPO DIVI CAROLI &c. Qui vault .

Voicy la figure de la porte Cesarienne.



aultant a dire en la langue Franchoise:

A l'honneur de Philipes, Filz de l'Empereur Charles cinc-
quiesme, par institution paternelle, successeur du Marquisat du
saint Empire, & de ceste Cite, ensemble de toutes les belles
prouvinces de pardecha, nostre tresdesiré Prinche a sa treschier-
re venue, des extremitez des regions d'Espaignes. S. P. Q. A.

Au dessus de la Cornice dudit Abacus, sur l'ung de coingz a dextre, eusse
estee vng homme sauluage, tenant en sa main vne baniere depainté des armes
du Marquisat, & a lautre coste, asscouoir a main gauche, vne femme saul-
uage, tenant en sa main vne baniere, munie des armes de la ville, & droit
au millieu diceulx statues les ioueurs de la ville & autre ytieulx musiciens.

A l'entrée d'ycelle Porte du coste des champz a vng pont, tout de pierre
blanche, contenant en longueur .lxxxv. pas. & au chascun bout dudit pont
(du coste champestre) eussent estees construictes deux Esguilles, ou Obelijcs
d'Egipte, tout de marbre d'Egipte contenat vne chascune en haulteur .lxxx.
piedz, mais au moyen de la bastine venue, furent delaissees. Sur l'une desdites
Esguil

Esguilles eusse esté escript, asscauoir sur le piedestal ou basse, telles parolles Latinas: DIVO CAROLO. V. CÆS AVG. Et sur laultre:

PHILIPPO HISPAN. PRINC. DIVI CAROLI. V. F.

La Court ou Pallais de sa Princeaulte.

LA Court de sa Magnificence, ou ses Ancestres ont esté tousiours accostumé logier, a esté au monastere de S. Michiel, basty ou situé du coste d'occident de la porte, sur la riviere que nous nommons, het Schelt, estant ledict Monastere de telle grandeur, que le Prince, l'Empereur son pere, ensemble les deux Roynes, ilz sont esté raisonnablement & commodieusement logez.

Le chemin Triumphal.



E chemin de la porte cy dessus mentionnée iusques audiēt Monastere (entre moult de diuers & sumptueulx spectacles, ou sa Magnificence a deu passer) tient en longueur plus de deux milles deux cens pas, vng chascū pas pris pour cinq piedz d'Anuers ou Romainns, & les endroictz & singuliere mesure dudit chemin a esté en teste sorte.

De la porte Cesarienne ou Imperialle dessusdicté, lon tirre droict vers Occident iusques au cimitiere de S. Ieorge, enuiron cent pas ou plus.

Puis dudit cymitiere vers Septentriō, par la rue du grandt hospital, iusques au detour, que lon nomme Triangle, ou vulgairement, le Drie hoec, a enuiron deux cens & huictante pas.

Dudit triangle ou drie hoec, tournant vng petit vers orient par la rue des tanneurs, iusques sur le pont dict Meerbrugge, ou pour le present se fait le marchiet du bledt, a enuiron deux cens pas.

Dudit marchiet au bledt par la rue sinte Katherine, nommée sinte Kathe rine veste, iusques au pont de Saincte Katherine, a enuiron .C. XL. pas.

Du pont saincte Katherine iusques a la Wijngart brugge (vng pondt ainsi nomme) enuiron cent pas.

De icelluy pont iusques au pont des Freres Mineurs ou Cordeliers, ainsi nom me, pour le Conuent des Cordeliers, quy guieres n'est loing de la, enuiron .C. dix & sept pas.

De celluy pont iusques a la Coepperbruggen, portant le nom de vne porte, quy y souloit estre, nommée, porte de la vache, enuiron cent pas.

De icelle porte en tournant du coste de Midy au long de la coeperstrate, iusques a vng pont nomme Melcbrugge, ainsi nomme pour che quil est basty au pres du marciet ou se vendt le laict, enuiron deux cens & .xvj. pas.

Dudit pont, en tournant derechief vers occident au long du grandt marchiet, & iusques a la maison de la ville, sont enuiron deux cens & vingt pas.

De la maison de la ville vng petit tournant entre midy & occident au long de la rue nommée Hooghstrate, iusques au marchiet du lin ha enuirō. .C. xxv. pas.

Dudit marchiet au lin, iusques a la porte S. Iehan enuiron cent pas.

De ladicté porte iusques a la Monnoie, cent .xv. pas.

Et de la Monnoie iusques au Monastere de S. Michiel dessusdict, auquel a este la Court ou logement de sa Princiale Magnificence .CC. pas ou enuiron.

Icelluy tant long & triumphant chemin estoit construict aux deux costez (asscauoir de la porte Cesarienne iusques au Monastere de S. Michiel, ou illecq a este la Court) de colomnes quarrees (nommée pillastres) iusques au nombre de deux milles deux cens, asscauoir .xj. cens d' vng coste, & .xj. cens de l'autre. Les quelles coulonnes predictes estoient distates l'une de laultre, aulcūs de dix piedz, alcuns de .xv piedz, selon que la cōmodite des lieux requeroit. En hault auoit de tranuers asscauoir de vng cappiteau a laultre a chascune colonne son architrabe ou supercille. Entre chasque coulonne ou pilastre d'ung cappiteau a laultre, pendoient doubles & triumphantes gioies, faictes de vertes fœulles d'arbres, asscauoir d'hierre & aultres, en hault au dessus du capiteau, asscauoir de deux en deux auoit de moult beaux & triumphans circles, faict de herbes ou fœulles d'arbres, q̄ les Italiens nomment Festones, vng chascun contenant en rondeur .ix. piedz. Pareillement auoit sur chandeliers dorrez (asscauoir de deux a aultres festons) gros flambeaux ou torches de chire blanche. Esdictz festons estoient au vif pourtraictz iceulx personnaiges, asscauoir, la M. Imp. le Prinche, la Royne de France, & la Royne de Honguerie, semblablement en aultres circles particuliers, vng chascun ses Armes particulières, Inscriptions & Dictions. Ensemble les Armes, Inscriptions, & Deuises ou Dictions du Marquisat & de la ville d'Anuers, & estoient iceulx festons, circles & torches sur iceulx pillastaes en ordre comme sensuyt:

Premierement l'ymage ou figure de l'Empereur, & puis suyuoit vne torche.

Secondement les armes de l'Empire. puis de rechierf vne torche.

Tiercement l'ymage ou effigie du Prinche. puis vne torche.

Quartement les armes du Prinche. puis vne torche.

Quintemēt la deuise du Prince, NEC SPE NEC METU. puis vne torche

Puis lymaige ou effigie de la Royne Leonore. de rechierf vne torche.

Les armes de ladicté Royne. de rechierf vne torche. Puis aprez icelluy tiltre
DIVÆ HELEONORÆ, FRANCIAE REGINÆ, HEROI-

NÆ OPT. Puis de rechierf vne torche.

Puis apres lymaige ou effigie de la Royne Marie. puis vne torche.

Puis apres ses armes. & consequēment vne torche. Puis vng tel tiltre.

MARIE REGINÆ HVNGARIAE, DIVÆ TUTELARI.

Consequēnement vne torche.

Puis les armes du Marquisat, consequēment vne torche. Puis vng tel tiltre.

MARCHIONATVS SACRI IMPERII. consequēment vne torche.

Puis les armes d'Anuers, consequēment vne torche. Puis icelluy tiltre :

ANTVERPIA MARCHIONATVS SACRI IMPERII ME-

TR O P O L I S . Consequemment vne torche.

Puis apres le premier dicton de la ville, asscauoir, vng petit chiennet blancq & telle inscription : FIDE NVNQVAM POLLVTA . & consequem-
ment vne torche . Puis le secont dicton ou deuise de la ville , asscauoir vne
plaine poignee de fleur de lilz , avecq telle inscription :

C A N D O R E I N T E G R O S E M P E R . Consequemment vne torche.

Puis le tierch Aduis ou dicton de la ville d'Anuers , asscauoir vne fontaine
fluant & courant , & telle inscription .

F O N S I R R I G A N S O M N I A . Consequemment vne torche .

Pour trois causes principales a este le premier dicton ou deuise ainsy dicté .
Premierement , nulz animaulx n'est plus fidelle à son maistre , que vng petit
chiennet , quy assez parfaictement denote & signifie clerement , la foy & ser-
uice que subiectz doibuent a leurs superieurs . Car combien que ainsy soit que
noz predecesseurs ont tousiours denoté foy , ou fidelite par deux mains ioinctes
ou vnies , toutefois icelle estoit vne foy ou fidelite commune ou entremeslee de
double feaulté , asscauoir , ou feaulté des Seigneurs , Maistres , ou superieurs , aux
subiectz , seruiteurs ou vassaulx : ou feaulté des subiectz , serfz , ou vassaulx ,
aux Seigneurs , Maistres & superieurs . Mais nostre chiennet , (voire nostre
blancq chiennet , quy signifie la ville d'Anuers) porte sa propre simple & non-
pollue signification , car par dessus toutes aultres a tousiours estée aux Prin-
ces & Superieurs fealle par droicté , simple , pure , sincere , non faincte , impo-
lue , immaculee , constante & infractible fidelite , Comme pœult apparoir par
moult & diuersses exemples . Secondelement , pource que en l'an . M . D . XX .
a l'entrée de Charle . V^e pour lhors esleu Empereur , nous aians en tous Specta-
cles & eschaffaulx , (asscauoir en Grec , Hebrieu , & Latin) icelle nostre deuise ,
F I D E S E T A M O R , toutteffois depuis ont estez aulcuns (eulx vœul-
lans parer ou aorner des plumes d'aultruy) quy se sont attribuez icelle nostre
deuise , que pour lhors auions partout inscript en trois langues .

Parquoy (affin q̄ paraduēture il ne semble qu'ayons pris & usurpez d'eulx ,
comme ilz ont voulu faire de nous) nous auons icelle delaissee (combien que
de droict elle nous apartiengne) prenant en lieu d'icelle le blancq , sincere ,
impollut , feal , & seruiable chiennet , avecq iceulx trois petitz motz . FIDE
NVNQVAM POLLVTA , quy vault , Touſiours par pure & sincere foy .


La secunde deuise est assez concordante & de mesme signification a la pre-
miere , sonnant C A N D O R E I N T E G R O S E M P E R , quy vault a dire :

De cœur entier , sans quelque fainctise .

Le troisiesme deuise ou dicton de la fontaine predicte ensemble de l'inscrip-
tion , demonstre que Dieu le createur (d'ou tout le bien prendt son origine) a
tellement pris a cœur , q̄ elle sœullement (par sa bonte infinie) en ceste sienne
felicité ou prosperite ne sesiouyt , mais que aussy elle espardt (comme fontaine
superfluante) icelle sienne prosperite & bon heur par toutes citez & prouin-

Voicy la figure d'yeulx Pillastres ou Coulomnes quarrées cy dessus mentionnées.

Ombien, que d'icculx Pillastres ou Coulomnes quarrées ne soyent icy figurez ou pourtraictz que huict, l'on a chec faict, affin de reduyrc ou ramener au court ladicté figure, selon que la quantite de chec volume requiert. Pource que nullement n'estoit possible, de ramener l'ordre & le nombre de tant de Coulomnes ou Pillastres en sy petit volume, car selon l'ordrc qu'ilz estoient construictz, ilz estoient double , asscauoir .xi^c.de lung coste, & xi^c. de lautre, montant ensemble iusques au nombre de mille deux cens, tirant en forme d'vne bel le & longue gallerie ou deambulatoirc, de la porte de l'Empereur iusques au Monastere de Sainct Michiel.



Chascunc Coulomne ou Pillastre, comprins le Pedestal, & Architrabe, tenoit. xx.piedz.

Et comprins Circles ou Festons . x xiij. piedz.

Vng chascun Circle ou Feston tenoit en diametre trois , & en rondeur .ix. piedz.

La distance des Coulomnes estoit communement ou la plus part de .xv. piedz.

Et les aulcunes (selon la commodite des lieux) .x. piedz.



La mesure du piedt d'Anuers, accordant avecq le piedt Rommain anticq;

ces, sy q̄ de toutes les riuieres resortants d'icelles sorte ou produict toute choses a l'utilité & conseruation de la vie humaine, & que chascun s'en enrichit. Che que aulcuns aueugles de haine & rancune, aussy malgre eulx, & les aulcuns de bon vouloir voulentier recongnoissent. Le quoy entendu du doctissime Poëte, Julius Scaliger, en sa description de diuersesitez, dict en fauer de la personne de la ville d'Anuers, en six vers, en telle sorte :

OPPIDA QVOT SPECTANT. &c. quy vault a dire en langue franchoise:

Aultant de villes quy me regardent des yeulx gauches

Tant de dars de hay ne & enuie sont iectez vers moy.

Lion est multiforme, Paris large bastie, Romme

Tresgrande, Venise tost riche, Tholouse puissante.

Mais toutes marchandises, tout ars, viel ou nouuel

Que aultres cites ont singuliere, ay ie aussy toutes.

Apres estre mis iceulx circles ou festons en ordre cōme dict est, ont tousiours recommenciez de nouueaulx, & de rechief de nouveau, iusques a estre paruenu au bout dudit chemin triumphal.

L'on pouoit icy veoir, vng moult bel & estrange spectacle, asscauoir, vne allee ou gallerie, de plus de deux milles deux cens pas, entre tant de Coulonnes & de leur Architrabs, de beaux Festons, Ymaiges, Armes, Deuises, Inscriptiōns, ensemble moult belles Torches de chire blanche ardente. Pour vray l'on pouoit estimer de loing veoir vng moult riche triumphant de ambulatoire, que l'on nōme en langue Latine Porticus: tant pour lez beaulx, sumptueulx, artificieulx Theatres, Arcz triumphaulx, & aultres telz spectacles que l'on venoit a rencontrer par tout. Aussy est a noter que iceulx Pillastres ou Coulonnes, ensemble ce que dessus auons declarez apartenir a icelle, ont esté paracheuez (le tout par forche d'ouuriers) durant le terme de huict iours.

Puis doncques que nous auons d'escript ou ouuert la porte triumphalle, demonstre le chemin ou se debuoit faire icelluy Triomphe, reste a d'escripre le Principal Triomphe que a este fait au passer de sa treshaulte Magnitude.

L'entrée du Prinche.




Pres estre (le nostre desire Prinche ensemble tout son estat) passez la porte prenommée, est ioyeuſement cōmenciet a marchier en ceste sienne cité, laquelle il (de long tempz) auoit moult desirez veoir: Et en entrant, voicy que icelluy tant long & triumphal chemin, (asscauoir, la grandt multitude des Coulomnes, & des Architrabs, Festons, Torches blanches ardantes, & aultres, construictz a chascun coste des rues en bel ordre) s'est offert devant sa face.

Le premier Théâtre, situé pres la porte Ces-

ricenne

rienne cez le cimitiere de S.Ieorge.



haulteur
C piedz.
Largeur
lxv pied.



Pres que le Prinche a esté eslongé de la porte, & marchiet iusques enuiron le cymitiere de S.Ieorge , enuiron cent pas de ladicté porte distans, a illecq veu vng moult riche pegma ou eschaffaulx basti et erige a l'honneur de sa personne, le tout construict a la Corinthe, esleue (y compris les compartmentz) enuiron cent piedz, tirant en Latitude ou Largeur lxv piedz, comme assez appert en la figure precedente. Sur icelluy Theatre ou eschaffault pouoit l'on veoir yceulx personnaiges ensuyuantz.

Le PRINCE estoit de raisonnable haulteur au vif pourtraict, & a coste gauche de luy, estoit CLEMENCE , quy estoit vne moult belle dame accoustre en vestemēt blancqz, portant tant en sa main q sur son chief fleurs de lilz blanches . Viz a viz du Prinche estoit ANTVERPIA, en forme d'une moult belle ieusne vierge, portant vng vestement blancq, guieres long, & par dessoubz icelluy vestement, vng aultre vestement rouge quasi iusques a terre, denotat par icelles deux couleurs l'ancienne & accoustumee liuree de la ville, elle portoit sur son chief vng clochier enuirō de deux piedz de haulteur, pour traict selon le clochier de l'esglise de nostre Dame d'Anuers, soy enclinant tres obidientement, recœullant le Prince tresamiablemēt, semblablement ceulx quy estoient enuiron d'elle, asscauoir FIDES, cest a dire Foy ou leaulte. GRATITVDO, gratitude. REVERENTIA, OBEDIENTIA, AMOR, CANDOR.

FIDES, estoit vestue d'ung vestement blancq, monstrant de main dextre vng anneau d'or, tenant en son brach gauche vng petit chiennet tout blancq.

GRATITVDE, estoit aussi vestue de vng vestement blancq, aiant aupres d'elle vng petit chiennet faisant feste de sa queue.

REVERENTIA, vne moult belle & honneste dame, aiant le chief enclin, offrant des mains tout honneur & reuerence.

OBEDIENTIA, en semblanche de chamberiere ou seruante , tenant a deux mains vng ioug ou gorreau.

AMOR, vng iouuenceau accoustre en soie rouge , portant en sa main vng cœur ardant, ensemble vng brandon de feu sur son chief.

CANDOR, estoit aussi vng iouuenceau, accoustre en soie blanche, portat tant en sa main que sur son chief fleurs de lilz. Lesquelz personnaiges ont tous tresamenablement & humainement receipt le Prinche & Clemence.

Au hault dudit eschaffaulx en vne table assise entre les compartimens estoit escript en grosses lettres Romaines : EN OPTIME PRINCEPS. &c. Qui vault a dire en langue Franchoise:

Voicy tresmagnanime Prince, voicy la toutte tienne Anuers (grandement esioye de ta tresdesirée venue) quy s'offre volontairement soubz ta clemence , voire de tel seruice beniuole ou accoustumee feaulté, comme elle a tousiours demonstrez a tes Ancestres.

Au dessus asscauoir a la mollure de hault, estoit escript en grosses lettres Romaines quasi de demy piedt: PVRISS. ERG.&c. quy vault en langue vulgaire:

A no

A nostre tresdesiré Prinche, & le tout
par vng pur & syncere pensement.

Et au dessoubz, a la molure de bas: VENISTI TANDEM. &c. c'est a dire:
Tu es venu touttefois, a present pœult on veoir
ta face, de nous passez a long tempz desirée.

L'Arch triumphal de la Nation d'Eſ- paigne, basty & erigé en la rue de l'hospital, cez le monastere que lon dict Derde ordre.

DV dessusdict Spectacle, enuiron la distance de .C. paz, auoit erigé
la Nation d'Eſpaigne aux deux costez de la rue deux moult bel-
les, grandes, & sumptueuses Coulomnes, le tout a la Corinthe,
situées sur Piedestals Tuscan, le tout artificieusement marbri-
fées, de couleurs diuerses, contenant en altitude ou haulteur. lvij. piedz, sans
la Basse ou Piedestal, & estoient yceulx Piedestals, ou Basses, ensemble les
Cappiteaulx, sumptueusement d'orez. Sur l'vne desdictes Coulomnes estoit ar-
tificieusement entaillée, & erigée, vne moult grande & sumptueuse couronne
Imperialle, & sur laultre coulomne, de mesme vne couronne Royalle, pour-
traicté au vif, et de d'orreure, ensemble de diuerses pierres precieuses enrichie.

Enuiron le millieu de chascune Coulomne, pendoit vng tableau quarré, en
l'ung estoit escript en grosses lettres PLVS, & en laultre VLTRA. Aussy sur
chascun Piedestal ou Basse, estoit escript en deux lignes en langue Eſpagnolle,
ces parrolles suyuantes: E S P A N A E S P A N A.

Suyuant ces deux Coulomnes (non guieres distans) auoient basty en for-
me quarrée deux gros boleuers, asscauoir de chascun costé de la rue vng, droict
vis a vis l'ung de laultre, tellement aornez de paincturie, qu'il sembloit pro-
prement a les veoir estre entailliet de vifue pierre marbrine.

Iceulx deux boleuers (comme l'on pœult asseſ voir en la figure suyuante)
estoient de deux ordres. En la premiere, ou ordre de bas, estoient ilz moult
massifz, & auoient au dessus de gros creneaux. Et au second ordre, ilz
estoient moindres, & a la semblance de tours quarrees. Au bas, sur les crene-
aux de l'ordre premiere, estoient cachiez grande multitude de souldars d'Eſ-
paigne, ayant les chiefz armez au cler, de moult beaulx heaulmes, et d'autres
sortes d'armures, quy estoit chose moult triumphante a regarder.

Iceulx souldars, incontinent, apres auoir veu la Maiſte du Prince enuiron
de .C. paz, ilz ont vng chascun de son costé (asscauoir de chascun boleuer)
commençiet a tirer fort & ferme, de gros traict a pouſtre, ſy horriblement,
ſe entre iectant (par la bouche de dragons figurez & entailliez) feu vollant,
de forte quil sembloit proprement, que le ciel en fusſe tout couvert, & ont che-

continué sans cesser aucunement, iusques à ce que sa Magnitude a este passée de certains pas.

Au dessus de chascune tour du secont ordre d'iceulx boleuers, estoient fischede trois banières ventillantes ou vent, ou estoient painctes (asscauoir) en l'une les armes de l'Empereur, en laultre les armes du Prince, et en la tierce les armes d'Espaignes, asscauoir nostre Dame tenant son filz entre ses brachz. Et sur laultre tour, aultres trois banières, ou (comme dessus) estoient en l'une les armes de l'Empereur, en laultre les armes du Prince, & en la tierce les armes d'Espaignes, asscauoir Sainct Iacques, frappant, & occiant, furieusement d'une espee nue Turcz & Mores, &c.

Sur chascune tour auoit trois Tabours, & trois Trompettes, triumpham-
ment accoustrez de soie blanche, & incarnalle, lesquelz (a l'arriuer du Prin-
ce) ont commenchié a mener vng tresgrandt bruict.

Auprez d'iceulx boleuers, a chascun coste de la rue, estoit bastie & erigee
vne muraille pourtraicté de pierre bise longue de .xlj. pas ayant dessus et des-
soubz rondes mollures. Sur chascun mur estoient construictes .ix. Coulomnes
de couleur Pourphire, faictes a la Dorricque, avecque la Basse & Cappiteau
sans Supercille ou Architrabe tendue d'ung Cappiteau a laultre de verdure ou
gioye, & estoient distantes de .xx. piedz l'une de laultre.

Entre chasque Coulomne (exceptez les deux dernieres tirant vers iceulx
bolleue s) a vng costé de la rue auoit vng Roy d'Espaigne en nombre iusques
a sept, chascun de haulteur enuiron de .xij. piedz, pourtraictz de pierre bise
entaillez: & estoit le nom de vng chascun escript sur ycelluy mur de grosse let-
tre en langue Espagnolle, tous l'ung apres laultre comme sensuyt.

Don Pelayo.

Don Alonso casto.

Don Fernando el primero.

Don Alonso el sexto.

Don Alonso octauo.

Don Alonso el terçero.

Don Fernando catholico.

Semblablement entre les aultres Coulomnes, a laultre coste de la rue auoit
sept Dames toutes d'egalle haulteur, ayant (chascune d'elle) son nom escript
de grosses lettres sur icelluy mur en langue Latine,

Fides.

Foy.

Spes.

Esperance.

Charitas.

Charite.

Prudentia.

Prudence.

Temperantia.

Attrempance.

Iustitia.

Justice.

Fortitudo.

Forche.

I Oignant ledict mur ilz auoient basty & erigé vng moult bel, sumptueux, & magnifique Arch triumphal, fait a la Dorique, a deux faces, & a trois entrees, contenant en altitude ou haulteur(y compris Piedestals, Basses, Coulomnes, Cornices, Triglyphes, & Metopes) en uiron de .lxxx. piedz, & de proffondt .xxxij. piedz. La porte ou entrée moyenne auoit en latitude .xv. piedz, & haulte de deux quareures, asscauoir .xxx. piedz.

Les deux petites portes tant en largeur que haulteur, chascune la demie. A chascune face de l'entrée du milieu auoit deux grandes collosses ou statues, entaillez de gros blocqz ou tronques, haultes sans les Piedestalles, en uiron de xvij. piedz, sy artificieusement depainctes (sans y auoir vse de cuyure ou matieres semblables) quil sembloit proprement qu'elles fussent toutes de cuyure. Ilz estoient tous deux nudz a la mode Anticque, asscauoir a la première face, deux Geantz ou horribles collosses. Et a lautre face, deux grandz ydolles nudz, que l'on nomme Terminos, sans brach ou iambes, depuis le nombril en bas terminans en forme de longue pierre quarrée, Lesquelz soustenoient par vifue forche en lieu de Coulomnes le dessus de l'Architrabe.

Sur la Cornice d'icelluy Arch sur chasque pluteus des quatres coingz, estoient erigée & posée eguiilles ou obelisches d'Egypte, contenant vne chascune en haulteur sans le piedt ou pluteus .xxxv. piedz, le toutes artificieusement marbrisees a la mode des pierres d'Egipte, & au sommet de chascune eguiille vne grosse boule d'or.

Au milieu d'icelles quatres obelisces auoit la figure d'ung temple rondt, nomé le temple du Dieu Ianus, le q̄l temple estoit en uirōné de .xij. coulonnes de metal toutes a l'Ionicque: icelluy temple souloit (des païens) estre appellez le temple de guerre, lequel temple ilz tenoient tousiours fermé en tempz de paix.

A main dextre d'icelluy temple l'on voioit hault en l'air leffigie ou semblance de nostre tresredouste Sire l'Empereur Charle cincquiesme, ensemble son filz Philippes nostre Prince, en moult beaulx & anticques harnois dorrez & artificieusement entailliet, & estoient icelles statues haultes en uiron chascune de .x. piedz, lesquelz fermoient le temple de guerre, & du coste gauche estoit l'Empereur Octauien Auguste de semblable haulteur aussy richement armé d'ung harnois d'orre, monstrant de la main qu'il auoit (parcy deuant) aussy fermé ledict temple.

Au dessoubz d'icelles ymages ou statues a la mollure superieure d'icelluy Arch estoit escript en vng tableau de forme longue iceulx vers ensuiuantz en language Latine: VT QVONDAM AVGVSTVS. &c. qui vault a dire:

Ainsy que iadis Auguste a fermé le temple de Ianus,


Aussy l'a fermé Charles, ne l'ouurant de long tempz,
Esperons que tu (o Philipes) apres auoir subiugue toute la terre
(Durant ton regne) le tiendras aussy fermé.

A coste dextre de l'entrée du milieu auoit moult belle & riche histoire a-

E ij mail-

La figure de l'Arch triumphal des Espagnols, ensemble son Ichnographic.

Haulteur
lxxx.pied.
Largeur
lxv.piedz.
Proffondt
xxxij.



maillée de ce que les Turcqvz (sœullement apres auoir ouy le nom de la Maieſte Imperiale) ſont confuſiblement fuys de la terre d'Auſtrice: de laultre coſte eſtoit paraillement vne moult riche hiftorie eſmaillee de ce que la Maieſte Imperiale a gaignet le fort d'Africque, aſſcauoir le fort chasteau de la Golette, ensemble la grandt cite de Thunis, & confuſiblement dechaffeſez le grandt & cruel tirrandt Barbaroſſa.

Aux hiftories predictes auoit inscriptions propices & a che duysantes, aſſcauoir de l'ung des coſtez de l'Arch au de hors de la feconde fache en la mollure de deſſus, telles parolles Latines: VT PRÆCLARISS.PATRIS.&c.c'eſt a dire

Ainsy que les faictz vertueux de ton Pere (desquelz Chartage en eſt vne grandt partie) obſcurciffent (par moult grandt clarté) les yeulx de tout l'orbe terrestre. Ainsy esperons (o tres puissant Prince) que ta proueffe donnera terreur aux Turchz habitans par toute Asie.

Et de laultre coſté eſtoit eſcript: HOS PRINCEPS OPTIME &c.

Dieu garde yceulx paiens (o tres illustre Prinche) auſſy bien ceulx quy ſont fuys & retraictz en la guerre d'Auſtriche hors de inuincibles mains de ton Pere, comme ceulx qui habitent Asie & Africque, pour eſtre par toy ramenez a la congoſance diuine, ou pour eſtre totallement ruynez & exterminez.

Et en la premiere face de l'Arch triumphal cez l'ung des colofſes a l'oppoſite d'yceulx ſept Roix d'Eſpaignes predictz, eſtoit eſcript a groſſe lettref en vne table: HIS MAIORVM TVORVM. &c. qui vault a dire:

Par ycelles Royalles figures de tes Anceſtres, desquelz tu es extraict du coſté maternel (o tresillustre Prince) ne te ſont ſeulemēt premife affin de les enſuyuir en yceulx grandz faictz vertueux, mais affin que par icelles tu foies admonesté a faire choses plus grandes plus valereufes & de plus grandt gloire.

En la diiecte face iouxte l'autre colofſe a l'oppoſite des ymaiges ou ſtatues des ſept dames, auoit de meſme vne grandt table, en laquelle eſtoit eſcript en groſſes lettref en cete forte: Q Y O D H O S O M N E S. &c. c'eſt a dire:

De ce que tu ſurpaſſe iceulx tes Anceſtres en Magnitude, (eſtant filz du tresmagnanime Charles, ensemble portant le nom de Philipes) eſt ſigne apparent que tu viendras (par yceulx dons vertueux) ou lon ne polra aller plus oultre.

A l'environ ſur la mollure du temple de Janus eſtoit eſcript de groſſes lettref en cete forte DIVO PHILIPPO. &c. quy vault a dire.

A l'honneur du tresillustre Prince Philipe filz du trespuifſant Empereur Charles cincquiesme, qui la foy Catholicq, la paix (augmentée de ſon pere par faictz victorieux) par bonte

diuine entretiendra doresnauant prosperamment, voire contre tous la deffendra valeureusement.

Sur la corniche de l'Arch asscauoir de l'ung de pignons a laultre, estoit faite vne gallerie fermee de petites coulounes rondes, sur lesquelles on se pouoit appuier, & sur ycelle gallerie (apres estre ledict Prince passez yceulx dessus nommez blochus ou boleuers) ont estez ouys plusieurs musiciens iouans sur diuers instrumentz, asscauoir trompettes, clarons, pipes, flutes. &c. d'une moult armonieuse et artificieuse composition que cestoit chose moult plaisante a ouyr.

Nostre Prinche approchant dudit Arch triumphal, voicy que soudainement, deux anges se sont apparus en la summite de l'arch, lesquelz anges doucement descendoient vng vtement de soie blanche fourré de soie carnalle, sur lequel vtement estoit escript six vers en langue Espaignolle:

M V C H O M A S Y M A S. &c. qui tournez en nostre vulgaire vault a dire:

De plus en plus aduons certain presage,

Le seul Monarche te veoir en nostre aage

O tres hault Prince de la terre Espaignolle

Ton futur sceptre est estendu tant large

Qu'aprez reduictz Turcqz, Barbares en seruaige

Te seruiront du monde les deux polle.

Et soudainement (apres l'apparition d'yceulx deux anges) ont este ouys sur lad' gallerie vne aultre armonie d'instrumētz musicaulx, asscauoir cornettes, & flutes, lesquelz ont commenciet a iouer par vne doulce armonie compoſee a diuerſſes parties, qui dura iusque a che que le Prince estoit bien eslongé de cent pas. Ieulx Musiciens estoient tous accoustrez en veloux iaulnes, asscauoir du sommet de la teste iusques au piedz.




*Aussy ycelluy tant triumphant & sumptueux œuvre a este le tout accom-
pany & paracheué pendant le terme de . xxxij . iours , ouquel ont besongniet
C. X C. ouuriers tant Artistes que aultres :*

*Lequel œuvre (asscauoir Coulomnes, Boleuers, Murs, & Arch triumphal)
a couste a ladict Nation enuiron de six milles florins Carolus.*


**L'arch triumphal des Geneuois situé ou
erigé, aussy en la rue de l'hospital aupres de la place du
triangle que lon diet communement Dryhœck.**

 *Pres auoir veu a moult grandt ioye l'Arch triumphal de la Nation d'Espaïne, l'on est venu arriuer a vng aultre, lequel des Geneuois estoit erige enuirō cent pas de cestuy predict a la place du Triangle alias Dryhoec. Icelluy Arch triumphal estoit merueilleux a veoir, tant pour sa hauteur que pour che qu'il estoit sumptueusement erige de moult riche architecture, & aorné de moult riche peinturie: il estoit large de .lxx. piedz, fondt*

L'ichnographie ou fondement du présent Arch.



La figure de l'Arch triumphal des Gencuois.



fondt .xc. et en haulteur (comprins les eleuations et ymages sur iceluy posees) C. piedz, entierement faict a la Corinthe : l'entree contenoit en latitude ou largeur .xvj. piedz, & en altitude ou haulteur .xxxij. piedz.

Ledict Arch auoit deux galleries, asscauoir l'une deuant, laultre derriere, faites chascune a deux ordres de coulonnes : chascun auoit quatres coulonnes & deux pilliers , sy qu'a chascune gallerie estoient appropriees .vij. coulunes, & .vij. pilliers, montant par ensemble a .xxvij.

Iceulx pilliers & coulonnes estoient depainctz & marbrisez subtillement & richement de couleur azuralle , aiant subtilles vainettes trauerssantes de la mesme peinture: & estoit la basse ou fondement d'orrez, capiteaux d'orrez, a folles d'or ensemble aornez de triumphante vaulsure dorree.

Aussy vng chascun desdictz pilliers ou coulonnes estoient richement aornez de moult riches piedestalles ou stillobates, lesquelz piedestals estoient de couleur de cuyure au vif depainctz, ensemble aornez de merueilleuses et triumphantes Histoires: car au bas des pilliers de la premiere face, estoient artificieusement faites plusieurs figures des Dieux ou Deesses, & ce avecq telle grace que cestoit chose moult triomphante a veoir, et en la seconde face estoient aux piedestalles les gestes du preux & fort Hercules.

Item en la grand mollure de la premiere & seconde face estoient lettres de la grandeur d'ung piedt, lesquelles sonnoient en telle sorte:

PHILIPPO IMP. CÆS. &c. qui signifie:

Au tresdesiré Philippe filz de l'Empereur Charles .v^e. Auguste, ont ceulx de Gennes a son honneur ce faict & baity.

¶ Et en l'autre mollure en telle sorte.

ET PRIVATÆ PIETATI &c. qui vault en vulgaire:

Et a singuliere pieté, & chascune commune leesse.

I Tem en la premiere Face au dessus de ladicté grande mollure, lon veoit trois grandz parc^z quarrez (desquelz celluy du milieu, estoit le plus grand) esquelles quarrees estoient faites de moult riches peintures, asscauoir ymages plus grandes, que communs corp^z humains pour l'heure viuantz.

En l'ung desdictz trois parc^z, lon a veu seoir sur vng moult grandt Aigle noir a deux testes, nostre tresclement Empereur Charles .v^e, ayant vng floc-quart ou courône de Laurier sur son chief, tenât vng Sceptre d'or en la main, armez a l'Anticque & nudz brachz, & iambes, ensemble cothurnes, quy sont souliers ou patoufles antiques, avecq tresriches iartiers aux piedz.

A son costé estoit son filz Philippes, aussy armé a l'Anticque, aussy ayant couronne de Laurier sur son chief. Illecques estoient Iuppiter tenant vne triple esclitter ou tonnerre en la main, Appolo tenant son arc et ses saiettes, Mercurius tenant sa verge serpentine ou cadducee, Pallas avecq ses lances & escutz, Mars avecq ses glaives ou haches, Saturne avecq sa faulx.

Et

Et au dessoubz a terre estoit Neptunus tenant son trident en sa main, et son cheual cez luy: les aulcuns nudz, les aultres a demy, a l'anticque.

Tous lesquelz il sembloit proprement quilz liurassent leurs armes, chascun par soy a Philipe, avecq telle inscription dessoubz eulx,

HIS ARMIS, QVIBVS. &c. qui signifie en langue franchoise:

De ces armes desquelles nous Dieux celles tes douos (o Phe
lippes) tu deffendera le monde a toy de Dieu commandé.

En lautre parcq lon a veu vng homme vieulx assis, tout nudt, aiant les mains liees de grosses chaines de fer, entour duquel se feoient trois dames, que lon nomme en Latin, Parcas: l'une mettoit de la laine sur la quenoille, la seconde filloit laine, & l.i tierce ourdissoit le fil, avecque telle soubscription:

CVRRITE DV CENTES. &c. quy vault a dire en Franchois:

Cours fuzez cours tant que ce fil viengne en drap.

Au troisieme parcq estoit vng homme, armé a l'anticque, non dissemblant a nostre Prince, aiant aesles aux piedz, tenant vng escu de la main gauche, & a main droicte vng glaive, occiant ou mettant a mort vng lion, & aultres horribles bestes, avecques grandz quantitez d'hommes a demy nudz moult naures, gisantz aupres de luy: & aussy certaines femmes vollans a demie nues (aussy moult naurees) fuyant de luy, soubz laquelle picture auoit telle soubscription,

NIL MIHI VOBISCV M. &c. qui signifie:

Je n'ay que faire de vous, loing, loing d'icy o vous prophanes.

Par dessus ces trois parcqz au dessoubz de l'eleuation de l'Arch, auoit encoire vng grand parc, auquel estoient arrificiellement painctz deux hommes nudz, l'ung vestu de la peau d'ung lion, en semblance du puissant Hercules, & l'autre en semblance du grandt Atlas: lequel Atlas sembloit deliurer a Hercules toute la rondeur du monde qu'il tenoit en ses brachz avecq telle inscription:

EGO HOC TE FASCE. &c. qui vauldt a dire:

Je te deschergeray de ce fais.

Au dessus de ceste peinture sur l'eleuation de l'arcq seoit sur vng daulphin d'or vne femme nue artificieusement entaillee, tenant en sa dextre vng cercle d'or, large enuirō de trois piedz, & a main gauche vne ancre d'or, dessoubz la quelle estoit telle inscription: QVI VITAM OPTAS. &c. qui vault a dire:

Sy tu veulx viure, vifz ainsy.

En hault au dessus dudit Arch triumphal sur la superieure cornice estoient posees deux grandes ymaiges ou statues, & quasy (comme il sembloit) pendantes, richement & artificiellement entaillees, portant le nom de deux Riuieres qui ont leurs cours aupres de Gennes: asscauoir l'une Varus et l'autre Macra, chascue infundat ou verssant de hault en bas forche eauue hors d'une grande cruche d'or.

Item en la seconde face, au dessus de la grandt mollure, estoient trois grandz parcz quarrez, desquelz (celluy du milieu estoit le plus grād cōe du premier

parc) au parc du millieu estoit richement paincte a l'anticque VICTORIA, en semblance de vne forte iofne dame armee, estant de bout a nudz brach estendus, les deux mains plaines de sang , entre vne quantite de horribles armures sur vne multitude de gens occis & desconfitz, comme Turcz ou aultres semblables, iceulx foulant & submarchant au piedt, avecque telle inscription au dessoubz: IMPERII CVSTOS. &c. qui vault a dire:

Icelle vierge garde de l'Empire, tant par beau semblant, q par mains sanguinaires, denombre ses prisonniers, & nous recepuoſs le iofne Prince chargez de proie des Orientaulx au Turchz.

En laultre parc estoit vng Adolescent, aorné des armes Antiques non dissemblans a nostre Prinche , aussy de moult belles & diuersſſes vierges ou nymphes le recepuant humainement a rameaulx de palmes , ensemble de festons ou couronnes de laurier, de palme, de chesne, poupliers, & telles choses apartenantes a victoire & triomphe, avecque telle inscription:

TANTARVM PRÆMIA LAVDVM. qui vault a dire:

Voicy le loier de telz grandz faictz,

Au parc trofiesme, vne multitude de pœuple, hommes & femmes, ieufnes & vieulx (en la presence dudit adolescent) cez vng autel bruslant, aportant pour offrande audict autel, deux thorreaux & vng mouton, a mains leuees & iointes rendant graces a Dieu (comme il sembloit) & avecq telle inscription,

OMNE BONVM. &c. qui vault en langue Franchoise.

Tous biens viennent du Pere de lumiere.

Par dessus yceulx trois tableaux droict au dessus de celluy du millieu dessoubz l'eleuation, auoit vng parc quarre, ou l'on auoit painct vng homme portant la similitude de Bellerophon, monté sur vng cheual noir vollat, a cornes longues, & piedz de fer: lequel homme tenoit en ſa main dextre vng glaive ou hasse, & a main gauche vng eſcu de cristal, en che poinct vollant, aiant la picque leuee par l'air, & avecque ceste inscription:

FAMA SVPER ÆTHERA NOTVS. qui vault aultant:

La Fame est congneue par dessus les nues.

Dessus la cornice auoit deux ſtatues ou ymages poſées, affcauoir la vne ſur le coing de la cornice, ayant la ſemblanche de vng grandt homme nudt portant vne longue barbe, ceynct entour soy de la peau d'ung lion d'or, tenat en ſa main vng baston d'or, aiant plusieurs noeudz. Et a laultre coing de la cornice, vne figure de vng noble homme d'argent, de ſemblable grandeur portat armes d'or, aiāt vne courōne d'or ſur ſon chief, & vne rame de palme d'or en ſa main.

Au ſommet de l' Arc triumphal auoit pareillement la figure d'une dame iofne accouſtrée en cramoify rouge, affſiſe en hault en l'air ſur la boulle du monde, ayant ſur ſon chief vng ſoleil d'or reluisant, & brach eſtendu, monſtrant du doigt vers le ciel, tenant en main dextre vng ſceptre d'or , auquel eſtoit pour inscrip

inscription en grosse lettre enuiron de demy piedt iceulx motz:

VIRTVS HONOREM. &c. qui vault a dire:

Vertu produict honneur, honneur produict maieste.

Et estoit tout ce que dessus dict est visible par dehors l'Arch,

Or sensuyt ce que lon voioit par dedens.

DEdens la premiere gallerie au dessus des huit coulounes & les quatres pilliers auoit vng planchier, auquel planchier ou vaulsure entre les poultres ou marrains trauerssans auoit plusieurs et diuerses figures de geantz.

Premierement, lon voioit grans & horribles Geantz, quy (a forche de roches accumulees ensemble, & a forche de grandes eschelles faictes de gros chenes) sembloient vouloir escheller le ciel, vœullans par grans violence dechassier le Dieu Jupiter, ensemble les aultres celestes, en les boutant ou vœullant bouter & priuer du ciel, & estoient iceulx motz escripz:

IN VETITVM. qui signifie en langue Franchoise:

Contre ce qui est deffendu.

En vng aultre parcq lon voioit Jupiter assis sur vng grandt Aigle entre les nues, et tous les aultres Dieux de grandt crainte se mussoient ou cachoient esdi es nues, lesquelz comme timide regardoient par entre les nues. Lon voioit illecq Jupiter moult irez, empoignant le fouldre en sa main, & en estendant le brach, ieectoit iceulx Geantz du hault en bas a terre: lon les voioit illecques (tous fulminez de la fouldre) euomir flambes ardentes par les yeulx, par les aures, par la bouche, & par les narines, semblablement esprins par tous les couditz du corpz des raidz de la fouldre. Aussy lon voioit l'Aigle par grandt yre, puis l'ung puis l'autre empoigner de ses griffes treshorriblement dedens la chair, les deschirant cruellement & leur donnant plaies sanguantes, & auoit telle inscription: NE TEMNITE DIVOS. qui vault en Franchois:

Ne vœulle pas contempner Dieu.

Consequemment en vng aultre parcq gisoit vng grandt & horrible Geant ayant beaucop de piedz & mains avecq vne montaigne ardante sur son corpz, sortans par tout de son corpz flambes ardentes, & estoit le nom de ce Geant Encheladus, lequel Iuppiter, pour ses iniquites & malefices a fulmine par la fouldre, luy posant sur son corps la montaigne Ætna tousiours bruslante, & icy estoit escript telz motz: MAGNA POEN. &c. qui signifie en Frâchois:

Grand pugnition, grand louenge.

A l'opposite dudit geant en vne aultre parcq, estoient painctz les figures de certains hommes vertueux, portantz robes longues, liez a vne estace dedens vng grand feu, cez eulx au dict feu gisoient diuerses sortes de liures. Et vne moult belle dame aupres d'eulx, tenant devant eulx certains liures, ayant aupres telle inscription: INTERIM VIVITE LÆTI. c'est a dire:

Ce pendant vifuez ioyeusement.

Item en vng aultre parcq, diuers hommes nudz, vieulx, ayans barbes longues & laides veues, enuironnoient vne moult belle & iofne dame a demie nue, l'ung l'empongnoit par les cheueulx, l'autre par le vescement, le tierch par le brach, le quatriesme par la poictrine, & ce par violence, auquel estoient ces motz escriptz: NESCITIS QVID PETATIS: qui vauldt aultant,

Vous ne scaues que vous demandez.

Et consequemment, a l'opposite dudit parcq en estoit vng aultre, auquel auoit vng Prince non dissemblant a nostre Empereur, aiant vng heaulme antique sur son chief, & consequemment aornez d'armes anticqs, & estoient de belles dames aupres de luy, l'une avecque vne espee nue, l'autre avecq vne balance en la main, & deuant luy estoit vne iofne vierge a mains liee, laquelle en desliant deliura, aiant telle inscription: LÆTARE AMICA MEA. c'est: M'amie esiouys toy.

Tout ce que dessus est dict, se pouoit veoir au parcq du premier planchier,

Or sensuyt ce qui estoit a veoir au seconde planchier ou solines.

Premierement, En vng grand parc, auoit vne forge du Dieu Vulcan de deux enclumes: Sur l'une des englumes forgeoit Vulcan auëcque ses forgerons que lon nomme Ciclopes, chascun aiant vng œul au frond: & sur l'autre enclume forgeoit Venus, avecq son petit Cupido aiant aesles, & estoiet tous nudz, forgeantz diuersses armes de fers ardans: laquelle estoit chose moult triomphante, a veoir iceulx grans hommes nudz de leurs fors braches leuer lourdz & gros marteaulx de fer, & aupres madame Venus, le tendre & petit Cupido, avecq ses petitz brach soubfleuant vng marteau de petit poix, et forgeant vng grandt fer rouge sur vne grande pesante enclume, avec telle inscription: ET VENVS ARMA PARAT. &c. qui vauldt a dire:

Venus & l'enfant Cupido, aprestent aussy des armes a l'homme.

Et en vng aultre parcq auprez d'ycelluy estoit a moult grandt traueil faicte le nauire de Iason, nommée Argo, avecq lequel nauire il concquist la Thoison d'or: iceulx ouuriers dudit nauire, estoient a lœul faict moult grans mais le nauire (selon proportion) estoit a la perspective trespetitte, & aupres estoient iceulx motz escriptz: ERIT ALTERA QVAE. &c. c'est a dire:

Vng aultre Argo sera faicte quy portera les preefleuz.

Item dedens vng parc aupres d'ycelluy, estoit Iason armé a l'antique, avecq ses gendarmes armez, a brach estendu tenant vn glaive nudt, qui de la main gauche arrachoit d'ung arbre vne Thoison d'or, lequel estoit poursuyuy d'ung dragon iestant feu & flambe: auprez duquel estoit escript:

QVOD MEVM EST, quy vault a dire: Ce quy est mien.

Item de rechief vng aultre parc. auquel estoit la figure de Triptolemus, hōme a demy nudt, ayant vng habit verdt, assis sur vng chariot, lequel estoit conduict de deux Griffons noir vollans aux nues, aiantz dedens vne malle espicz de blest

meur

meurs, semant iceulx espicz de bledt a main ouverte en layr, et aupres inscript:

N I L V I R T U T E F E R T I L I V S. qui signifie:

Riens plus fertile que vertu.

Dedens vng autre parcq estoit hault figuré vng hōme entres les nues tout nudt, portant barbe longue, et longz cheueulx iusques aux espaullles, marchāt de l'ung des piedz sur la rondeur du monde, & de lautre piedt passant oultre, portant sur les espaullles vne grande pierre noire toutte quarree, nommee Terminus, en laquelle estoit escript: **E G O S E M E L.** &c. qui vault a dire:

Iadis ie ne voulus ceder a Iupiter le grand Dieu, Mais maintenant te vœul donner lieu, & fuyr hors du monde.

Au dernier parcq, estoient figurez ix. iofnes vierges sœurs, nommées les nœuf Muses, filles de madame Memoire, nues a demie, ayant chascune coronne de laurier sur son chief, le Dieu Apolo entre elles iouant sur sa harpe, semblablement lesditz ix. Muses doulcement iouant sur toutes manieres d'instrumēts, Aupres de quoy estoit escript : **I M M O R T A L I R E R V M M E M O R I A E.**

qui vault a dire: A memoire éternelle.

Tout ce que dessus est dict, se voioit au dessus des solines ou planchiers,

Or sensuyt aucunes choses qui estoient en chascune gallerie a costé du passage de l'Arch, lesquelles estoient telles que sensuyt,

Premierement, au premier costé dudit Arch par dedens la gallerie entres le pilliers estoient deux grādz trofnes ou tribunals, c'est à dire, place concavee, ou lon soloit poser ymages entaillees: Au premier tribunal estoit posée vne grande statue ou ymage, ayant la figure du Dieu Janus a deux faces, portans dessus son chief vne couronne a l'anticque, aiant longz vestemens, de couleur bleue, et fouré de rouge, tenant en sa main dextre vng sceptre d'or, et en sa gauche deux clefz d'argent: & a vng costé de lui estoit escript,

A P E R I O, a lautre, **C L A V D O.** qui vault: Je ferme & ouure.

Et au dessus de son chief en vng parcq quarré, au dessoubz du planchier estoient escriptz iceulx motz : **I L L E E G O I A N V S,** &c. qui vault a dire:

Je suis celluy Janus portier de tout le monde vniuersel, quy ay a ton Pere (o trespuissant Prince) si souuent ouuert la porte a grandz & magnanimes faictz, quy viens de bon cœur a l'encontre de toy, entrant en ceste tienne cité florissante, o vraye bague d'or a ycelle nostre aage.

Dessoubz ledict Janus dedens vne grandt pierre quarree, estoient artificiellement esmailliet de peinturie vmbrageuse, Saturne & Janus, tous deux nudz en semblance d'hommes vieulx, donnant la main l'ung a lautre. Semblablement le Dieu Tiberinus aussy en semblance d'ung viel et ancien homme estoit illecq assis, gisant a demy, espandant d'une grande cruche forche eauë, aussy une loupue prosternee aupres dudit Tiberinus, alaiçans deux iofnes

¶ petitz enfantz nudz. Moult de nymphes meslees entres enfantz abatoient
(sans quelque reprinſe) les fruidz des arbres. Aupres de ce estoit escript:

I AM REDDIT & VIRGO. &c. qui vault a dire:

Or est maintenant de rechief venu la vierge (equité,) Or est
derechief venu le regne Saturnien (cest a dire, l'age d'oré.)

En l'autre tribunal a l'autre costé de l'Arch, estoit en leau sur deux gros
cheualx de mer vne grande statue ou ymage nue du Dieu Neptunus ceinet
d'ung grand drap de joie, trauersant depuis l'une espaule iusques au piedt,
tenant en sa main droicte (affin de regir iceulx cheualx) vng grand tripple
fouet, & a main gauche vng trident asscauoir son Sceptre marrin avecq vng
grandt & long bourdon. A costé de luy estoit escript: IMAGINES REDDO.
qui vault: Le rendz ou produitz similitudes.

Et au dessus de son chief en vng grand parc quarré au dessoubz de la vaul-
sure estoit escript ainsi: NEPTVNVS EGO. &c. qui signifie:

Je suis Neptune Roy de la grand Mer, quy faietz trembler la ter-
re, quy regis le grand Sceptre trident: sy tu as entreprins quelque
choſe, digne de ta prouesse, (o Adolescent incomparable) voicy
ie t'ay tottallement & entierement préparé la Mer.

Au dessoubz dudit Neptune, dedens vng grant parc quarré, estoient di-
uers demy hommes & demy poiffsons, Dieux marins, & aultres chosés marines
faictz de paincturie vmbrageuse moult artificielle, lesquelz s'entre ruoient,
& tous par maniere de iœux de toutes sortes de poiffsons, esueillans aulcuns
d'entre eulx vne Nimphe de mer, laquelle sembloit par forche de dormir estre
noiee, & le tout sy au vif que c'estoit chose moult triumphante a veoir. aupres
de laquelle estoit escript: EMER SERE FERI. &c. qui vault a dire:

Hors des eaues se sont leuees estranges manieres de Dieux de mer,
& de l'Homme present se sont esmerueilliees les deesses de mer.

Dedens icelle gallerie au dessus de l'entree de l'Arch auoit deux nymphes de
grandeur de moienne personne humaine, reposant ou ſe courbant ſur la rondite
de l'entree de l'Arch, aiāt les girons plain de roses, ionchāt de la main au bordt
ou molure dudit parcq, auquel lon pouoit lire telle chose:

INGREDERE ET VOTIS. &c. qui vault a dire en franchois:

Sois le bien venu, & foies mansuet a tes ſubieſtz, o toy
chier filz de Dieu, o toy grand accroiffement de Dieu.

DEdens les galleries de la face de derriere, auoit deux moult grandz &
riches tribunauz: en l'ung auoit vne grāde ymaige entaillée, du pasteur
nommé Argus: tous ſes membres estoient plains d'yœulx: & auoit en ſa main
vne longue houllette ou baston paſtoural. & au dessus d'icelle statue estoit es-
cript: QVIS MIHI NVNC TOT LVMINA. &c. qui signifie:

Quy est ce, quy pour l'heure n'est enuieux de la multitudē

de mes yeulx: ou pourquoys ne doibz ie soubs haidier des yeulx
plus grand largesse:

Dessoubz icelluy tribunal en vng grād parcq quarrē auoit vng Mercure faict
artificiellement umbragie, doulcement iouant sur vne flute, & aupres de luy
Argus dormant par la vertu de l'armonie de la flute: aupres duquel estoit vne
belle & blanche vache bien grasse. Aussy y estoient Iupiter & Juno assiz en
vne nue, regardans par grandt plaisir le ioueur Mercure, Argus dormant, &
la vache quy illecques estoit. En la mollure dudit parcq estoit escript,
NON OMNIBVS DORMIO. qui vault a dire en langue franchoise,

Le ne dors pas pour chñ, & quandt pour chñ ie dormiroie, sy veille
ie toutefois maintenāt pour chascū, & le tout pour vng seul hōme.

En laultre tribunal auoient les ymaginiers erigé vne statue ou ymaige d'vng
grandt Dieu nommé Pan, sus bout droict sur ses piedz, regardant droict vers
le ciel, aiant deux cornes de boucz sur son chief, & piedz de boucz, enuirōnez
de la peau d'une biche pintelee, plain destoilles luissantes sur sa poitrine, aiant
en sa main dextre vne septuple flute, & a main gauche vng droict baston ou
verge. Sa face estoit totalement rouge, comme s'il eusse esté painct de migne.
au dessus de luy estoit escript: **GRATVLANTE NATVRA**. qui signifie:

A toutes gens par gratulation de nature font ses sept
cieulx (des Planettes) modulation nouuelle.

Dessoubz icelluy tribunal auoient les painctres umbragée & richement
amailliet certains Satyres, entre lesquelz plusieurs par force rauissoient por-
tans sur leurs espaulles vne moult belle Nymphe, & les aulcuns en sembloient
voulloir rauir vne aultre, laquelle incontinent fust transmuée en cannes ou ro-
seaux. Aupres d'icelle estoit vng hōme nudt, seant sur vng grandt escu rond
qui tout ce regardoit. Aussy lon voioit illecq voller en layr le petit Cupido, aiāt
son arch bendé. Iouxte icelle paincture estoit ainsy escript :

ITA OPERE MEO ELECTOR &c. qui vault a dire.

Iay telle delectation en mon ouuraige, sy que ie le voy
tresvouluntiers, & me rendz tresvouluntiers vaincu.

Audeffus de l'issue de l'arch estoïet faictz artificiellement de couleur de cuypure
deux grandes figures de Fama ou renommée sonnant chascune vne buccine ou
trompette. & auoit telle escription, **HIVS IN ADVENTVM**, &c. qui vault:

A la bien venue de ce Prince tremblent desia les Tarta-
res, Schitiens, & ceulx qui sont habitās en Egipte au Nil.

¶ Et au dedens du passaige dudit Arch triumphal.

A Dextre estoient moult riches & triumphantes painctures & histoires,
assauoir, diuers Dieux & Deesses de Mer vieulx & iostnes, tous nudz
entre eux s'esbatant sur les vndes de la Mer, avecques plusieurs espoentables

monstres de Mer, triumphat selon la nature marine, aornez de petitz poissos, de monstres, escreuices, de ionchz de roseaux et aultres telz aornemēs marrins.

A gauche lon voioit pareillement satires fauluages & Nymphes champestres soubz l'vmbre des arbres, se iouans ensemble par moult grand passetempz, dansant, faultans & faisant ionchees de roses. Icelles Nymphes estoient aornees de beaux flocquartz ou chapeaux de roses, les Satires de leurs cornes de boucz.

En hault a la vaulsure dudit Arch triumphal estoit fait le ciel & les nues, esquelles nues estoit assise la Deesse de l'air Juno, aiant autour d'elle les grādz & petitz vendz, membrez comme geantz tous nudz, & de plaine bouche soufflant violentement. Au desoubz de ces trois figures estoit escript: A S P I C E.etc.

Regarde comment toutes choses, asscauoir, ciel, terre, & mer, sesiouissent en ce treslouable Philipes.

Ycelluy bel, sumptueux, & artificieux ouuraige fut cōmencé le. xvij^e. d'Aoust, & paracheué en. xvij. iours. Auquel ouuraige furent .ij^c. lxxx. ouuriers, tant artistes qu'aultres, & a cousté a la Nation nœuf mille florins Carolus.

L'Arch triumphal de la ville, situé en la rue des tanneurs, alias Huydevettersstrate.




Pres estre passéz le merueilleux & sumptueux Arch triumphal des Geneuois, enuiron de. xl. pas. Au cōmencement de la rue nommée la rue des tanneurs, l'on a rencontré vng aultre Arch triūphal d'une entrée & yssie, en haulteur (y comprins les eleuations de l'eschaffaultz & figures sur icelluy posees) enuiron de .lx. piedz, & large de .xxx. piedz, sur lequel l'on pouoit veoir icelles figures: SCHALDIS, quy est la riuiere prenant son cours au piedt de la ville d'Anuers, q̄ lon nomme en langue thioise Scheldt, estoit en semblance d'vng homme grandt ou long de .x. piedz, assis dedens vng boddequin ou nauire d'or, longue .xx. piedz, lequel estoit tout nudt, excepté d'vng grandt drap de soie verte, lequel il portoit en escherpe sur ses espaullles, ayant son chief aorné de roseaux & aultres herbes marines.

Cez luy sur le bort de son boddequin ou nauire estoit assise ANTVERPIA, en telle sorte & maniere, cōe nous l'auons dessus escript au premier eschaffault.

Deuant celluy Scaldis, au bas du nauire auoit deux Tritons, q̄ lon nōme Cheuilliers de mer, & estoient iceulx tritons deux homes vifz & nudz du nombril en bas cōme gros poissos de mer, chascun sonnant vne trompette a plaine bouche, artificieusement couverte & cachée d'une grosse corne de mer. Dessoubz cestuy nauire en la mollure estoit escript en grosses lettres en telle sorte, OMNIVM BON.etc. qui signifie, Scaldis amenāt toutes sortes de biens.

Sur ledict eschaffault, au dessus du nauire lon voioit Mercure dieu des marchandz, avecq ses taillades, sa caducée, & son chapeau, aorné de deux aesles, tenant d'une main vne grande boursse, étant debout sur certains pacquetz de marchandise.



*La haulteur
.lx.piedz.
Le proffondt
enuiro.xxx.
piedz.*

G ij

De l'autre bout lon voioit Negotiatio, cest a dire, Marchandise, en semblance de femme marchande, estant debout sur pacquez marquiez & moult bien liez, ayant autour d'elle diuers libures de comptes, tenāt en sa main vne grāde bourse marchande, missiues closes, obligations, & cedulles. etc . ayant vne plumie a l'aureille. Entre ledict Mercure & Negotiatio, estoient vng petit en descendant , en semblance de femme, les cinq principales Nations des Marchandz tenans leurs residence en ceste ville , Asscauoir,

Les Allemans,
Les Italiens,
Les Espaignolz
Les Portugallois &
Les Anglois.

Ieulx tous tant pour ce que chascun auoit son nom par escript, que pource q chascun auoit son accoustrement, estoient trespoidamment a congoistre.
q Ce q ces choses signifioient, lon le pouoit facillement entendre par l'escripture mise a la molure de leschaffault, sonnat ainsi: FORMOSA ANTVERPIA &c.

La belle Anuers, Scaldis son mary , Marchandise , les Nations Marchades, Mercure gouuerneur des Marchandises, (nō doutans de n'estre prosperat ou heureux soubz vng tel Prince pour l'heure entrant en ceste sa cité) par grandz desirs le receoipuent.

Au dessus de ladictē mollure en vng tabbleau quarré estoit escript:

VBI BONVS PRINCEPS &c. quy signifie: La ou vng bon Prince est present , toutes choses sont prosperes & heureuses.

La Gallerie triumphalle des Florentins

 Pres estre passe ledict Arch triumpal en uiron de .lv. pas, voicy que au milieu de lad' rue (que lon dict la rue des Tanneurs cōme dessus) estoit vng merueilleux, et sumptueux ouuraige erigé, en forme d'une grande Gallerie, faicte et bastie de ceulx de Florence a la bien venue de nostre Prince tresdesiré, selon la denotatiō de leur inscription, et estoit ycelle Gallerie du tout en tout faicte a la Corinthe, Laquelle Gallerie auoit deux faces, l'une a l'entrée, & la seconde a l'yssue ou sortie de ladictē gallerie.

Chascune face auoit trois portes quarrees. La porte du milieu estoit large xiiij.piedz, & haulte .xxvij.piedz. Les deux petites portes ou huychetz estoient chascun large de .vij. piedz, & hault.xiiij. piedz.

Tout cest ouuraige continuoit entierement en largeur.L.piedz, en haulteur ou altitude.LX.piedz, & en proffondeur .C.xxx.piedz.

 Chascune face estoit aornée de quatres Colonnes a la Corinthe, canellées et leurs concuite artificiellemēt engrauée sans les pillastry qui estoient derriere chascune colonne, les quelles Colonnes contenoient depuis la terre iusques

aux

aux Corniches ou summitez en haulteur. xlviij. piedz.

Depuis la porte de la premiere face , iusques a la porte de la seconde face , estoient en moult riche & belle ordre aultres semblables Colomnes ensembles leurs pillastryes, asscauoir , six du costé dextre & six a senestre.

La distance d'entre chascune Columne, estoit de .xx. piedz, entre lesquelles distances estoient Exedre, cest a dire, places pour soy seoir de trois degres, lesquelz estoient de raisonnable haulteur & largeur:

Dedens chasque porte de la premiere & seconde face, estoient interposez Pilliers sans Colonnes, ce non obstant que l'œuvre le requist, mais a cause de la briefuete du tempz, ne pœulrent estre posez. Tout ycelluy œuvre estoit de couleur de marbre blancq, toutes les volutes, fœulles, stryes, spires, & tous yteulx paremens reluisoient d'or, quy estoit chose moult triumphant a veoir.

Aussy iceulx pillastryes estoient marbrisées de diuersses couleurs, lesquelz auoient tous en vng circle les armes de Florence. Tous Piedestals (asscauoir la Basse de chascune Coulonne) auoient en vng circle de peincturie, les aulcunes S.Iehan Baptiste, en forme d'vng petit enfant, les aultres vng petit aigneau blancq, portant vne baniere blance, & dedens vne croix rouge: les aultres les armes de Florence, & les aultres les armes de la maison de Medicis. Les Architraues ou poultres ensemble leur Cornices ou Cimation, tant dehors, comme dedens la Gallerie, estoient fait sy triumphalement, qu'il se demonstroient au dehors des mollures bien trois piedz, laquelle estoit chose tresmagnifique a regarder.

La moullure dessoubz lesdictz Architraues, auoit trois piedz en haulteur, aornée moult triuphamment d'escarlate rouge, ensemble de moult grosses testes de lions par dessus, ayant chasque teste de lion vne bande ou iartier d'or clicquant, passant ou trauerſſant les testes d'yeulx.

Au dessus de la porte du milieu de la premiere face, dedens vng grand cercle azural, estoit escript en lettre d'or, DIVO PHILIPPO MAG NO, &c.

Au grandt Philippes, filz de l'Empereur Charle V^e. a sa bien venue ont ceulx de Florence fait celluy œuvre, & ce par moult bon vouloir.


Dessoubz la supercille de lad' porte, pendoient les armes du Prince, avecq vng Aigle noir, a deux chiefz, ayant ses aesles estendues.

De chascun coing en hault de la dessusdicte porte, pendoit vne tresgrosse verdure ou ivie, estendue a l'entrée, sy que tout le passage en estoit, comprins comprendant de son demy circle les armes du Prince.

Entre les deux Coulomnes premières en hault, estoit vng tribunal dazur quarré, auquel tribunal estoient posez statues ou effigies de deux Euesques, l'une (selon l'ostension de l'inscription) estoit S. Zenobius, & lautre S. Antonius, tous deux iadis Euesques de Florence, bien congneu de vie tressainte & remplis de Diuine doctrine, cez eulx estoit escript: OB VITÆ AC MO. &c.


Par bien & vertueusement viure, acceptez du nombre des Sainctz.

L'Ichnographie de la Gallerie ou Porticus des Florentins.



La Gallerie triumphalle des Florentins, a veoir par dedens & dehors.

La largeur.L.piedz.
La haulteur.lx piedz.
Longeur.C.xxx.piedz



Entre ces coulomnes, en bas, droict sur les portes lateralles, auoit pareillement vng tribunal quarré de couleur azuralle, & dedens ycelluy vne statue d'argent, nommee Religio : & au dessoubz estoit escript:

HÆC EX HOMINIBVS DIVOS FACIT. en nostre vulgaire:

Icelle fait d'hommes Dieux.

Entres les deux coulomnes de devant a coste gauche, auoit de mesme deux tribunaulx d'azur, fait en forme quarrée, au supérieur auoit deux princiiales statues d'or, l'une du tresmagnifique Messer Iohan de Medicis, & l'autre du præux & vaillant Capitaine Philipe Spane Scolary, avecq telle soubscriptiō:

DVO FVLMINA BELLI. quy vauldt a dire en vulgaire:

Deux fouldres de guerres.

Au tribunal inferieur, estoit construite & esleuee vne statue d'argent, de Force ou Fortitude, ensemble telle sentence: E G O H E R O A S C R E O. c'est:
De moy sont creez Capitaines

Au plat du frontispice, par dessus l'architraue, auoit vne statue ou ymaige d'argēt a cheual, portat effigie de Cosmus Medices, Duc de Florence, en harnois d'or, sengles, briddes, &c. de son cheual aussy toutes d'or moult triumphant.

Au dessus de l'architraue, a chascun coing, estoit colloquée vne ymaige ou statue d'argent toute nue, l'une de la Riviere Arnus, l'autre de la Riviere Munius, quy espandoient eauie argentée de cruches d'argent.

Dessus l'accroterie ou stipille du frontispice, estoient posez deux lions d'argent, & tenoient chascun vng fust, auquel auoit vne banniere, en l'une desdites bannieres estoient les armes du Duc, & en l'autre les armes de la ville de Florence.

En hault au dessus de la summite de l'eleuation, estoit posée vne ymage d'or, richement entaillee, de S. Iehan Baptiste, aiant Mars soubz ses piedz, car au parauaut que la cite de Florence eust accepte Christ, ilz auoient & tenoient Mars pour leur Dieu, et auoit vng temple dediez a l'honneur d'ycelluy, lequel temple a este depuis dessacrez, & en lieu de Mars ont accepte pour leur Patron, Monsieur S. Iehan Baptiste.

La face seconde auoit aussi trois portes, coulomnes, pillastryes, inscriptions, tout en maniere semblables comme la premiere. Au dessus de la porte moyenne estoient les Armes du Prince a grandz festons & verdure, le tout comme a la premiere face. Au dessus de chasque porte lateralle, estoient faitz deux tribunaulx d'azur, en forme quarrée, selon la premiere face, au tribunal superieur a coste dextre estoient en vestementz longz trois ymagies ou statues d'argent a la semblance de trois excellentz & renomez Poëtes, affcauoir, Dantes, Petrarche & Boccace, ensemble telle inscription:

PII VATES ET PHOEBO DIGNA LOQYVTI. quy vauldt:

Poëtes singuliers qui ont descript choses dignes de Poësie.

Au tribunal inferieur, audict costé estoit colloquée vne statue d'argent de la Deesse Pitho, en semblance de femme, monstrant manieres des doigtz comme vne personne qui persuade, ou donne conseil, car elle est tenue pour Deesse de Conseil. au dessoubz d'elle estoit ainsi escript:

QVID HAC EFFICACIVS. qui vauldt autant:

Quoy? de plus grande efficace que celle?

Au tribunal superieur a costé gauche, estoient posez deux incomparables lumieres en paincturie, tous deux Florentins, asscauoir, l'ung nomme Iottus, & l'autre Michiel Angelus Bonarota, tous deux richement & sumptueusement argentez: Soubz lesquelz estoit escript:

HIS CEDAT ZEVSIS, CEDAT TER MAGNVS APELLES. c'est:

En sciences, yceulx surpassent Zeusis & Apelles.

Au tribunal inferieur du costé predict auoit vne statue au ymaige collocquée de la Deesse Industrie, qui vauldt a dire, Subtil ou scientificque engin, laquelle tenoit entre ses mains vng compas d'or, vng lineal, & vne esquerre d'or, ensemble telle soubscription : ARTIVM PAREN S. qui vauldt a dire:

Mere des Artz ou sciences.

Au plat de l'eleuation au dessus des mollures estoit vne statue du filz du Duc Cosme le tout d'argent monté sur vng cheual d'argent.

Sur le coing de l'architraue a coste dextre, pouoit lon veoir vne statue de la riuiere Elsa, et a gauche vne statue d'argent a leffigie de la riuiere Sieue, toutes deux d'argent, & nue, verssant ou espandant eauë d'une cruche d'argent.

Dessus l'accroterie ou stipilie du frontispice, estoient posez deux lions d'argent (a la maniere de la premiere face) vng chascun portant banniere, en l'une estoient les armes de la ville de Florence, & en l'autre les armes du Duc.

Au sommet de l'eleuation, estoit posée (en semblance d'une dame) vne statue d'or, entaillee a leffigie de la cite de Florence, portant vne fleur de litz rouge.

Sensuyt ce qui estoit a veoir au dedes d'icelluy portique ou deambulatoire.

A *V* *dessus de la porte moienne, a la premiere face, lon voioit les armes de la Royne Leonore, semblablement au dessus de la porte moienne, de la seconde face, les armes de la Royne Marie, a chascune face en dedans auoit quatre tribunaux quarrez, de couleur d'azur, lesquelz estoient (au moien de la celerite du tempz) tous vuydz, sans quelques ymaiges ou statues.*

Pardedens ycelluy deambulatoire estoient construictes xij. coulomnes, muni-es de leurs pillastryes comme dessus (asscauoir) six a vng costé, et six a lautre. Sur chascune de ces coulomnes singulieres, auoit diuerses & singulieres statues d'argent, figurant les xij. citez, subiectes a la Duche de Florence, toutes en similitude de belles dames, & touchoient du chief la mollure superieure, & estoient icelles ensuyuantz:

Pise.	Aretium.
Volaterre.	Pratum.
<i>Au costé</i> Cortona.	<i>Au costé</i> Politianum.
dextre. Burg. S. Sepulch.	<i>gauche.</i> Villa noua.
Castrocarum.	Pescia.
Fesule.	Empoli.

Entres chascunes Coulomnes, de hault en bas, iusques aux Exedres ou sieges, estoit a chascun costé dudit deambulatoire richement et sumptueusement tendu, asscauoir, partie de drap d'or, partie de satin crāmoisy de diuerses couleurs, & partie de riche tappissérie de moult belle histoire enrichié et estoffée.

¶ Aacheuer icelluy oeuvre, estoient .C. xx. Artistes au dessus de tous aultres ouuriers & mechanicques. Et quelle despence ou coustaige, q a este fait a icelluy œuvre, pœult vng chascun bien considerer.

L'eschaffaulx triumphal basty de la ville sur le pont marin, vulguairement, Meerbrugge.



E la rue des Tanneurs predicte, tirant du coste de septentrion, lon vient a arriuer sur le pont Marin, que pour le present est appellé le marchiet au bledt, vng lieu grandt & spacieux : sur lequel lieu en passant, lon a veu a dextre vng moult bel Eschaffaulx triumphal, distant du porticque ou deambulatoire des Florentins, enuiron de.lxxx. pas, ayant ledict spectacle .ix. Architribunals. Icelluy Spectacle contenoit en largeur enuiron .xciiij. piedz, & en totalle haulteur (y comprins le compariment du meilleur) enuiron .lx.piedz, & le tout par ingenieuse Architecture que lon nōme Composita. Le Tribunal du millieu (comme assez appert en la figure suyuante) estoit plus hault, & plus large, que nul des autres, en sorte que sa haulteur surpaſſoit les Cornices, bien de .vij. piedz, & les autres ne se esleuoient, q iusques au Mollures, ou Epistylle. Soubz chasque tribunal auoit vng grandt parcq quarré pour y escripre. Dedens chascun tribunal (le tout a l'occasion, ensemble a l'honneur du nom Princial de Philipps) auoit vng personnaige, asscauoir, des plus vertueux & renōmez personnaiges ou Princes, quy ont porté le nom Philipps, ensemble leurs noms & tiltres escriptz, es parcz predictz en dessoubz eulx : Le premier estoit philipe nostre Prince, en veste-mens royaux, ayant vne espee a son costé, tenant vng Sceptre d'or en sa main, vne couronne d'or sur son chief, & estoit au millieu (cest a dire au plusgrandt tribunal) de tous les autres Philipps, ayant soubz soy pour tiltre:

PHILIPPVS PRINCEPS, &c. quy vault en langue vulguaire:

Philipps nostre tresdesiré Prince, filz de l'Empereur Charles. V^e. tousiours Auguste, du bien fortuné monde grande expectation.

¶ A son costé dextre estoient iceulx personnaiges vng chascun en son ordre.

S.Phi-

S. Philipes Apostre, en vesteinentz Apostolicques, cōme on le souloit paindre,
asscauoir, vng chief radiant, tenant vne croix d'or en sa main, ensemble au
deffoubz telle subscription : SANCTVS PHILIPPVS, &c.

Saint Philipes Apostre de Christ, de Bethsaida en Gallilee,
premier de Christ inuocqué, fiche en croix en Azie.

Apres estoit en son tribunal Philipes Roy de Castille, &c. ayeul paternel de
nostre Prince, ayant couronne, sceptre, & espee, pourtraict au vif, & en des-
soubz telle inscription : PHILIPPVS HISPAN. REX &c. a dire:

Philipes Roy d'Espaigne, filz de l'Empereur Maximilian, Pere
de l'Empereur Charle. V^e. desir du monde, & amour de sa patrie.

Apres icelluy suyuoit, Philipes Empereur de Rōme, a teste raize, & par dessus
vne couronne de Laurier, portant vng manteau court, & son vestemēt interi-
eur selon l'vsage Anticq de Rōme, avecq telle inscription: PHILIPPVS IMP.

Philipes Empereur de Rōme, Arabiens, premier entre les Cesars,
prenant la foy de Christ, cauteleusement occis de Decius Cesar.

Apres icelluy, suyuoit Philipes de Macedonne, Roy de Grece, acoustre selon
l'vsage des Gregz, sur son chief vng chapeau long a la maniere des Gregz,
ensemble barbe Gregeoise, & espee de mesme vsage, ayant sur son chapeau
vne couronne Anticque, & dessoubz soy telle inscription :

PHILIPPVS MACE DON. REX, &c. quy vault autant:

Philipes Roy de Macedonne, Pere du grandt Roy
Alexandre, prosperant & tresheureux en victoire.

¶ Et a main gauche, estoient autres quatres Philipes, comme sensuyt:

Premierement, S. Philipes Diaque, en vesteinentz de Diacque, ayant raidz sur
son chief, & en dessoubz soy vng telle inscription:

D. PHILIPPVS DIA CONVS, &c. quy vault autant en vulgaire:

S. Philipes, Diacque, l'ung des sept esleuctz, (avecq S. Estiēne) a l'estat
de viduite, qui cōuertit les Samaritains & Baptisa Eunuch Ethiopiē.

Secondemēt, Philipes Duc de Bourgongne troisieme, vestu de vesteinentz
a la maniere Anticq, portant la Thoison d'or a son col, ensemble telle inscrip.

PHILIPPVS COGNOMENTO BONVS, &c. quy vault a dire:

Philipes, que lon nomme le bon, Duc de Bourgoigne
filz du Duc Iehan, Pere du Duc Charles.


Tiercement, Philipes Duc de Bourgongne secondt, vestu de vesteinentz
selon son vsage, le tout pourtraict au vif, & dessoubz soy telle inscription:

PHILIP. DVX &c. Philipes Duc de Bourgongne, filz du Duc Anthoine.

Quartement, Philipes Duc de Bourgongne premier, demonstrant face ve-
nerable aussy vestu a la maniere Anticque, & dessoubz soy telle inscription:

*La figure de l'eschiffaulx de la ville
sur le Meesbrugge.*

Haulteur
.lx. piedz.
Largeur
xcvij. pied.



H iij

PHILIPPVS DVX BVRGVNDIÆ, &c. ou en vulgaire;

Philipes Duc de Bourgongne, surnommé
le hardy, filz de Iehan Roy de France.

En la mollure, au dessus desdictz tribunaulz, auoit escript en telle sorte:

S A L V E M A G N E O P H I L I P P E , &c. ou en vulgaire:

Salut a toy (O Philipe entre tant d'illustres & preux Philipps) le plus conquerant, tant par les faictz illustres de tes Ancestres, & par presaige de ton estre, qu'aussy par souueraine expectation que lon a de toy.

Dessus iceulx .ix. parcqz quarrez, icy mentionnez, au dessus de la Cornice, estoit escript telle sentence: ILLVSTRIVM NOMINVM, &c.

La semblance des noms illustres, est vng picquant esporon pour les ensuyuir en vertu & prouesses.

¶ Aiant passé icelluy sumptueux & magnifique Spectacle, lon est venu arriuer, au pont de Saincte Katherine, lequel est enuiron distant, de cent quarante pas, du precedent pont marin.

L'Arch triumphal, basty de ceulx de la ville, au pont de Saincte Katherine.



VR ycelluy pont (asscauoir, a l'entree de la rue, appellee vulgairement De wingaerde veste) estoit basty & erigé vng moult triomphant Arch triumphal, asscauoir de vng passaige, & pardessus icelluy Arch triumphal, auoit vng eschaffault, auquel estoient demonstrez, grandt multitude de personnaiges, lequel contenoit (asscauoir icelluy Arch triumphal, comprins les compartimens) enuiron en haulteur lxx. piedz, & en largeur de .xl. piedz.

Sur leschaffault dudit Arch triumphal, lon vooit la remonstranche, d'yeulx personnaiges, comme sensuyt:


Plausus,
Alacritas,
Voluptas,
Exultatio,
Læticia,
Promptitudo,
Congratulatio,
Musica,
Harmonia.

qui signifient
en langue
vulgaire:

Joyeuseté.
Alacrité ou deduit.
Plaisance ou volupté.
Esiouissement.
Leesse.
Promptitude.
Congratulation.
Musicque.
Harmonie.

Tous lesquelz personnaiges, demonstroient par semblant, vng grand esiouissement, & estoient vestus de blanchz, ayans vng chascun sur son chief,

chap-



La haulteur
.lxx.piedz.
Largeur.xl.
piedz.

chappeaulx, ou courônes d'herbes et fleurs diuerses, ensemble a esles aux espau
les, de diuerses couleurs, chantans doulcement & artificieusement (a la louen
ge de nostre Prinche a sa triumphante entree) vne chanson musicalle a cincq
parties, en langue maternelle, sur diuers instrumentz, comme harpes, rebec-
quetz, violons, luthz, &c.

Au dessoubz d'iceulx gisoient (par semblant moult tristes) tresgriefuemēt
soupirant, & grondantz, iceulx personnaiges, asscauoir:

Dolor.

Luctus.

Tristicia.

Displacentia.

Melancolia.

Inuidentia.

Doleur.

Regret.

Tristesse.

Desplaisance.

Melencolie. (propre cœur).

Enuie. laquelle mengeoit son

En vng tabbleau, au dessus de la mollure de hault, estoit telle inscription:
SIMVS IO, SIMVS LAETI. &c. qui vauldt en nostre vulguaire:

Soions voire, o soions liez, chantons vne doulce chanson.

O soions ioieulx, de rechief, encoire de rechief soions esiouys,
fuyes d'icy, fuyez, tous doulleurs, tous regretz. car grāde leesse
nous aporte la presence ioyeuse de nostre tresdesire Prince.

Au hault de la mollure, estoit escript: EXPECTATE VENIS, &c.

Soie le bien venu secontd espoir ou reffuge de noz siecles.

En la supercille ou rotondite de l'Arch estoit: ECQVI D VS QVAM, &c.

Quelle chose doibt len plus desirer qu'ung bon Prince, & q̄ peult
estre a la commune plus vtille? plus plaisant? ou plus salubre?

L'Arch publique, basty & erigé au pont de la vigne.




Pres estre oultre passez icelluy predict spectacle, voicy, que incontinet, (asscauoir enuiron de .C. pas distans) s'est offert en presence vng Arch triumphal, asscauoir d'une entree & yssue, basty & erigé sur le pont de la vigne (que vulguairement lon dict wijgaert brugghe) contenant en altitude (y comprins leschaffault sur ycelluy compose) enuiron de .lxvij. piedz, & de latitude ou largeur .xl. piedz, lequel Arch estoit totalement basty par art d'Architecture, vulguairement appellee Composita.

Au millieu dudit eschaffault, auoit vne grosse globe ou boulle (figurant le monde) toute d'or, contenant en diametre .xij. piedz, quy porte pour la rondeur ou circumference .xxxvj. piedz.

Sur ycelluy monde estoit assise vne moult belle & ioyne vierge portant a esles, & vestue en vstemens d'or, tenant a main droictē vne verge d'or: aupres de laquelle vierge estoit escript: AEQUITAS, quy vault a dire: Equité.

A lenui-



Haulteur
lxvij.pied.
Largeur
xl.piedz.

A lenuiron d'ycelluy clobbe ou monde au dessoubz, estoient de toutes manieres de gens, allans, venantz, gisantz, iofnes, vieulx, hommes, femmes, filz, filles, aulcuns nudz, aultres a demy nudz, tous d'or, faces d'or, mains d'or, piedz, iambes, cheueulx & vestementz d'or, &c. Pres de ce pœuple aurein, auoit vne moult belle iofne vierge, sans mains, portant cheueulx d'or sur son chief, vestue de vestemens d'or, ayant auprez ou a costé d'elle, vng petit aigneau blanc sans cornes, & aupres d'elle estoit escript, INNOCENTIA, qui vault a dire, Innocence. En vng tableau quarré se pouoit lire telle inscriptio:

CERTVM EST AVGVRIVM. &c. quy vauldt a dire:

C'est vne certaine preuoiance, que toutes choses (estant soubz la magnitude de ce Prince) seront d'or: tout le monde aura vng regardt d'or, par tout naisteront pœuples d'or, tous seront siecles d'or, l'age de fer de soymesme cessera.

Item: DVCE HOC ET AVREA. &c. quy signifie:

Soubz ce Prince regneront partout tant equité d'or, que innocence aureine.

Au dessus de la supercillie de l'Arch estoit escript: TALIA SATVR. &c.

Telz siecles ont iadis estez soubz le regne du Roy Saturne.

D'icy lon est passé, tirant vers le pont des Cordeliers ou Freres mineurs, ainsi nomme, pource qu'entre ledict pont de la vigne, & le pont de la porte de la vache, est situé le Monastere des Cordeliers a l'opposite d'icelluy pont.

L'Arch triumphal publicque basty au pont des Cordeliers.



Vpres d'ycelluy Arch enuiron la distâce de C.XVij, pas du dessusd' pont de la vigne (a l'opposite du monastere des Cordeliers) estoit basty vng autre Arch triumphal, d'une entrée, sur leql auoit vng eschaffault & remonstrâce de personnaiges vifz, comme appert en la figure.


Ledict Arch(y comprins les coulomnes, epistilles, mollures, cornices & compartmentz) auoit en haulteur.lxx.piedz, & en latitude.xliij.piedz.

Sur itelle sentence demonstrez itieulx personnaiges comme sensuyt:

PAX, ou Paix, vne vierge vollant ou portant aesles, vestue de vestement de soie blanche, & par dessus son chief vng flocquart d'oliuier, portant en sa main vne branche d'olives.

LIBERTAS, ou Liberté, c'est a dire franchise, la personne d'une dame, portant sur son chief vng chapeau (a l'occasion de iadis quandt on foilloit af franchir ou donner liberte a vng esclave, on lui mettoit sur son chief vng chapeau pour vray signe de franchise) portant en sa main pieces de chaines rompues, submarchandt du piedt le ioug ou gorreau.


CONCORDIA, ou Concorde, vne moult belle dame, portant en l'une de ses mains



Haulteur
lxx.piedz
Largeur
xliij.pied.

La figure de l'eschaffaulx sur la Coepoortbrugge.

Haulteur
.lx. piedz.
Largeur
lxx.piedz.



mainz,vne paire de tourterelles:et en laultre main,vne corde tripplicee de trois cordons, au moien que Salomon (descripuant de concorde) dict, qu'vne corde tripplicee est difficile a rompre.

P O L I T I A,ou Pollice,c'est a dire bon gouuernement des citez,vne moult belle iosne dame, portant en sa main vne verge droicte.

C E R E S, la deesse de fruietz portant par dessus son chief,vng chapeau despicz de bledtz,vne faulx en sa main,et vne iarbe de bledt entres ses brachz.

C O P I A, ou Plente , vne moult belle iosne vierge portant en sa main vng grand cornet, remply de toute maniere de fruietz.

Q V A E S T U S,ou Gaignage,vng moult fort iosne hōme,aiant cez soy toutes sortes d'instrumētz duysantz & ppices a toutes sortes de trafficqs ou mestiers.

¶ Tous lesquelz (comme attendans tout heur & toute felicité soubz icelluy Prince) estoient moult liez & ioieulx.

¶ Soubz les piedz d'yceulx gisoient iceulx personnaiges.

M A R S, le Dieu de guerre armé, portant barbe rouge, ensemble vng beaul me sur son chief, vng dard en sa main, & vne moult grande espee a son costé.

F V R I A,ou Furie,asscauoir vne femme moult hideuse, portant couleuures sur son chief, & vng brandon de feu en la main.

R A B I E S,ou Enragerie , comme vne femme insensée , moult hideuse, se battant a moult grandz coupz de poinctz.

T Y R A N N I S,ou Tirannie, vne femme (a veoir) moult cruelle, vestue d'vng vestemēt tout sanglāt,sanglātes mains,et vne espee sanglāte toute nue.

D I S C O R D I A,ou Discorde, vne laide femme & hideuse a regarder, portant vng vestement deschiré & tout rompu.

A N N O N A, c'est a dire, Chieresse, vne maigre femme, moult famelicque.

I N O P I A, c'est a dire, Disette, ou pourete, en semblance ou similitude de vne poure femme mendiante.

Au dessus dudit eschaffault auoit vng tabbleau quarré, hault .iiij .piedz, Gl. irge .x .piedz. Auql estoit escript: **D V L C I S L I B E R T A S.** quy signifie

Doulce libertē, cōcorde, paix, ceres, bonne pollice, gaignaige, plan té,& habōdance de biēs, croisserōt soubz ce Prince. Mais guerre,furie, discorde, chieresse, & toute disette serōt liees de chaines,& mises soubz le piedt, itieulx siecles nous promet la prouidence celleste.

**L e schaffaux triumphal basty ou erigé
de la ville sur le pont de la porte de la vache.**

 Pres estre passez icelluy spectacle ou Arch triumphal, enuirō de.C. pas,est suuy le pont nomé vulguairement De coeportbrugge, ainsy nommé, pour ce que sur icelluy pont fust par cy deuant vne porte, nommée la porte de la vache. Sur lequel pont estoit basty & erigé, vng moult bel

bel & riche eschaffaulx, de trois grandz Architribunaulx, desquelz celluy du millieu estoit le maïeur, Icelluy eschaffaulx auoit en altitude (y comprins les coulounes & compartimentz) lx. piedz, & de largeur .lxx . piedz, comme assez appert par la figure precedente. Sur icelluy eschaffaulx auoit .x. personnes de dames triumphantes, representas les principales Prouinces de sa magnificēce, par decha la mer, chascune portant ses propres armes, cōe sensuyt

AUSTRIA
BVRGVNDIA
BRABANTIA,
GELRIA,
FLANDRIA,
ARTESIA,
HANNONIA,
HOLLANDIA,
ZELANDIA,
FRISIA.

Austrice,
Bourgongne,
Brabant,
Guelre,
Flandre,
Arthois,
Haynau,
Hollande,
Zeelande,
Frise.

Au tribunal du millieu, lequel (comme dessus est dict) estoit le plus grandt, estoient les quatres portans tiltres de Duché, comme sensuyt:

Austria. L'Archiduché d'Austrice.

Burgundia. La Duché de Bourgoigne.

Brabantia. La Duché de Brabant.

Gelria. La Duché de Guelre.

Au tribunal a main droicte, auoit trois personnaiges de femmes, chascune en son ordre: asscauoir, Flandria. La Conté de Flandres.

Artesia. La Conté d'Arthois

Hannonia. La Conte Palatine de Haynau.

Au tribunal a gauche, auoit pareillement trois aultres personnaiges de femmes:

asscauoir, Hollandia. La Conté de Hollande.

Zelandia. La Conté de Zelande,

Frizia. La Seignourie de Frize.

Tous lesquelz tiltres estoient escriptz de grosses lettres es parcz quarrez en dessoubz les piedz d'yeulx personnaiges, par dedens lesdictz tribunaulx.

Sur la frize desdictz tribunaulx estoit escript: HAS PATERNAE TVÆ, &c.

Icelles tiennes Paternelles prouinces (tresheureux Prince)

vœulle la fauœur & bonté celleste, (a ton honneur, & au proufict des subiectz) affranchir, maintenir, & garder.

Sur la supercille du piedestal estoit escript: O FORTVNATOS, &c. quy est:

O pœuple fortuné, quy par fauœur & benevolence diuine succede vng tel & sy grandt Prince pour Heretier, a tant de belles prouincies. Au moien de quoy est icy par tout leesse & triumphe.

Sensuyt l'Arch triumphal, en la rue nommée en vulguaire, de Coeportstrate.

I iiii Passant



Aussant ledict pont de la vache, tournant de Septentrion vers Midy, enuiron de la distance de C & viij. pas dudit pont, ensemble du pont que lon nomme le pont au laict, quasy au milieu de la rue, estoit erige vng Arch triumphal, & au dessus vng eschaffaulx triumphal, contenant en haulteur (y compris les couloimes, pedestals, epistles, cappiteaulx, cornices, & compartmentz) lxx.piedz ou enuiron, & en latitude ou largeur de xxxvij.piedz. Sur ycelluy Arch par dedens leschaffaulx (cōme des choses futures vng presaige) estoit nostre Prince entre deux aultres iofnes Princes, asscauoir, entre Iullius Ascanie filz de Aeneas, & de Seruius Tullius, filz de P.Corniculanus : iceulx deux iofnes Princes, auoient vng chascun sur son chief vne flambe de feu ardante, signifiantz (selon l'interpretation des païens) estat royal futur. Mais nostre Prince sur son chief descēdoit vng aigle, a deux chiefz, tenāt en sa griffe vne grāde branche de laurier, signifiant (selon la pensee anticque des Romainns) la puissance future de l'Empire.

Aux piedz du Prinche, estoient en grande humilité, les trois parties principales du monde, asscauoir : ASIA, AFRICA, & EVROPA, comme preste & appareillée de venir au ioug de son obeissance, toutes trois estoient en figure de personnaiges de femmes, chascune vestue a l'vsage de son pais.

Asia, estoit de couleur brune, vestue a l'vsage des Turchz. Africa, de couleur noire, ou enfumee, vestue a la mode des Egypciens. Europe, auoit la face blanche, vestue selon le commun vsage des Christiens. Au dessus de la cornice d'icelluy eschaffaulx auoit vng tabbleau quarre, hault de iiiij. piedz, & large de ix. piedz, auquel auoit escript : ASCANIVS FLAMMA. &c. quy est :

Ascanie & aussy Seruius, par apparition de flammes de feu, ont reçeupt presaige de regne futur. Mais nostre Prince, l'aigle donne splendeur par dessus son chief, signifiant que du hault honneur Imperial c'est vne certaine preuoiance. Soies le bien venu o Ducteur futur de tout le monde, Empereur, & Roy: tu tiendras soubz ton empire, Asie, Africque, & Europe.


En la molure soubz icelluy par ce estoit escript : TV SUPER AETHIOP. &c. c'est :

Tu estendras ton Sceptre dessus les Mores, Guaramans, & Yndiens : & te seruiront toutes extremitez de la terre.

ENtre icelluy Arch triumphal & le pont au laict, a la Nation des Osterlins (cest a dire les Allemans du coste d' aquillon) sa principalle residence a la maison nommée le Morien, laquelle est de ancien edifice toute de pierre blanche. Deuant icelle maison, laquelle est de grande largeur, estoient posées depuis le bas iusques a la summite d'icelle (car de la Nation vient grande superabondance de chirre) grandz nombres de torches ardantes.

Aussy auoit ladicté Nation a chascun coste de la rue (enuirō de xxxv.pas) construict & erigé couloimes ou pillastryes quarrez lesquelz, estoient (compris les mollures, cappiteaulx, epistles, basses, stillobates ou pedestals) le tout de-

Haulteur
lxx.piedz
Largeur
xxxvij.
piedz.



depainct de blanc, rouge, & couleur azuralle, distantz de .x. piedz ou enuirō.

Sur chascun cappiteau desdictz pillastryes estoient (tant la pourtraicture de la Maieste Imperiale, q̄ les armes du Prince) festons enuirōnees de fœullaige.

Entre iceulx pilastryes, au dessoubz des mollures, auoit aussi festons, depainctz des armes de la Nation, asscauoir vng aigle a deux chiefz, griffes a demy noir et a demy d'orrez, portant vng estoile fulgente ou lumineuse, sur sa poictrine.

Sur chasque pilastre pardessus iceulx festons depainctz des armes de l'Empereur & du Prinche, & aussy sur les mollures par dessus yceulx festons, depainctz des armes de ladicté Nation, auoit chandeliers, sur lesquelz estoient mises torches de chirre blanche ardantes & tressumptueusement ouurees.

L'eschaffaulx triumphal basty de la ville au pont au laict.

Sur icelluy pont a main gauche tirant vers le grand marchet, auoit vng moult triomphant & riche spectacle, construit a la Doricq, de moult belles Coulomnes, sumptueusement depainctes, de moult de diuerses couleurs marbrines, & estoit icelluy spectacle de haulteur.lx.piedz, & de largeur.xl.piedz. Lon voioit illecques l'Empereur Charles.V. & son filz Philipes tous armez, & aux piedz d'iceulx estoient prosternees, personnaiges de femmes, prisonnieres ou captifues & enchainees de grosses chainnes de fer, requerāt estre (par Imperiale & Princiale puissance) deliurees d'iceulx lyens, & estoient les noms d'iceulx personnaiges:

BITHINIA,	PHOENICIA,
PAMPHILIA,	ARABIA,
GRÆCIA,	NVMIDIA, de couleur brune.
ASSYRIA,	ÆTHIOPIA, portant face noire.
PALESTINA,	HIEROSOLYMA,
ÆGYPTVS,	CONSTANTINOPOLIS, DAMASCVS.


Touttes lesquelles prouinces sont soubz le ioug de la tirannie du Turch.

Parreillement lon voioit (car assez lon les pouoit discerner aux vescementz quilz portoient) en ce lieu Turchz, Mores, Arrabiens, Sarasins, Agarenes, et Mammeluchz, lesquelz apres auoir veu, tant l'Empereur, que nostre Prince, ont commenciet a fuyr par moult grandt espourement, en tournant le dos.

Au dessus de la cornice dedens vng tabbleau quarré, de haulteur de .v. piedz, & large.xij.piedz, estoit escript: REGNA, PROVINCIAE, VRBES &c.

Regnes, Prouinces, Citez, & Nations, oppressees de la tirannie du Turch, esperent estre deliurees d'ycelle tant grande seruitude, lesquelles a mains estendues requierent, (o victorieux inuincible Cesar, o trespuissant Prinche Philipe) que ce qui fortuneement a este cōmenciet (tant en Africque, qu'en la guerre d'Austrice) soit par vous (apres estre iceulx ennemis desconfitz & dispersez) he-

roic-



Haulteur
lx.piedz.
Largeur
xl piedz.

K ij

roicquement accomply. Et entre tant de haultz & puissantz Princes, qui est plus puissant de ce faire, que vous deux ? o terrœur & craincte des Payens? Accomplissez, accomplissez, l'oracle qui de vous deux a este predict.

*En la mollure de dessoubz estoit escript: PATERNAE VIRTUTIS, &c.
L'ymage de la vertu paternelle, est au filz moult grande admonition.*

l'Arch triumphal de la nation Angloise, basty a l'entrée du marchiet vers Orient.



*Pres auoir veu ycelluy spectacle, & en estre eslongiet de la distance de lx.pas, Lon a veu incontinent a l'entrée du marchiet vng moult grādt & sumptueux Arch triumphal, ayant trois entrees & yssues, ouure & basty a la Corinthe, richement estoffé, asscauoir les basses & cappiteautx tous d'or, & le surplus de marbre blancq, de statues ou yma-
ges entaillees, & de moult belle & riche paincturie.*

Icelluy Arch auoit deux faces, & a chascune face deux ordres de coulounes.

De terre iusques a l'eleuation (y comprins les ymaiges ou statues sur ycelluy posees) auoit en haulteur.lxxij.piedz, & en largeur (y comprins les protenses de Coulomnes lateralles) enuirō.lvij.piedz, et en proffondeur long.xxx.piedz.

L'entrée du millieu contenoit en largeur.xij. & en haulteur.xxvj.piedz.

*Chascune entree ou portes lateralles cōtenoiet chascūe en largeur.vj.piedz, & en haulteur enuiron.xij.piedz: vne chascune desdictes entrees, selon la pro-
fondité ou longeur de l' Arch, auoit .xxx. piedz.*

Icelluy Arch a esté basty, a l'honneur et bien venue de nostre tresdesire Prince, de par la nation Angloise, cōme lon polra assez veoir, en l'inscriptiō suyuante:

*A la premiere face au dessus de l'Eleuation, hault en l'aer lon voioit qua-
tres grandes statues ou ymaiges entaillees, chascune de .xij. piedz, asscauoir
la statue de Oceanus Britanicus, c'est a dire la Mer de la grandt Bretaigne,
que lon diet Engleterre, La statue de Britania , ensemble la statue de deux
Tritons, ou Daulphins de Mer.*

*OCEANVS, estoit en semblance d'homme nudt, portant vne longue &
blanche barbe, ayant par dessus son chief, vne courōne descailles, ou cocquilles
a mousles, & rozeaux de Mer, tenant en sa main vng moult grandt trident
(ou Sceptre Marin) d'or, assis sur vne grande & large escaille Marine d'or.*

*BRITANNIA, en similitude d'vne femme Angloise, en vesture blanche,
assise a coste dudit Oceanus , en ladict escaille ou coquille Marine. Et estoit
ladict femme en vesture blanche , pour ce , qu' Angleterre souloit estre iadis
nommee Albion, qui vault a dire, blanche terre, ainsy nommee pour l'Alleba-
stre, qui en ycelle terre croist.*

*Les TRITONS, estoient du nombril en hault en forme d'homme nudt, &
du*

du nombril descendant, en semblance de gros poisons de Mer, nageans devant ledict Occeanus, comme trompettes d'ycelluy sonnans ou soufflans, a plaine ioues, de grans cors Marrins, en lieu de trompettes.

A chascū coste de l'Arch, pardessus les Coulōnes lateralles, auoit vng grādt Lion d'or entailliet, tenans chascun vne baniere, en l'ung estoient painctes les armes du Roy d'Engleterre, & en lautre, les armes de la Nation Angloise.

Hault (entre les Coulomnes exterieures de la seconde ordre) estoient construictz deux Architribunals, en l'ung estoit la statue du grandt Empereur Constantin, richement entaillee d'or, & en lautre de mesme vne statue (d'or entaillee) de S. Helena sa mere, tenant entre ses brachz, vne moult grande et pesante Croix d'or. Icelluy Empereur Constantin estoit Anglois, de pere et mere Anglois, et natif d'Engleterre, son pere estoit nōme Chlorū, & sa mere Helaine. Au dessoubz la statue de Constantin estoient ces parolles escriptes:

CONSTANTINVS MAGNVS, &c.

Constantin le grandt Empereur, honneur premier d'Engleterre.
Et au dessoubz la statue de Helaine estoit escript: DIVA HELENA, &c.

S.Helaine, mere du grandt Empereur Constantin, inuentrice
de la Saincte Croix, secont honneur de la grandt Bretaigne.

Dessoubz la statue de Constantin, en l'ordre de bas, auoit vne moult artifici
euse paincture, semblable a cuyure, asscauoir la semblance d'une moult belle da
me, & au dessoubz d'ycelle estoit escript: CONSTANTIA.

Dessoubz la statue de Helaine, au bas ordre, auoit pareillement en paincture
de couleur d'or, une ymaige de femme, & au dessoubz d'ycelle estoit escript:
PIETAS. En l'ordre de hault entre la dessusdictē statue de Constantin &
Helaine, auoit vng grandt parc, ou tableau quarré, asscauoir en largeur. xvij.
piedz, & de haulteur. xv. piedz, auquel parc estoit escript en langue Latine,
lettres grosses de demy piedt. DIVO CAROLO MAXIMO. &c. c'est

A tresillustre & tresgrandt Empereur Charles Auguste, & Phelipes
le tresgrandt son filz Prince d'Espaigne, tant pour la tresdesirée ve
nue d'eulx, que pour espoir de vniōn pardurable, entr'eulx & le Roy
d'Engleterre iusqu'au present infractible entretenu : Les Mar
chandz de l'Angloise nation icy residens en tesmoignage de bonne
gratulation ont basty & erigé icelluy Arch triumphal.

Par dedens l'entree du millieu, du coste dextre, auoit deux moult riches, &
artificieuses histoires en paincture, l'une comment le grandt Empereur Con
stantin (au moien du signe de la Croix, a lui demonstre en son dormir) a ob
tenu vne moult belle victoire contre le tirant Maxence.

L'autre de nostre Prince, semblant auoir victoire, & main superiore par
dessus Turchz, Mores, & aultres telz ennemis de la Foy Christiane, aupres
desquelles histoires auoit escript: Q Y O S I G N O. &c. quy vault:

Par tel signe que l'Empereur Constantin a vaincu & subiugué ses ennemis, par icelluy mesme signe triumphera celluy grandt Phelipes par dessus les infidelles.

A costé gauche de la dessusdicté entrée et yssue, estoient de mesme depainctes deux moult belles histoires: en l'vnne lon voioit la figure de l'Empereur Charles cincquiesme, & Henry Roy d'Engleterre huictiesme, a l'enuiron d'eulx gros ses multitudes de Nobles, Princes, et grandz personnaiges, donnant la main l'ung a l'autre, quasi cōme en faisant singuliere confœderation ensemble, aussy lon voioit voler par dessus eulx la Deesse Pax, aiant sur son chief vng chapeau, au couronne de oiliuers, & portant ou tenant en sa main de mesme vne branche de olifue, dessoubz laquelle paincture ou histoire estoit escript:


M A G N O V T R I N Q V E B O N O . c'est a dire :

Au grandt bien des deux parties.

A l'autre paincture lon voioit parreillement les deux iofnes Princes, assas-
soir nostre Prince Philipes, & Edouardt le quint filz du Roy Henry huicti-
esme, humainemēt & courtoisemēt s'entr'embrachātz, en la presence de moult
Nobles, et grans personnaiges: Et par dessus d'eulx voilloit la Deesse Concorde
tenant en sa main deux cœurs liez ensemble, au dessoubz d'icelle paincture auoit
escript : S V M M A P O S T E R I S F O E L I C I T A T E . quysignifie:



A la grande felicite des successeurs.

L'ichnographie de ce stuy present Arch triumphal.



La figure de l'Arch triumphal des Anglois.

L'Altitude
ou haulteur
lxxij.piedz.
Largeur
lvij.piedz.



¶ La seconde face de l'Arch.

ALa seconde face, au dessus de l'eleuation du secondt ordre, estoit construite vne grande statue d'homme nudt, gisant sur l'ung de ses costez, enuiron de la grandeur de .xij. piedz, espandant eauue a forche, hors de vne cruche a eauue, aupres de laquelle statue, estoient escriptes ces parolles:

TAMESIS PRÆCIPVVS ANGLIÆ FLVVIUS. quy vault:

Tamesis principal fleuuue d'Angleterre.

Entre les deux coulomnes exterieures a deux costez de l'ordre superieur, auoit (cōme a la premiere face) deux grandz tribunals, en l'ung estoit vne ymaige ou statue d'or entaillée a leffigie d'vng Roy d'Engleterre, ayant vne couronne Royalle sur son chief, ensemble vng sceptre d'or en sa main, avecque telle soubscription: S. L V C I V S P R I M V S. &c. quy signifie:

S. Lucien premier entre les Roix Anglois quy a congneu Christ.

En l'autre tribunal, auoit de mesme vne grande ymaige ou statue d'or entaillée, effigié d'homme religieux, selon la coniecture, aiant telle inscription:

S A N C T V S F V G A T V S Q V I V N A. &c. quy signifie:

S. Fugate, quy premier (avecque S. Damien) a conuerty le Roy Lucien (ensemble tout le Royaulme d'Engleterre) a la loy de Christ.

Soubz ycelle statue, en l'ordre des coulomnes inferieures, estoit moult subtilement & artificieusement painct, en couleur de cuyure, vne ymaige de dame, avecque telle inscription: R E L I G I O.

Semblablement, dessoubz la statue dudit Roy S. Lucien, en l'ordre inferieur, auoit de couleur de cuyure, vne ymaige de dame, artificieusement paincté, avecque telle inscription: F I D E S.

Et estoient ycelles dames, ensemble celles de la premiere face faictes ou depainctes en maniere de seoir.

Aussy en l'ordre superieur, entre lesdites statues, asscauoir de S. Lucien, & S. Fugate, auoit vng parcq ou tableau quarré de .xvj. piedz large, et de haulteur .xv. piedz, auquel estoit escript comme en la premiere face.

D I V O C A R O L O M A X I M O. &c.

Pour l'accomplissement &acheuement d'ycelluy Arch triumphal auoit (tant charpentiers, painctres, & ymaginiers). CC. xlj. personnes.

Et a ledict Arch cousté a la Nation enuiron .4200. Florins.

La descriptiō du grandt geant Antigon

APres auoir passé l'Arch triumphal de la Nation Angloise, lon a incontinent percept au long du marchiet (enuiron .C. pas de l'Arch predict) deux coulomnes, richement, et artificieusement marbrisée, de diuerses couleurs, ayant les cappiteaulx sumptueusement d'orrez, basses, pe destals, & mollures, le tout faict a la Doricque, de altitude ou haulteur .lxvij.


piedz

ILLE EGO (QVEM FAMA EST, HIS OLIM LOCIS NOVAM
EXERCVISSE TYRANNIDEM) ET SY CORPORA S. & C.

Haulteur
lxvij.
Largeur
xl.piedz.



Lon a icy oublie
comment ycelluy
geant auoit affu-
blez vng moult
beauet richeman
teau d'escarlate
rouge, moult tri-
umphant, le tout
a l'Antique.



L

piedz, ayant pardessus (en lieu d'epistille ou architraue) vng tabbleau quadrangle, contenant de haulteur enuiron. viij. piedz, & de largeur. xl. piedz.

Pareillement estoit la Stilobate ou Piedestal, sans la mollure superieure ny inferieure, de largeur. xl. piedz, & de haulteur. xv. piedz.

Sur ycelluy Stilobate ou Pedestal (entre ycelles deux Coulomnes) seoit vng moult horrible & espoentable Geant, de haulteur. xxiiij. piedz, sy artificieusement faict a la proportion de forme humaine, que pardecha les montz, tant en grandeur, que en science, il seroit impossible de trouuer vng pareil. Et debuez scauoir, qu'il est creux par dedens & de telle matiere endurcy, qu'il ne a doubté ne a craincte de fer, d'acier, de vermine, de vent, & pluye, ny de quelle pourriture, sinon seulement craindant leffort de son grandt ennemy Vulcanus, qui est la forche du feu.

On monte par dedens son corps, avecqu'vne eschelle, iusqu'a son chief, parquoy, facilement lon pœult coniecturer, la stature d'ycelluy.

Il a parfaitement vng regardt de Geant, asscauoir, cruel, espoentable, horrible, & tirannique, portant barbe rousse moult longue, yeulx rouges enfossez & ardans, long poil aux sourcilz, nudz brachz, iambes nues, poitrine anticque, portans cothurnes, aux piedz & greues de iambes.

Il auoit vng moult beau & riche mateau sur ses espaullles descarlate rouge, & sur son chief vng chapeau festinal de roses blanches & rouges.

Il tenoit en sa main dextre vng Sceptre, painct de rouge et blanc, de grosseur selon la proportion & grandeur de sa corpulence, ayant a son coste gauche vne moult longue & douitable espee crombe ou courbe, & ycelle empalmant de sa main gauche, comme assez pœulx veoir en la precedente figure.

A l'arriuement du Prince, il a encliné son chief deuers lui, faisant semblant lui faire reuerence. Au dessus des Coulomnes au tabbleau ou mollure predicte, estoit escript en lettre de longeur de vng piedt selon la proportion Doricque, en maniere cōme sy le geant eusse parle: I L L E E G O, Q V E M F A. &c.

Je (celluy que lon dict iadis auoir exercé tirannie & crudelité en ce lieu, combien que ie soie encoire de corpulence moult espourable, ayant ores passez ma fureur) donne lieu volentiers, vouluntairement me submettant (O tresgrandt & puissant Prince Philippe) soubz ta puissance.

Lon dict communement, qu'ycelluy Geant nommē Antigon, souloit iadis posseder l'ancien chasteau d'Anuers, que pour le present on dict De Borcht, auquel pour le present est le Princial pretoire, la prison du Prince, le grandt tonlieu, & en lieu du temple du Dieu Mars qu'ilz souloit estre, est pour le present vne Eglise dediée a l'honneur de Dieu & de la vierge S. Walburghs que communement lon dict de Borcht kercke.

Icelluy Antigon, soy tenant en ycelle forteresse ou chasteau, prenant violentement tolles & gabelles des passans, cōmencea a exercer moult cruelle tir-

rannie, ostant la main a ceulx qui luy refusoient ses exactions, les laissant en tel poinct aller tout sanglans.

Quoy voiant vng moult noble Prince de ceste region, nommé Brabon, duquel la terre en porte le nom Brabant, ne vœullant endurer la crudelite de ce tiran, le a combatu vigoureusement, & par prouesse & vaillance virillement suruaincu, desconfit, et occyst, en deliurant ou affrancissant toute la Region de sa tiranie. Encoire dict on moult des choses d'ycelluy Geant, mais le pœuple du siecle d'albors estoit sy rude d'engin, qu'ilz n'ont laissiet nulz escriptz dignes de foy, combien toutteffois, qu'icelles choses ne sont moins croyables, ou dignes de foy, que ce qu'ont iadis escript les payens de leur Dieu Iuppiter, Juno, Sature, de Mars, & Appollo.

Sur la maison de la ville, en la chambre de Messeigneurs, lon voidt pendant achaynes de fer, de gros ossementz, que lon estime (selon le commun cuydier ou pensement) estre des ossementz dudit Antigonus, mais quoy quil en soit, ou non, ceulx quilz se vœulent mesler de l'anothomie ou disioincture des corpz humains, afferment, estre les ossementz d'ung grandt corpz humain, lesquelz ossementz sont ceulx, asscauoir, vne cuysse, vne dent, le plat d'une espaule, & vng os de iambes.

Ceulx quy ont mesuré iceulx ossementz, disent, que selon la proportion humaine, ce a este vng homme bien de grandeur de dixhuict piedz.

La description du Pallais, ensemble du pont ou gallerie, bastye sur ledict Marchiet deuant la Maison de la Ville.



Un lieu ou estoit ycelluy Geant, asscauoir, iusques à la maison Ciuelle, enuiron la distance de .xxxv. pas.




Sur icelluy marchiet (affin de recepuoir l'Empereur, son Filz, & les deux Roynes, tant au souper que au bancquet, auoient basty Messeigneurs de la ville (a forche de grande multitude d'ouriers, en peu de tours, & quasy par incredible celerite) vng moult grandt riche et sumptueux Pallais, de forme quadrangulaire, contenant en grandeur. v. viij. piedz. A ycelluy pallais ou grandt salle, du coste d'Orient, estoit adioinct vng grandt tribunal, se estendant vers le marchiet, affin qu'illecques l'Empereur, son Filz, & les deux Roynes pœulssent vevir, les ioustes tournois, et festiuitez quy se ferroient sur le marchiet, soubz icelluy tribunal auoit vng Arch, par ou le pœuple pouoit aller, passer, & venir.

Et reposoit seulement ycelle tant grande sale, sur. iiij. coulounes ou pillastres

L ij quar-

*La figure & pourraict du Pallais, avecq la Gallerie,
bastyé sur le grandt Marchiet.*

le haulteur
iusques au
toict .xl.
piedz. avec
le toict .lx.
piedz.
La latitudo
ou largeur
C.xxvij.



Le grandt Tribunal avecq l'Arch transpassant.

La gallerie ou pont de longueur .CC.piedz.

Le Tribunal au bout d'icelluy pont.

rez. Aussi estoit ladict Sale au dehors paincte en maniere de machonnerie & architecture, moult d'archz, a la Dorique, sy tresartificiallement, de bas en hault, qu'il ne sembloit pas estre paincture, ains de vifue pierre bastie.

Et contenoit icelle Salle enuiron de largeur cent & vingt et sept piedz, & de haulteur iusques au toict .xl.piedz, & y compris le toict .lx. piedz.

Du coste d'Orient de ceste sale estoit adioingt vng pont ou gallerie, enuiron de longueur .CC.piedz, et de haulteur (compris les compartmentz) .xl.piedz,

ayant deux ordres de pillaftres, desquelz les inferieurs (sur lequel le pont reposoit) estoient doubles, comme lon pœult veoir en la figure, Icelluy pont estoit basty affin de bien veoir les iouastes, tournois (quy se debuoient faire sur le marchiet) sans quelque empeschement.

Au bout d'icelluy pont estoit adioingt a la maniere predicte et de mesme haulteur vng tribunal tirrant vers le marchiet pour aulcuns grandz personnaiges, affin de veoir a part icelles iouastes & tournois.

L'Arch ou porte triumphalle bastie de la ville a l'entrée de la haulte rue.




Pres estre eslongiet de la Maison de la ville, enuiron la distance de .xxx. pas, droict a l'entrée de la haulte rue, que lon dict vulguairement De Hoochstrate, estoit artificiellement erigé, & basty, vng moult bel Arch triumphal, a la Corinthe, ayant deux faces ou endroicetz, & deux ordres de coulounes, entierement desplainctes, de blanche couleur marbrine, richement estoffées cha & la de riche d'orrure. Nonobstant ce estoient ycelles coulounes differentes, & de diuerses couleurs de marbres, le tout ayant, asscauoir cappiteaulx & basses richement dorrez. Icelluy Arch contenoit en latitude ou largeur .xxvij. piedz, en haulteur (comprinse les eleuations) cincquante piedz, & en longeur .xx. L'entrée et yssue dudit Arch auoit de largeur xiiij. piedz, & de haulteur .xxvij.


A chascun coing, asscauoir sur les cantons dudit arch auoit vng grand aigle noir a deux chiefz subtilement entailliet, ayant les aesles estendues, quasy comme prest a voler, sy vifurement figurée qu'il sembloit proprement, qui lz fussent vifz.

Sur l'eleuation d'ycelluy Arch, auoit deux grandes statues, chascune de haulteur .vij. piedz, ayant vng chascun d'eulx assublez vng manteau de drap d'or, iusques au piedz, armes de armures d'orrees, vng chascun d'eulx tenant vng glaive ou espee nue et flamboiante en la main, & portoit l'une d'ycelles statues

Lichnographie de ceste triumphale porte.



l'effi-



Haulteur
.L.piedz.
Largeur
xxvij.
Proffun-
deur.xx.
piedz.

l'effigie de l'Empereur Charles cinqquiesme, portant par dessus son chief vne couronne Imperiale, & l'autre de son Filz Philipes, ayant dessus son chief vne couronne Royalle,toutz deux entaillees sy au vif qu'il sembloit (non veoir les statues) ains proprement veoir l'Empereur & son Filz.

Iceulx deux portoient sur leurs espaules la figure du monde,(asscauoir vne grandt boulle,contenant en diametre.xij.piedz, & en circumference .xxxvj. piedz: auquel estoient montaignes, vallees, citez, regions, la mer, & plusieurs riuieres,vifement & artificiellement alentour pourtraictes.

Pour vray c'estoit vne chose merueilleuse, & moult plaisante a regarder, deux sy grandz personnaiges congnoistre a la face , sy hault en l'aer distans et esleuez de la terre, portans vng sy grandt poix sur leurs espaules,sans eulx mouuoir ny esbranler.Ce n'estoit aussij chose moins digne d'admiratio,qu'ung sy grandt poix(tant pour la grandeur,qu'au moien de ladict'e rondeur a soubstenir difficile,sans aucun soubstantacle, nonobstant les horribles sufflations, &tourmentes des ventz) pouoit tenir sans trebuchier.

En la mollure de la Cornice estoit escript , en grosses lettres semipedies, bu enuiron, telles parolles: ALCIDES ATLASQUE INGENS. &c. c'est:

Quant a Hercules & le grandt Athlas,ce sont friuolles,
yceulx deux sont ceulx quy vrayement portent le poix
du monde sur leurs espaules.


Par dedens l'Arch tant a chasque coste qu'en la circumference d'ycelluy auoit de moult riches painctures,car hault en la rotundite de l'Arch lon voioit Dieu le createur entres les estoilles,& parmy les nues,regardant du hault du ciel en bas. Au coste dextre d'ycelluy Arch, estoit l'Empereur & son Filz sur terre,comme Seigneurs de la terre. Aupres d'eulx estoit en semblant beniuole la Deesse Cibelle, que les Payens souloient tenir pour Deesse de la terre.

A gauche, estoit pourtraict la grandt Mer, sur laquelle estoient l'Empereur & son Filz, en vng char triumphal,comme gouuerneurs de la Mer,conduictz & menez du Dieu Neptune (comme subiect a eux) & de deux cheualx de Mer , qui tirroient ycelluy char . Ledit Neptune seoit devant sur le char, tenant son trident (ou Sceptre marin) en sa main , regissant yceulx cheualx. Aupres desquelles trois figures auoit escript:

ÆTHEREA ASTRA DEV.S. &c. qui vault a dire,

Le ciel & les estoilles sont regis de Dieu le createur,la terre
& la profundite de la mer de l'Empereur & de son Filz.

Description de l'Arch triumphal,
basty sur le Marchiet au Lin.



Haulteur
lxx.piedz
Largeur
xl.piedz.

M

PU dessusdict Arch triumphal, asscauoir, de l'entrée de la haulte rue, droict iusques au marchiet au lin, qui est enuiron de la distance de .xc. pas, estoit aussy semblablement esleue & basty vng Arch triumphal a deux faces, sur lequel auoit vng eschaffaulx, & remonstrance de personnaiges, comme assez appert figurallement, contenant en haulteur .lxx. piedz, & en largeur .xl. piedz auecque vne entrée & yssue.

Sur leschaffault d'ycelluy Arch triumphal, estoient assiz en leur Maiestez iceulx personnaiges ensuyuans:

Philipes, Duc de Bourgongne, surnommé en vulgaire Le bon Philipes, filz du Duc Iehan.

Charles, Duc de Bourgongne, & filz du Duc Philipes.

Marie, Fille du Duc Charles, orphenine, depuis espoise de l'Empereur Maximilien.

Maximilian, Empereur, Ayeul de l'Empereur Charles cincquiesme.

Philipes, Roy d'Espaigne, filz de l'Empereur Maximilian, & Pere de l'Empereur Charles cincquiesme.

Charles, Empereur .v^e. de ce nom, filz du Roy Philipes d'Espaignes.

Philipes, Prince d'Espaignes, filz de l'Empereur Charles le quint.

Au dessoubz droict devant iceulx personnaiges,

estouent yceulx personnaiges ensuyuantz

Fides, cest a dire Foy, en semblance d'une moult belle vierge, en vestemens blanchz, ayant entres ses brachz vng petit chien blanc.

Obsequentia, cest a dire, Seruice, en similitude d'une moult belle seruante ou chamberiere.

Candor, cest a dire vng cœur pur sans fainctise, en semblance d'ung beau iouuenceau, en vesture blanche, ayant une couronne de fleur de lilz sur son chief, semblablement portoit flueurs de lilz en sa main.

Antuerpia, une moult belle iofne vierge, en toutes manieres ainsy que (cy dessus) elle a esté figurée.

Icy voioit on, que Fides, Candor, & Obsequentia, prendoient Antuerpia par la main, & le presentoient treshumblement a nostre Prince Philipes, quy sembloit la recepuoir treshumainement de la main, aussy sembloit que tous yceulx aultres personnaiges luy monstroient ioieuse chiere.

Quandt a ycelle signification, & que ce vouloit dire, & a quelle fin ce tendoit, estoit amplement assez declaré en vng parc ou tabbleau quarré, au dessus des cornices d'ycelluy eschaffault, auquel estoit escript:

QVAM INCREDIBILI FAVORE. &c. quy signifie:

De quelle incredible fauëur tes Ancestres (o trespuissant Prince) ont aymé, aydé, & tousiours aduanché la ville d'Anuers, est assez notoire a chascun. Aussy comme y celle s'est portée endroict eulx iusques a present (demonstrant sa gratitude dessus toutes aultres citez,

citez, par pure & infractible feaulté, tousiours appareillee aux ser-
uices d'yceulx : leurs faisant ayde & assistance , selon l'exigence du
cas) ont aussy assez bien congneu. Laquelle espere estre riens plus
certain que tu (en ensuyuant ycelles traches) feras le semblable.

*A la premiere face d'ycelluy Arch a chascun coste d'ycelx personnaiges,
auoit vne moult artificieuse ymaige paincte, de la grandeur d'ung homme com-
mun, l'une estoit Fides, & l'autre, Obseruantia.*

A la secōde face auoit aussy deux ymages l'une Candor, et l'autre, Obsequētia.

L'Arch triumphal de la Ville basty a la porte Sainct Iehan.

 Pres estre passé le marchiet au lin, sensuyt la porte de S. Iehan, en-
uirō de la distance de .C. pas. L'entre d'ycelle porte a de largeur .xij.
piedz, et de haulteur .xx. piedz. Au deuant de laquelle estoit adioingt
vng Arch triumphal d'une entree & issye, de la haulteur & largeur de la-
dicté porte, sy qu'il sembloit de la porte & de l'Arch n'estre qu'vng.

Icelluy Arch triumphal (y comprins l'eschaffaulx & compartimentz sur ycel-
luy posez) auoit de haulteur enuirō .lxv. piedz, et large enuiron de .xxxv. piedz.

Sur ycelluy eschaffaulx estoit remonstre celluy spectacle suyant.

Asscauoir nostre Prince ressemblant estre vif, estant (en virile contenance)
sur vne pierre quarrée, de la haulteur de trois piedz, lequel estoit de chascun
costé (asscauoir de cha, & de la) tirré par son manteau.

A costé dextre, estoit tirré de Spes, c'est a dire esperance, laquelle estoit en
figure de dame, portant aesles, & vestue d'ung vescement de couleur celleste.

Du costé gauche, il estoit tirré de Metus, quy signifie, doulte, lequel estoit en
semblance d'homme, maigre, pasle, & de couleur morte, ayant cheueulx rois-
des & droictz dessus son chief.

Mais, lon voioit a chascun costé du Prince, deux dames sus bout, le tenant
sus bout sy ferme, & immobile, qui l(ne pour les blandissementz, ou flateries
d'esperance, ny pour les menasses de crainte) ne mouuoit d'ung coste ny d'autre,
& estoient les noms d'ycelles quatres dames telz : de l'ung des costez, Con-
stantia, c'est a dire constance, & Fiducia, c'est a dire ferme ou hardie confi-
dence : de l'autre coste, Fortitudo, & Magnanimitas, quy signifie, forche,
& magnamitē : icelles estoient moult semblable et conforme l'ung a l'autre,
vne chascune auoit par dessus les espaules vng manteau anticque, la poictrine
armée, & vng cabasset sur son chief.


En ycelle pierre soubz les piedz de nostre Prince estoit escript:

N E C S P E, N E C M E T V. quy vauldt a dire:

Ny pour esperance, ny pour craincte.

Au dessus de l'entrée & yssye dudit Arch, asscauoir, a la mollure estoit
M ij escript:

Haulteur
lxv.piedz
Largeur.
xxxv.
piedz.



escript: NEQVE AD DEXTERAM. &c. c'est: N'y a dextre, n'y a senestre.

A la mollure, au dessus des personnaiges, estoit escript:

AFFECTIBVS NON MOVERI. &c. quy signifie:

*Non estre esmœu des persuasions humaines,
est droict œuvre de Roy vertueux.*

*Et en vng grandt tabbleau au dessus de la mollure superieure estoit escript
en grosse lettre; QVALIS DVRA. &c. sonnant ainsy en nostre vulgaire:*

*Tout ainsy que la roche dure est immobile, au millieu des vndes
de leue, tout ainsy la vertu & prouesse princialle, ne se mœut, ou
flexit, pour quelque turbation, ne cha, ne la. Vng coeur non ef-
frièt, est confirme & renforchiet de constance.*

*Et a esté ce fait sur la deuise du Prince sonnant ainsy, NEC SPE NEC
METV, par laquelle deuise est entendu, qu'ung noble cœur Princial doibt estre
tellement confirmé, en prouesses ou vertus Princiales, q pour nulle riens, en ma-
niere quelconques soit, par quelque inclinatiō affectueuse, pour quelque cause,
soit pour quelque faueur ou prouffet ou espoir de prosperité, ne doibt decliner
a dextre, ne pour quelque dommaige ou craincte d'aduersitez, ne doibt nulle-
ment fleschir a gauche, ains demourer constant & immobile (quelque aduersi-
te qu'il luy puisse aduenir) persistans en sa bonne intention, & ne doibt fleschir
ny d'ung coste ny d'autre, ains demourer cōme sur vne pierre quarrée, (car ce
qui est quarré, ne tumbe iamais, ains est tousiours stable) cōstant, & immobile.*

Leschaffault basty de ceulx de la mon-

noie, sur la Marine, oultre la porte de S. Iehan.




*Vdict spectacle de la porte S. Iehan, lon est venu sur la place de la
marine, q lon dict vulgairement Op den œuer: le chemin droict a
aller au Monastere de S. Michiel. Sur ladict marine est la Monnoie
de la M. Imperialle, c'est a dire le lieu ou lon forge la Monnoie distante de la
porte S. Iehan predicte enuiron de .C. xv. pas. Droict deuant ladict Mon-
noie, auoient ceulx de la Monnoie basty a leurs propres coustz & despens, vng
moult bel eschaffaulx triumphal a double estaiges, duquel lon pœult veoir la
figure en la page suyuante, contenant de haulteur .liij. piedz, & de largeur
enuiron de .xxix. piedz, auquel estoit demontré ycelluy spectacle ensuyuant.*

*A la plus haulte estaige, lon voioit Dieu le createur, enuironné de moult de
lumieres resplendissantes, assis sur vne nue clere & luisante, & donnoit a vng
homme (lequel homme estoit prosternez deuant luy a genoulx) monnoie d'or et
d'argēt: ycelluy hōme esiouy d'ung tel don diuin, rendoit graces au donneur: Et
estoit le nom de ce personnaige HOMO, de laquelle figure sensuyt la signification:*

*Cōme ainsy soit que tout bien viengne de Dieu, aussy a il (sans doubtes nulles)
a l'utillite, proffit, & cōmodite de la conseruation de la vie de l'homme, premie*

Haulteur
liij. piedz
Largeur
xxix.
piedz.



remēt demonstrē, administrē, et donne l'vſaige, de la monnoie ou argent, com-
bien que iournellement (par la fragilité humaine) de ce soit abusez.

Au second estaige estoit Saturne a demy nud, en semblance d'acien homme,
ayant la barbe moult longue & chanue, moult longz cheueulx chanus, assis a
vng enclume, a la maniere des Monnoiers (ayant a coste de soy sa faulx) for-
geant monnoie d'or & d'argent.

A coste de luy estoit la belle Deesse M O N E T A, en similitude d'une moult
belle dame, parée d'un vestement superieur d'or, & pour sa robe interieure,
vng vestemēt de drap d'argēt, portant par dessus son chief une courōne tissue
& enrichie de pieches d'or et d'argent, ayant a son col une chainne de pieches
d'or & d'argent : Aupres d'elle estoient ses filles, en semblance de moult belles
iosnes vierges, comme sensuyt: Opulentia, Copia, Negociatio, & Ciuitas.
quy vauldt a dire : Ricesse, Plenté, Marchandise, & Vie honeste.

Tout ce signifie que de la monnoie, premierement donnée & distribuée de
Dieu le createur, a l'utilite & vſaige de l'homme, & premierement (comme
aulcuns des payens disent) forgée, manifestée, & contribuée de Saturne, sont
produictes richesses, plenté ou habondance, marchandise, gaignage, et vie hon-
nesté ou ciuile. Aussy lon voioit audict spectacle, comment Saturne donnoit
liberallement a ycelle Deesse Moneta des pieches par luy forgees, lesquelles elle
(de semblable liberalite) espardoit a grand quantité entre la cōmune, laquelle
estoit illecques a grosse multitude.

Illecques pouoit ou veoir vng admirable et estrange ſpectacle, cōme de veoir
vng chascun beyer apres le iect de la Monnoie, comme de veoir chascun hap-
pillier & eſtendre la main, cōme de bouter l'ung l'autre du coulde, oſtans ou
prendans ycelluy argent hors des mains l'ung de l'autre, ycelluy recepuant, les
aulcuns des lippes, aultres aux dentz, aultres aux mains, & aultres du bonnet,
marcheans ou foulans l'ung l'autre aux piedz, ſentreſrappans de coupz de
poingz, tirrer aux cheueulx, mauldissans & oultrageans les vngz lez aultres,
en la preſſe ou fouille de diuers criz, clamours, hulemens, & vociferations, que
lon y faifoit. En la molure du plus hault estaige estoit eſcript en telle forte;

M O N E T A M I R A N D O D E I. &c. quy signifie,

La monnoie par admirable don de Dieu envoiée du ciel,
par Saturne & aultres forgée, aux mortelz dispensée & con-
tribuée par le moyen des benefices des Princes.


Et a la mollure du plus bas estaige estoit ainsy eſcript:

DIVO CAROLO .V. CÆS. qui ſonne ainsy en nostre vulgaire:

A l'honneur du tresillustre Empereur Charles .V. & de Philipes
fon Filz, nostre trespuissant Prince, tant pour ſa tresdesirée venue
d'Espaigne, que pour la tresagreable preſence de tous deux, ont
les Monnoiers d'Anuers ce basty & erigé.


Sensuyt l'Arch triumphal des Allemans.

L'Ichnographie de ce present Arch triumphal.



La figure de l'Arch des Allemans,

a veoir par dedens & dehors.



Es haultz Allemans, negociantz ou trafficquans en ceste Ville, tant pour la tresdesiree venue de nostre Prince, q̄ pour la tresagreable presence de la Maieste Imperialle, grandement esiouys: *Quasi a my* chemin du monastere de S.M!chiel & de la monnoie, enuiron de.lx.pas de la diete monnoie, ont erigé vng moult grandt, sumptueulx, & magnificque Arch triumphal, a la Corinthe, double, & marbrisé de couleur de marbre blanch, de deux faces, a trois entrees & tyssues, ayant tant debors que par dedens deux ordres de Coulomnes. Touttes les Coulomnes du premier ordre tant debors comme dedens estoient rondes, richement d'orrees, asscauoir, la Basse, Cappiteaulx, & Stries : au second ordre Pillastryes quarrez. Touttes les statues ou imaiges (dont en y auoit grandt foison) estoient artificiellement esleuees, & richement toutes d'orees & entierement argentees. L'entrée & yssue du millieu estoit de largeur.xij. piedz, et de haulteur.xxiiij. piedz. Vne chascune porte a coste d'ycelle auoit de largeur.vj. piedz, & de haulteur.xij. piedz.

Tout ycelluy œuvre (y comprins les eleuations & ce qui estoit dessus) auoit de haulteur enuiron .lxvij. piedz, de largeur.lvij. piedz, & de proffundeur ou longueur enuiron de .lxij. piedz. Sur l'eleuation de l'Arch hault en l'aer auoit vne grand globe ou boulle d'or, figuratifue du monde, sur lequel monde estoit vng grand Aigle noir a deux chiefz, aux aesles estendues tournant & virant au vent. Deuant ycelluy monde, au dessoubz dudit Aigle, asscauoir a la premiere face reposoit vne statue d'argēt ayant la figure d'une dame: aupres de laquelle estoit escript GERMANIA, c'est a dire, Allemaigne: et estoit escript aupres: SVB VMBRA ALARVM. &c. qui signifie,

Par dessoubz l'umbre de tes aesles.

Sur chascun anglet des quantons ou creneaulx, auoit erigée vne statue d'argent des quatres plus gros fleuves ou riuieres des Allemaignes, espandant de grandes cruches d'argent, eauue argente, & estoient leurs noms ainsi escript:

DANVBIVS,	la Dunoe.
RHENVS,	le Rhijn.
ALBIS,	le Elue.
VISTVLA.	

Sur l'eleuation auoit vng moult grandt estandart, auquel estoient painctes les armes de l'Empire. A la premiere face, au second ordre par debors, auoit deux statues d'or, construictes en tribunaulx aureins, l'une ayant telle soubscription: TVISCON VETVSTVS. &c. qui vault a dire:

Tuiscon, des Allemans ancien Dieu.

A laultre auoit telle inscription: MANNVS DEI. &c. c'est a dire:
Mannus, filz du Dieu Tuiscon.

En lordre inferieur de ladite face auoit semblablement deux statues d'argent, en semblance de femmes, posees en tribunaulx d'or, soubz l'une auoit telle inscription: IN CLYTA VINDELICORVM. &c. qui signifie:
La noble cité de Ausbourg.

Et

Et soubz l'autre ainsy: PER CELEBRIS NORICOR. &c. qui vauldt:
La tresrenommee cite de Norembergue.

En la seconde face dudit Arch, au secondt ordre, auoit deux statues d'or, construictes & posees en tribunaulx aureins, & auoit l'vne d'ycelles telle inscription: TE VT O PRISCVS GER.. &c. qu'y vauldt a dire:

Teuto, ancien Roy des Allemans.

Pareillement auoit soubz l'autre telle inscription:

ORG ET ORIX MAGNVS. &c. ainsy sonnant en Franchois.

Orgetorix, grandt Roy des Allemans.

Par dedens ycelluy Arch, au secondt ordre, au dessus de l'ysse lon voioit en entrant, trois statues d'or, posees en tribunaulx d'or, l'vne (asscauoir a main droict) estoit la statue de Ferdinand Roy de Honguerie, l'autre a main gache estoit Philipes Prince d'Espaignes, & celle du milieu estoit la statue de l'Empereur Charles cincquiesme vng chascun aornez de son propre parement.

A l'opposite droict vis a vis, au dessus de l'entree dudit Arch audit ordre, auoit deux statues de femmes d'argët posees dedens tribunaulx d'or, l'vne tenoit vng buccine d'or en sa main & auoit aupres telle inscription:

IMMORTALIS FAMA. cest a dire: Immortelle renommee.

Et l'autre auoit en sa main dextre vne plume d'or, & a gauche vng liure d'or, aupres de laquelle statue estoit escript:

DISCIPLINA, cest a dire: Discipline ou doctrine.

Dedens chascun coste desdictz ordres, auoit trois statues d'or des Electeurs du Sainct Empire, construictes et posees dedens tribunaulx d'or, vng chascun aornez de ses armes propres.

Au dessus d'ycelluy Arch a chascune face, en l'ordre superieur auoit vng moult grandt tableau ou parc quarré, auquel estoit escript en telle sorte:

DIVO CAROLO MAXIMO .V. CÆS. &c. qu'y vauldt a dire:

A tresillustre & tresgrandt Empereur Charles tousiours Auguste, & son Filz le grandt Philipes, tant pour leur tresdesire aduement, que pour ce que l'Empire par prudence Imperialle est reduictz a repos, avecq certain espoir, qu'ycelluy grand Filz suyant son tresgrandt Pere viendra au Sceptre Imperial, les Allemans encins soubz la clemence d'eulx deux.

Aacheuer ycelluy tant sumptueux œuvre, auoit nonante ouuriers tant artistes qu'aultres, & a couste a la Nation d'Allemaigne trois milles deuxcentz Florins Carolus.

Sensuyt l'Arch triumphal, basty & erigé de la ville au Monastere de S.Michiel.



Pres auoir veu, ensemble estre passéz l'Arch triumphal de la Nation Germanique, lon est incontinent venu a arriuer au Monastere de S. Michiel, ou yllecques estoit a main gauche de l'entrée du dict Monastere erigé & basty de par la ville vng Arch triumphal, d'vne entrée & yssue, de deux ordres de coulounes, contenant en altitude ou haulteur .lx. piedz, & de largeur .xxxv. piedz.

Sur ycelluy Arch entre les coulounes superieures, lon voioit, & ce par moult grande admiration, vng moult grandt rondt spectacle de couleur celleste, ayat pour son diametre .xx. piedz, & en rondeur .lx. piedz, tant artificiellement par engin pictural painct a la samblance du ciel, que propremēt il sembloit que ce fuisse le ciel mesme, & ce principallement pour ce que avecques plus de cent lampes (comme estoilles scintilantes ou luyantes) ardantes en ycelluy, il se mouoit & tournoit, sans toutteffois y veoir aucun y attouchier.

Icelles lampes estoient faictes de voirres commun a boire, avecque de lhuyle dedens, sy tressubtillement et ingenieuusement pendues, de fil de laichton (toutes suyuant l'vne l'autre en moult belle ordre) que en quelque lieu que se tournaist ycelluy ciel, ainsy se tournoient ycelles lampes sans estaindre, ny sans estre lhuyle aucunement esbrandue. Deuant ycelluy ciel au milieu de leschafaulx, seoit Dieu le createur en Maiesté Diuine, & aupres de luy estoient, (luy offrant seruice) yceulx personnaiges ensuyuantz: toutes en figure ou semblance de femmes accoustrees en vesture d'or.

Maiestas,

Maiesté,

Virtus,

Vertu,

Gloria,

Gloire,

Potentia,

Puissance, tenant vne espee nue en sa main.

Fama,

Renommee, ayant aesles, sonnant vne trompette.


Immortalitas.

Immortalite, en vesture blanche, ayant le chief
enuironne de raidz lumineux & la mort ou dessoubz du pied.

Aussy y auoit deux Anges l'vng tenant en sa main vng Sceptre Royal, & l'autre vne couronne Royalle: Lon voioit nostre Prince pourtraict au vif a deux genoulx deuant Dieu, & prendoit nostre Seigneur Dieu des mains de Potentia ycelle espee nue qu'elle tenoit, & la liuroit au Prince. Puis pareillement estoit ycelluy sceptre, des mains de l'ung des Anges, le donnant au Prince: Et consequammente aussy estoit la couronne des mains de l'autre Ange, & la posoit sur le chief de nostre Prince, et a ce propos estoit escript en la mollure de l'Arc au dessus d'yceulx personnaiges: NON EST POTEST AS.etc.c'est:

Nulle puissance n'est sinon de Dieu.

Et au moyen, que tant de milliers, voire tant de milles milliers d'hommes, dependent d'ung seul Prince ou superieur, tellement que a eulx se submettent volontairement, yceulx seruans, honnourans, & apres Dieu sur tous obeyssans, lequel est vng cas merueilleux, quy (sans quelque doute) ne pœult ou scauroit venir



Haulteur
lx.piedz.
Largeur
xxxv.
piedz.

N iiij

*venir que de Dieu soeul auoit escript a la mollure inferieure:
A DOMINO FACTVM EST IST VD. &c. quy vauldt a dire:
Cecy est faict du Seigneur, & nous est tresadmirable aux yeulx.*

*En hault asscauoir dessus ycelle molure superieure en vng tableau estoit
escript de la part de toute la republique: TE GLORIOSA. &c. quy
tourné en nostre vulguaire, sonne:*

*Nous prions de cœur feruent,(o tresheureux Prince) quy es done
de Dieu le createur de telle puissance heroicque,q̄ tu nous puisse
longuemēt & prosperammēt par ta doulce clemence Seignourier.*

*Et ycelluy a este le dernier de tous les spectacles dessusdictz: Icy s'est fine
ycelluy chemin triumphal. Icy ont este l'Empereur, son Filz, & les
deux Roynes, avecq incroyable leesse & plaisir vng chascun
endroict soy receiptz en son logement & repos.*

De rechief hommaige faict a nostre Prince a sa reception.

 *E* lendemain quy estoit le iœudy .xij. de Septembre, est alleé sa
Princialle magnitude, vers l'eglize de nostre dame, accompagniet
& suyuy de moult noble sequelle, et compaignie de moult grandz
Princes & Barons, & apres estre le sainct seruice diuin triumphamment
& solemnellementacheuez, s'en est allez vers le marchiet , ou illecques de-
uant la maison de la ville , en la Salle cy dessus mentionnée dedens vng tribu-
nal pour ycelluy appareilliet, (en la presence de plusieurs grandz personna-
ges, Nobles Seigneurs, ensemble de Messieurs de la loy de la ville, & de toute
la commune , assemblee a grosse multitude sur le marchiet) a este de rechief
receipt & recongneu pour futur successeur hereditaire, a mains leuees,ensem-
ble a grande acclamation populaire . Laquelle chose faictte , ensemble auoir
semez or & argent, de la part de sa Magnificence a grand habondance entre
le poeuple, s'est retourné vers le monastere de Sainct Michiel, quy estoit le lo-
gis de sa haulte magnificence.

*Icelluy iour vng peu apres midy, sont venuz la Nation des Portugallois,
lesquelz (pour les raisons cy dessus mentionnees) n'auoient marchietz avec-
ques les aultres Nations , & se sont venuz presenter triumphamment en la
presence de sa haulte magnitude, en telle et triomphante pomposité comme ilz
auoient estez preparez a marchier a lentrée de sa haulte magnitude.*

¶Ioustes & Tournoy.

*L*e troiesme iour apres son entree, quy estoit vendredy .xiiij. iour de Sep-
tembre, lequel iour estoit la feste de S. Philipes martyr, Euesque d' Alexan-
drie, apres midy fust menee (comme la belle Polixene) la fille de Monsieur de
Breed-

Breederode nouuellement espouzee, au noble Seigneur de Chantonniay, filz de Monsieur de Granduelle (tant par nostre Prince , que par les deux Roynes, &aultres plusieurs grandz Princes & Seigneurs) a moult grand triumphe, du logis du Prince iusques au logis des Focquers, ouquel estoit le logement de Monsieur l'Euesque d'Arras frere germain de l'espoux. Voicy que a l'honneur de l'espouz & de l'espouse s'est faict vne moult belle iouste sur la plaine que lon dict La marine droict deuant la monnoie cy dessus mentionnee, & estoient les dictes ioustes de deux parties soudainement et moult triumphammēt ekippez sans lices, ou bailles, ny tentes, mais franchement & a plaine courfse.

Vne chascune desdictes parties auoit de son coste cincquante hacquebutiers.

Trompettes ont commenciet a sonner & rendre moult grandt bruict. Lances ont estees couchées en larrest, Cheaulx ont cōmenciet a courir comme foul dre l'ung contre l'autre, Lances sont vollees par esclatz, harnois ont commen ciet a rendre bruict: heaulmes & plumars sont vollez en l'aer. Ieulx cincquā tes hacqbutiers de chascun coste sur les aesles ont cōmenciet a tirer fort & fer me l'vng contre l'autre menant vng grandt bruict, emplissant l'aer de feu & d'espessēs fumees: & finablement apres l'estour finé, se son partis les vngz des aultres : & a estee l'espouze remenee de la, tant avecq l'estat du Prince, que de celluy des deux Roynes, le tout triumphāment & avec grande leesse.

Vng Tournoy.

LE quatriesme iour apres son entrée, asscauoir le samedy iour de la feste de l'exaltation de la S.Croix.xiiij.iour de Septemb. La Maiesté Imperialle, le Prince son filz, avecque tout leur estat, sont venu derechief (& che a moult grosse suyte de multitude de poeuple) a l'esglise de nostre dame, cy dessus souuent mentionnee, & aprez auoir par moult grande deuotion ouy le seruice diuin, sont retournez vers leurs logis. Et apres midy, semblablement avecque tous leurs estatz sont retournez vers ladiele sale (bastie deuant la maison de la ville) & illecques en la presence de la Maiesté Imperialle, du Prince son filz, & des deux Roynes, ensemble de plusieurs autres gros Seigneurs, lesquelz tous estoient assis audict tribunal cy dessus souuent mentionné, & aussy en presence de toute la commune, a este commençiet vng triumphant tournoy a piedt, duquel ont estez chiefz quatres des plus grandz Seigneurs de la terre de Brabandt: Asscauoir: Le Marquis de Bergues.

Le Conte de Hoochstraten.

Le Conte de Horne.

Le Conte de Meghem.

Deux d'yceulx de l'vne, & deux de l'autre part estoient prouocqueurs du dict Tournoy, lesquelz auoient vng chascun de sa partie assez bon nombre de Gentilz hommes bien ekippez pour ledict Tournoy.

Tous estoient de chascun coste en armes moult riches & luyantes, aornez & parez richement de drap d'or & d'argent. Lequel Tournoy (tousiours

de plus en plus croissant en nombre) a duré iusques au soir.

Derechier vngaultre Tournoy.

LE cincquiesme iour de son entree, quy estoit le dimence apres la Saincte Croix.xv.iour de Septembre, sont venuz de rechief, asscauoir sa Maieste Imp., son Filz, & les deux Roynes, ensemble tous leurs estatz vers l'eglise de nostre Dame dessusdicte, & apres estre le seruice diuinacheue, le tout comme est de coustume, sont retournez vng chascun vers son logis, lesquelz apres midy (vng chascun avecques son estat) sont retournez ou yllecques le tout a leur honneur a este publier : Vne moult grande & triumphantes iousteres, desquelles iousteres estoient chiefz le treshault & tresillustre Prince de Piemondt de l'vne, & Florent de Montmorency, Seigneur de Humbermont.

Le Prince de Piemondt, ensemble tous ceulx de sa bende, auoit pour ses couleurs, iaulne, carnal & violet : Et Monsieur de Humbermont auoit aussy pour ses couleurs, blanc & rouge.

Au parauant estoient ordonnez pour chiefz d'ycelles iousteres le tresillustre Conte d'Aremberch, Seigneur de Barbansson, de l'vne, & le Noble Seigneur Jacques de Harbais, Chambellan de la Maieste Imperialle, Marquis d'Anuers: Mais au moien qu'ilz auoient este tous deux moult blessez au tresgrandt & tresmagnificque tournoy, lequel auoit este de toutes sortes de combatz ordonne a Bins de par nostre tresillustre Dame la Royne, & desquelles blessures ilz n'estoient encoire bien reguaris : Parquoy (a l'honneur d'ycelx & de ceste ville) le dessusdict Prince de Piemont, & Monsieur de Humberbont, au lieu d'ycelx, asscauoir, le Prince de Piemont au lieu de Monsieur le Marquis Herbais, & Monsieur de Humbermot, au lieu de Monsieur le Conte d'Aremberch, avecq la distinctio & differēce des couleurs come dessus est dict. Et nostre Prince, vœullant (par sa singuliere & Princialle benignite) ledict esbat, ensemble la ville singulierement decorer, s'est humiliet de vouloir prēdre le party de la bende du Prince de Piemot & d'entrer quandt & quandt lui ausdict esbat.

La bende du Prince de Piemont estoit telle,

Le Conte d'Egmont.

Le Conte de Mansuelt.

Le Conte de Hoochstraten.

Monssieur de Chieures.

Monssieur de Noyelles.

Monssieur de Traisegny.

Le Baron de Courlaon.

Monssieur de Peloux.

Monssieur de Lambert.

Don Loys Capata.

Don Loys Mendez de Haro.

Et de la bende de Monsieur d'Areemberch cstoient yceulx:

Le Conte de Horne.
Le Marquis de Bergue.
Le Conte de Meghem.
Monssieur de Moncheau.
Monssieur de Chantonnay.
Don Loys de Caruaial.
Don Joan Dacuna.
Don Diago Dacuna.
Don Garcia de Ayala.
Don Franchois de Mendoça.
Don Hernando de la Cerdá.
Don Diago da Seuedo.

Vng chascun d'yceulx, tant chiefz, comme aultres de la bende, & singulierement nostre Prince, auoit deux Gentilz hommes a cheual, lesquelz portoient leurs armes & escutz, ensemble deux paiges, & deux courriers ou lacquaitz.

La liuree & parement d'yceulx quy debuoient estre a ycelluy esbat (comme Prouocquantz, Deffendantz, Escuyers, Paiges & Lacquaitz, ensemble des cheuaulx) estoit tout de drap d'or & d'argent, tissuée ou entremeslée des couleurs du chief, ou prouocquant.

Pour ce que nostredict marchiet d'Orient vers Occident est plus long q' large, au long d'ycelluy estoient esleuees doubbles lices ou bailles cōtre la foule du pœuple, affin que les escuyers, paiges, & lacquaitz peussent courir plus franchement. A chascun bout des lices auoit tendu vng pauillon des couleurs de chascun chiefz, & au dessus d'yceulx pauillons de moult riches estandars, auquel estoient painctes les armes d'vng chascun desdictz chiefz.

Le temps venu, & toutes choses appropriees en son endroict pour commencer ledict esbat ou iouste, trompettes ont cōmenciet de chascun coste a sonner: les chiefz, & aydans (vng chascun selon son degré chascun d'eulx ayant deux paiges & deux lacquaitz ou courriers) sont cheualereusement desfriegietz la lance au poing, et auprez de chascun estoient portees ses armes (a cause qu'ilz estoient enserrez dedens leurs heaulmes) affin d'estre mieulx congneu.

Au desfriegier d'yceulx, cheuaulx a moult grand roideur de courir sembloient voller, lon oyoit armures sonner, lon voyoit lances voller par esclatz, timbres & plumars des heaulmes voller en l'aer.

Et apres s'estre tous portez vaillamment & couraigeusement audict combat, toutteffois nostre Prince yceulx tous surpassans (a moult grandt fauœur d'vng chascun, & singulierement au grandt plaisir de son pere) a esté celluy quy par dessus tous a emporté le pris.

L'Imperialle Maieste, ensemble les deux Roynes ses sœurs, auëcques aultres Princes & gros personnaiges, estoient audit tribunal, deuant la maison de la ville, ioieusement regardant yceulx esbatz. Aultres nobles hommes, & nobles dames, regardoient, tant par dessus ycelluy pont ou gallerie, que du tribunal au bout d'ycelle gallerie.

A l'opposite du tribunal, ou sa Maieste regardoit iceulx esbatz, a lautre costé du marchiet auoit vng moult bel & riche eschaffault ou tannel (qu'Espaniolz nomment Cadahalco) Sur ycelluy eschaffault auoit de moult gros personnaiges, quy (comme iuges ou arbitres d'ycelles ioustes) debuoient a vng chascun selon son merite attribuer & donner pris. Deuant ycelluy eschaffault estoient (vng chascun en son ordre) les armes d'vng chascun d'ycelz quy auoient esté ausdictes ioustes, lesquelles armes ont estées portees sur la maison de la Ville, & illecques posées (comme lon pœult veoir en la chambre de Messieurs) en memoire perpetuelle a noz successeurs.

Le Souper magnificque & triomphant.

Pres estre ycelluy iour venu iusques au soir, & que tempz fust de souper, lon a apreste en la salle cy dessus souuent mentionnée, & pour ce faict & bastie vng moult grandt, sumptueulx, & magnificque soupper, voire en tel & sy grand appareil de metz, entremetz et de viandes tresdelicieuses, que de plus riche, plus sumptueux, plus magnificque, ne de plus triomphant n'est possible a homme quel quil soit de penser. Illecq se sont tant abbaissiet (par prieres & persuasions de Messieurs de la ville) que de venir, & ycelluy souper de leur presence illustrer, asscauoir la Maieste Imperialle mesme en personne, le Prince son filz, la Royne de Franche, la Royne de Hunguerie, toutes deux sœurs de sa Maieste, le Prince de Piemont, les deux Duchesses de Brunzuick, asscauoir, l'ancienne & la iosne, le Duc d'Albe, & moult bon nombre d'autres grandz personnaiges, comme Ducz, Contes, Barous, & aultres Nobles Gentilz hommes.

Le Bancquet triomphal.

Pres ycelluy tant magnificque, tant triomphant & sumptueux souper, a este appreste de mesme en moult grāde sumptueusite vng moult riche Bancquet, Auquel Bancquet lon voioit choses incroyable & de moult grande admiration. Tous vaissaux propices a ycelluy tant noble & excellent Bancquet, comme platz, escuelles, saucieres, fallieres, assiettes, tasses, gobletz, & chandeliers, estoient moult artificiousement & subtillement faites toutes de sucre, & cy, & la, enrichis de moult belle dorrure. Lon voioit yllecq toutes sortes de fruietz, de toutes sortes d'animalx, sy tresvifurement pourtraictz & toutz de sucre, que personne ne s'en scauoit assez esmerueillier. Et combien qu'il y eust de ce grande habondance & superfluite, touttefois

en y eust eu a plus grande plenté, sy la Maieste Imperialle, vne partie tant pour son aysement (a cause que la pluspart de la nuict estoit ia passée) q̄ pour lamour des Nobles Dames, quy illecques estoient présentes a tresgrand nombre, n'eussé fait leuer ycelluy Bancquet, lequel apres estre incontinent fait, & les tables ostées, lon a (selon l'ysaige & maniere de court) commenciet les danses, & demenez toutes manieres de leesses & deduictz.

Vng merueilleux Spectacle nocturne.

APres estre ledict bancquet finé, ce pendant que lon s'espatoit en danses & aultres duditz, Voicy que soudainement & inuisiblement s'est apparut & demonstre, vng merueilleux Spectacle.

Sur le Marchiet estoit vng arbre subtilement fait, de haulteur raisonna-ble bien branchiet, & fœulliet, plain de fruiet, aupres d'ycelluy arbre auoit deux statues, ou ymages nues, artificiellement entaillees de bois : l'une estoit Adam & l'autre Eua, entre yceulx pendoit a ycelluy arbre, vng grandt, horible & espouentable serpent, Tous les membres d'Adam & Eua, toutes les fœulles & pommes d'ycelluy estoient creuses & vuydes par dedens, emplies de petites fuzees de pouldre a canon, & sy ingenieusement composees que lon ne les pouoit pas bien (& principallement de nuict) veoir ne discerner.

Ainsy doncques ce pendant que vng chascun regardoit & consideroit ycelluy Spectacle, voicy que inuisiblement & soudainement, de entour les piedz d'Eua, est montee petit a petit vne flammette ou estincelle de feu, & subtillement entree au ventre d'Eua, lequel incontinent s'est creuez, rendant vng son moult horrible & espouentable, ou decha, de la en sont venues, & produictes plus de cent aultres flammes, apres venant a Adam, puis apres au serpent & consequemment audict arbre, yllcque se sont creuez Adam, Eua, le serpent, toutes ensemble sont creuees les fœulles de l'arbre. La se pouoit ouyr vng bruict merueilleux, estrange, & espouentable, Alheure estoit Eue quasy toute arsse, puis brusloit Adam, ensemble le serpent, qui tost furent consumez en cendres.

Aultant de pommes & fœulles qu'il y auoit sur ledict arbre, avecques tant de flammes, voioit on ycelluy brusler: dung seul regardt lon voioit milles flammes, d'une ouye oyoit on le bruict de milles coupz de hacquebutes, ceulx quy estoient la aupres, tant pour la soudaine multitude du feu faultant, que pour le soudain bruict de tant de tonnoires, estoient sy tresespouentez que de craincte & paour comme d'vng coup de tonnoire tomboient a terre, horriblement brayant & criant, lung de cha, l'autre de la (a quy mieulx mieulx) hastiuement fuyant, sans attendre nullement les vngz les aultres.

SCelluy tant merueilleux Spectacle, ycelluy tant magnifique Souper, ledict tant constable Bancquet, ensemble ycelles Ioustes, Tournoy, tous yceulx triumphaulx Spectacles, Figures, &aultres appareils triumphaulx, (reseruez ce que ont faict les Nations des Marchandz estranges) ont Messieurs de la Ville, au nom de la dicte Ville, ensemble de toute la republique (& ce a l'honneur de la Magnificence de nostre Prince) par amour volontaire liberallement deffraiez.

Et voicy la fin diceulx triumphes, lesquelz ont estez faictz encinq iours.

DIEV le Createur (car tout ce a esté faict seulement par vraye et parfaicte amour enuers nostre Prince naturel) nous doingt par ycelluy memorial de principe amour, son amour Princialle (comme le bon pere enuers ses enfantz) sentir long tempz en bonne prosperite par experiance.

Tous yceulx triumphes, ont estez premierement proposez au grand Conseil, aux Seigneurs, & communz de la ville, estant pour lhors Consulz & Bourguemaistres, Messire Lancelot van Vrsele, & Messire Henry de Berchem: &acheuez & demonstrezz durant le Consulat de Messire Nicolas vander Meere, & Messire Jacob Hertse.



Summa

De tous les ouuriers & artistes
lesquelz ont besongnietz auſ-
dictes pieches triumphalles,
ycy dessus escriptes.

La ville, auoit .**IIIIC. XXI.** charpentiers.

Paintres, trente & sept.

Imaginiers, & tourneurs, seize.

Personnaiges sur les eschafaulx .C. **XXXVII.**

Sans aultres cōmuns ouuriers iusques au nōbre de .**XXX.**

Les Allemans, auoient .**XXX.** charpentiers.

Paintres .**XXIIII.**

Communs ouuriers .**XVIII.**

Eſpaignolz, charpentiers .**L.**

Paintres .**XXVIII.**

Imaginiers & aultres semblables .**XII.**

Anglois, charpentiers .C. **LI.**

Imaginiers .**XLVI.**

Paintres .**XLIIII.**

Florentins, charpentiers .**LXXVII.**

Paintres .**XXVIII.**

Imaginiers .**XVIII.**

Geneuois, charpentiers .**LXXXVII.**

Paintres .**LXXII.**

Imaginiers .**XXII.**

Charpentiers en tout .**VIII^c. XCV.**

Paintres en tout .**II^c. XXXIII.**

Et aultres ouuriers .**IIIIC. XCVIII.**

Somme tottalle

M. VII^c. XVI.

Et estoient tous yceulx ouuriers
de dedens la ville.

Summa
De noz Cheualceurs
& pietons.

Les hommes a cheual, estoient. **VIII^C. LXXIX.**

Lacquaitz. **III^{I^C}**. XVI.

Pietons ou souldars. **III^{I^M}**.

Porte en summe. **V^M. II^C. XCV.**


Les cinq Archz triumphaulx,
asscauoir, des Allemans, Espaignolz,
Florentins, Geneuois, & Anglois, ont
couste totallement vingt & six mille
huict centz florins Carolus.

Monsieur Iehan du bout, alias vanden
cynde, Licentiet en la Saincte Theo-
logie, Curé & Pasteur de l'eglise de
nostre dame d'Anuers, a ce premiere-
ment visité, approuué par la Chancerie
de Brabant, & soubsigné Philipes
de Lens, en l'an de nostre Seigneur
mille cinq cens cincquante,
en Iuing.

Imprimé a Anuers, pour Pierre Coeck d'Alloft,
libraire iuré de l'Emperialle Maieste,
par Gillis van Diest,

1550.





*CVM PRI-
VILE-
GIO,*